

TÀNGIJAÀYÌ MÊSÙ KÙDÌ YESÙ



Amen. Twasàkidilaayi, George, Becky, ne Mwanèètù wa bakàjì Ungren, musambu mulenga awu! Ncyà bushùwà ne: “Byònsò bìdi bishintuluka pàdi Yesù ùlwa.” Yèyè ùdi wipata mìdimà, ne ùmwanga Bukênkè, ne twètù tudi ne kusakidila bwà bwalu abu. Mpindyewu, aci civwa mmusangu wà kumpàla wà Becky kwimbaye mu èkèleeziyà emu, musambu mukùmbànàngane menemene, *Pàakalwa Yesù*.

² Pa nàнку tudi ne kusakidila bwà kwikala cyàkàbìdi kaaba aka, dilòòlò edi, ne kusakidila kwàbùngì bwà . . . dilwa dyènú dilenga mu dindà emu. Nènku mpindyewu dilòòlò edi, bìdi ne, ndi ne kaacyena-bwalu kakesè kàndì njinga kwakulapu, mu katançi kakesè emu; kàdi ànu kumpàla menemene kwà cyòci aci, ndi ne ndambu wa mamanyisha à kufila, ne bikwàbò.

³ Nènku mèmè dîyi ndimpate ndambu. Ngeela meeji ne cidi ànu dyakula dipitepite bùngì. Mvwa muyiishe ntàntà mule. Kàdi pàndi nkwata mikàbà yà mèyi eyi, yà dîbà òmwè anyi àbìdi, ne pàndi ngààlukila apa, mbwalu ndi munkaci mwà kuyìkwàta bwà buloba bujimà. Ne pa nàнку ndi nnwela twasàkidila bwà kwikala ne lutuulu kutùdi mu dindà emu.

⁴ Nènku mpindyewu kudi tuntu tukesè tùndì njinga kuteela mwaba ewu mene. Mbwenà kwamba, ne, ndi—ndi muswe kukonka èkèleeziyà, cintu cyà kumpàla, cintu kampànda cìndì—cìndì mwenze, nènku ndi—ndi muswe kukonka ní ndi mwà kucishintulula, dilòòlò edi. Katwena . . .

⁵ Ncyèna ngènta malaya à cidimu cipyacipyà to. Dìbà adi ndi . . . bìdi bikèngela bwà twètù kwalukila kumbelu mààlabà, nàнку katwàkwikala apa bwà cidimu cipyacipyà to, bwà . . . kàdi netwikale tunùvùluka. Ne ndi ngeela meeji ne nekwikalè disangisha kaaba aka, dilòòlò dyà cidimu cipyacipyà. Èyo, aci ncyà bushùwà, di—disangisha dyà nciishà, mutùbo misangu yònsò ànu bàdyènta dilòòlò dyà cidimu cipyacipyà amu’s. Tudi baswe kushààla, kàdi dîbà adi katwèna ànu mwà kwalukila pa dîbà bwà—bwà kubweja bânà mu kàlaasà to. Kàbìdi bìdi bikèngela bwà mukàjàanyi kubàsukwilayè bilàmbà; s’nudi bamanye mutùbi’s.

⁶ Pa nàнку ndi muswe kusàkidila muntu ne muntu wa kunùdi bwà bintu byènú bilenga binùdi batwenzele mu Noël abi. Ne nwènú bakàjì bàvwà baye kuntu kwaka bwà kuteeka byàkudya mu nzùbu, ne bikwàbò, batùtèèkèle, mu mùshindù wa ne patwàkabwelamu, muvwa . . . bintu bimana kulamba ne bilongolola bwà kudya. Ncyà bushùwà ne ndi nnwela twasàkidila bwà bwalu abu. Nzambi àtambèku kunùbènesha.

7 Nènkù èkèleeziyà, bwà ticket wabù mukesè, bwà ngààmòna mwà kuya kuntweku ne—ne kupeta ndambu wa bilàmbà bu mèmè naabi dijinga, bwà nkooci. Batu bàmpèèsha nkooci ku cidimu cyònsò. Ne bàmwè balunda bàànyì balenga mbampeteleku nkooci. Nànkù ki mèmè kudyambidila ne, byòbì ànu bìmpè, bìdì bìnkèngela bikwàbò bintu bu mùdì mitèèlù ne byà kuvwala mwinshi mwà mitèèlù, ne bikwàbò, ndi njinga kutuula mfranga ayi bwà byòbì abi piikala èkèleeziyà mumòne ne mbyakàne nànkù. Ndi naabi dijinga bikolè kutamba mùndì . . . kutàmba mùndì njinga ne nkooci, bwà mpindyewu.

8 Nènkù mpindyewu, nsongàalùme wa citene uvwa ufuma ku ditwimbila ewu, Mwanèètù George Smith, wa mu Tucson mwàmwa, tuvwa baye ku èkèleeziyà wabò kuntwaku, èkèleeziyà wa ba-Baptistes bàà Dipungila Dipyadipyà. Tatwèndè utu mpandanjila. Ngeela meeji ne yèyè utu ne èkèleeziyà bu mwandamutekète mu Mexique wa Kale mwàmwa. Ne ncyà bushùwà ne kùdì bamwè bantu bàà maalu mîmpè muntwamu. Ne tatwèndè ne mamwèndè, ne bònsò abu, mbantu bìmpè. Ne George mmwànà wa balùme wa maalu malenga wa dikema. Bivwa ànu bintonde muvwaye kàyi mutupèèsheku dìyì dimwè dyà bujaadiki kumpàlà kwà kusòmbayè panshì, bwà ngàsà udi usungila wa Kilistò mu nsòmbelu wèndè.

9 Nènkù mpindyewu, Mayiisha a—a, mvwa mulaye mwab'wu ànu àbìdì àdì panshi aa ne, Mayiisha, kumpàlà kwà mèmè kuumuka kuya mu masangisha, mvwa mwà kwanji kulwa kaaba aka ne kuàkwàta pa mikàbà yà mèyì ne pashiishe kupàtuka pambèlu. Aci ciwva mbwà difikisha dyà mikàbà yà mèyì kùdì bantu. Dìbà adi mvwà kulwa kaaba aka ne kukwàta Diyiisha pa mukàbà wà mèyì, ne pashiishe kupatuka kukaDiyiisha. Aci ncifwanyine kupa bantu mpùngà, bwà—bwà bakwàci bàà mukàbà wà mèyì, bwà kwenzabo mukàbà wà mèyì ne twètù kuya naawu patùyaaya apu. Mpindyewu ndi pabwìpì ne kuumuka kuya mu mulanjilanji munène wà butangadiki, pa nànkù ncyà—ncyàkupeta mùshindù wà kwenza nànkù kubangila ku mpindyewu to, nwamònu's, nènkù ewu udi ukwàta mikàbà yà mèyì nebikèngele anu bwà kuyikwàtaye patùdì twenda tuya apu.

10 Ne ndi ngeela meeji ne, bòbò biine, kabààkwenzaku cisangilu pa mikàbà yà mèyì mu lumingu elu anyi? Anyi, cintu kampànda pa, cintu kampànda cidi citangila mikàbà yà mèyì mu lumingu elu. Nànsha nànkù, ngeela meeji ne Mwanèètù Sothmann ùdì kaaba aka, ne ùdì uleeja mpala wa Mwanèètù Maguire. Ncyèna mumanye ní ùdì kaaba aka anyi kènàpù. Ngeela meeji ne Mwanèètù Fred udi kaaba aka. Muntu kampànda's wàm̀bì ne ùvwa kaaba aka. Nènkù yèyè . . . Ngeela meeji ne nebènze cisangilu mu lumingu elu, pàmwàpa mààlabà dilòòlò, anyì dìbà kampànda, pa bwalu bwà mikàbà yà mèyì. Tuvwa twakulapù dilòòlò adi, mu cibambalu amu. Ngeela meeji

ne dîbà ndimane kukumbana bwà cintu kampànda, bwà bangate ne balongolole bwalu abu's.

¹¹ Pa nàнку, kubangila ànu ku mpindyewu, pàmwàpa nênyîshê ànu kuyiisha Mayiisha àndì nciyi mwanjì kulenga mu tabernacle, mu masangisha à pambèlu.

¹² Nènku mpindyewu ndi ne, ndi muswè kusàkidila Nzambi bwà bujaadiki bwà Mwanèètù Blair abu. Byenzekeku ne Mwanèètù wa balùme ne Mwanèètù wa bakàjì Blair mbasòmbe kaaba aka diloòòlò edi mene, basòmbe kaaba aka ànu kumpàla kwètù eku, yèyè wa bwena uvwa ne mwànà mukesè wa balùme awu. Nènku ndi mvùluka pààkangambila Mukalenge, pavwaye. . . Mwanèètù Blair awu's, mucibuluke yònsò, udila mwadi. Ne mwanèndè wa balùme mukesè awu uvwa muzaaza kwisù mùshindù *ewu*, kùdì kashinyi kabunguluke, ne uvwa mu ngiikadilu mùbì be. Kàdi pàmvwà nsa—nsambila apu, mèmè kumòna kakwàcikwètù aku kasàngale. Nènku Mwanèètù Blair, mu bushùwà bwà bwalu, kunkonkayè, wàmba ne: “Mwanèètù Branham, eci ng'EMU MMÙDÌ MUKALENGE WÀMBA anyi?”

Mèmè ne: “Mwanèètù Blair, Blair, ng'EMU MMÙDÌ MUKALENGE WÀMBA's.”

¹³ Ne Mwanèètù Blair ùdi kaaba aka dilòòlò edi. Ne ncyà bushùwà ne tudi ne kusàkidila bulelèlè bwà mùdì Mwanèètù Blair neetù kaaba aka. Nènku uvwa munkaci mwà kutacishiibwa kùdì—kùdì dibinduluka dikesè dyà mutù. Ne Sàtaanà mumubangule ntoota wà dikema, mwab'ewu ànu àbìdì àdì pànshì aa, bwà kuteeta kumufikisha ku dibèenga kunguitabuujà. Kàdi pàvwà Sàtaanà munkaci mwà kwenza nàнку apu, ke Mukalenge kulwa buludi kumubuulwilaci; ne kumwambila bwalu abu, ànu bwà kuciimanyika kumpàlà kwà dîbà kulwadi bwà bwalu ebu. Nènku Mwanèètù Blair mmuntu wa maalu mîmpè. Nènku ndi muswè bwà nwènù kumuvùluka. Ùdi bu mupange kwà kwela dînù ne kwà kwela dikàla. Kèna ànu mumanye cyà dyenza to. Kàdi ndi ne dyeyemena ne, Mwanèètù Blair, Nzambi. . . Wèwè udi musadidi munene wa Kilistò, ne Yèyè ùdi ne byàbùngì byà wèwè kwenza, bwalu Makênkè adi munkaci mwà kubwacidila. Ùvwa kaaba aka mu dindà emu anyi? Uh-huh. Èè, abi's mbilenga be.

¹⁴ Mpindyewu—mpindyewu, ndi ncinka ne, musangu wàlondà wùngààpeta mùshindù wà kunumòna, ùdi mwa kwikala mu movù wa bintu bitoloka, bwà mutanci mukesè. Nènku patwàmbà kafika ku ciine cikondo aci, pàmwàpa netumanyè ní twikala mwà kwenza ma—masangisha, muneemu mu Jeffersonville, anyi to, mu cikondo civwa cikèngela bwà mèmè kwikala mu Norvège ne mu matùngà a Scandinavie. Mpindyewu ànu bangabanga ne twètù kwangata cyena-bwalu. . .

¹⁵ Bwalu, tudi ne mulongo wa babèèdì wùdì ne cyà kulwa, ne bààbùngì mbiimane kuulu, mu bibambalu, ne ku bimanu,

ne bikwàbò, ne ndi mumanye ne, nwênù, mbikolè be bwènù nwênù. Nènku nkaadiku mwimane, misangu yàbúngì, mèmè paanyi. Ne mwa mpìta, kwénjì katancì, ngenda mpweka ne mukàjàànyì, mèmè kumòna bantu banyungulukile biibi. Ki mèmè kudyambidila ne: “Nganyi udi wamba ne Èvànjeeliyò kaciyena ànu cintu cyà citàmba kukoka ntema cìdiku pa buloba apa’s?” Ncyà bushùwà ne ke mùdìbì. Ùdi, Ùdi ùkoka ntèmà yà bàdi bàsankishiibwa mu Yèyè. Bwà aba bàdi kabàyi bàsankishiibwa to, mu bushùwà bwà bwalu, kabena bàsankishiibwa to. Bwabo bôbò, Kààkwikala ùkòka ntema to. Kàdi, Yesù ne: “Pangikalà Mèmè,” wamba ne, “pangikalà Mèmè mubàndishiiibwe kuulu kwà buloba, Nènkokè bantu bònsò kùNdi.” Mùshindù mwine ùdìbì bìlèlèlè’s wè!

¹⁶ Nènku pàndì mfika mwab’ewu, kùdi byàbúngì be byà kwamba, nènku bikèngela mfundèku bìndì njinga kwamba mwab’ewu abi, bwà katancì. Pàtupu ndi. . . Kudi byàbúngì be byà kwamba, udi ànu upwà mwoyi ciwikalà mwà kwamba.

¹⁷ Mpindyewu, ndi ngumvwa ne tatwëndè wa Mwanèètù wa balùme Ungren ùvwa mubàtìijiiibwe mu dindà emu, mu Dìna dyà Yesù Kìlistò. Nènku Mwanèètù wa bakàji Ungren ne bakwàbò abu piikalàbo mwab’ewu, ndi mutwishiiibwe ne ncintu cinène bwàbò bôbò, bwalu ki ciwva disambila dyàbò ku musangu ne ku musangu munda mwà bidimu byàbúngì. Nènku Mwanèètù Ungren, mwaba wònsò wùdì awu, Nzambì àkubènèshè bikolè menemene, mwanèètù wanyi.

¹⁸ Nènku piikalà aci kaciyi cijaalame to, Nzambì wandumbulwishilaci ku Ditùkù dyà Cilumbulwidi. Nwamònu anyi? Ndi mumanye ne ncijaalame. Abu—abu bujitu bùdì pa aanyi makaaya. Ncyà bushùwà menemene, bwalu m’Bulelèlè.

Wèwè udi wamba ne: “Bidi ne cìdìbì bìshintulula anyi?”

¹⁹ Bìvwa naaci bwà Pòlò. Bààkakonka mùshindù ùvwàbò babàtìijiiibwe. Bààkamba ne bôbò bakaavwa bamane kubatìijiiibwa kùdì Yone, muntu wàkabàtìiiza Yesù awu. Pòlò kwambaye ne bàvwa ne cyà kulwa ne kubatìijiiibuludiibwa, cyàkàbìdì, mu Dìna dyà “Yesù Kìlistò.” Ne muntu nànsha umwe mu Bible kààkabàtìijiiibwakù mu Dìna dyà “Taatu, Mwàna, ne Nyumà Mwimpè to.”

²⁰ Kacya bantu kabàtukù banji kubatìijiiibwa mùshindù awu to too ne pààkalwà bulongolodi bwà èkèleeziyà wa Kàtòlikè ku Laò- . . . Laò- Nicée kwàka, Nsangilu wa Laò-Nicée ku Nicée, mu Rome mwàmwa. Ki mwaba ngwòwò awu wùvwà muntu wa nzànzànzà mubàtìijiiibwe, bàkwàta mudimu ne myànzu ayi.

²¹ Muntu kampànda kungambilaye ditùkù adi. Mèmè ne: “Èè, piikalabi ne. . . ‘Mukalenge Yesù,’ ki Dìna Dyèndè ndyòdì adi.” Yèyè ne. . . “Èè,” mèmè ne: “muntu yèyè mulwe kùdì. . .”

Yèyè ne: “Ncyèna ngeela meeji ne cidi ne cìdìcì cishintulula to.”

22 Mémè kumufyekela ànu mu dilongesha dyèndè yêyè mwine adi. Mémè ne: “Muntu yêyè mulwè kùdì wamba ne: ‘Mémè ndi mubatijiibwe mu Dîna dyà Rose wa Shalòna, Mbata wa mu Cibanda, ne Mùtootò wa mu Dindà,’ udi mufwànyine kutwà ‘amen’ ku cyòci aci anyi?”

Yêyè ne: “To, mukalenge.”

Mémè ne: “Mmunyi mùdì mufwànyine... Udiku mwà kumubàtiizulula anyi?”

Yêyè ne: “Èyowà’s, mukalenge.”

Mémè ne: “Udi mufwànyine kumubatiiza bìshi?”

Yêyè ne: “Ndi mufwànyine kumubatiiza mu Dîna dyà ‘Taatu, Mwàna, Nyumà Mwîmpè.’”

23 Ki mémè ne: “Mùshindù awu ki wûmvwà mufwanyine kumubatiiza, èyowà, mu Dîna dyà Taatu, Mwàna, Nyumà Mwîmpè.” Mémè ne: “Mpindyewu: ‘Rose wa Shalòna, Mbata wa mu Cibanda, ne Mùtootò wa mu Dindà ki ndîna to.’”

Yêyè ne: “Ncyà bushùwà. Mmwânzù.”

24 Mémè ne: “Ki mùdì ‘Taatu, Mwàna, ne Nyumà Mwîmpè.’ Mpindyewu ndi mufwànyine kumubatiiza mu Dîna dyà Taatu, Mwàna, ne Nyumà Mwîmpè; ne Dîna dyà Taatu, Mwàna, ne Nyumà Mwîmpè didi ‘Mukalenge Yesù Kilistò.’ Menemene’s. Pa nàнку ndi ngàmba...” Nudi mwa kwitaba, anyi kubenga kwitaba, kadi’s wàkacimòna.

25 Ûvwa m’Mwanèètù Joseph Mattsson-Boze, wa ku Chicago, muntu uvwabi bitambe kunkolela bwà kufikisha ku dicimòna, cyòci aci. Nèнку ndi ncinka ne ndi ne beena kalaba batwè ku binunu bisàtù anyi bînaayi bààkubatiiza mpindyewu, pângàasabukà kuya nendè mu Àfriке, bwà kubatijiibwa cyàkàbidi.

26 Mpindyewu, pa nàнку tudi ne kusàkidila bwà Bukênkè bwà Èvànjeeliyò. Nàнку mpindyewu, Yesù wàkamba, pavwaYè pa buloba apa ne: “Mémè, cîNdi ngumvwa, ke cîNdi ngàmba.” Nèнку mpindyewu nèngàmbè... ànu bwà tusunsa twètù dikumi tùdì tùlondà etu, tutwe ku dikumi, anyi dikumi ne tutaanu, kumpàla menemene kwà mémè kwangata cyena-bwalu cyanyi, nèнку kaacyena-bwalu kîpì menemene, nèнку pashiishe netúsambidile babèèdì. Mu mudimu wànyì wà bwambi ndi mmufike mu cipidì, mu mwaba wùndì... Bìkèngela bwà mémè ku—kwamba cintu kampànda. Nèнку ndi... .

27 Yesù wàkacyàmba. CyàkuumvwaYe aci, s’ke cyàkaakulàYe. Ne Wàkamba ne: “Ndi munùbìkile munùdì balunda Bàànyì, ne mulunda ùtu wambila balunda bèndè bintu byònsò.”

28 Pòlò wàkamba, mu Byenzedi 20:27 ne: “Ncyèna mudikande bwà kunwambila Mubelu wònsò nkòòng wà Nzambì to.” Nwamònu anyi?

29 Nènkù swayiku bwà mèmè pàànyì, dilòlò edì, ngámbe cintu cimwècimwè cyàkambe munsantu munène wa kale awu. Ku dyànyì pàànyì dimanya, ncyéna ne. . . Ncyéna mudikande to, kàdi ndi munwambile patòòke Mubelu wònsò nkòong wà Nzambì.

30 Muntu kampànda uvwa munkaci mwà kwela ùmwè wà ku mikàbà yà mèyì, ditùkù adi. Nènkù ànu bwalu cyàkafìkisha muntu kampànda munda, bàakabààshila cingoma pa dìdidiishi, ne mukàji kampànda kutapikaye.

31 Pa nànkù pàmwàpa dīngà ditùkù nēntwè citampi ku bujaadiki bwànyì. Kàdi pààlwà ciine cikondo aci. . . Ki ciikala dīdà dyànyì dyà kuya. Pàdi ànu dyànyì dībà kadiyì dilwe, kakwena cintu nànsha cimwè ciikalà mwà kungenzela bibi to too ne ku dībà adi. Nwamònu anyì?

32 Mpindyewu, tudi twitabuujà Èvànjeeliyò umwèumwè awu, ànu mùshindù ùdi Bible mufundìibwe. M’Mujaalàmìjìibwe ànu menemene. Nènkù—nènkù cingoma cyòci cijaalamìjìibwè mu cyòci menemene, ne mu katoba; cyòci cyasè cidici ciludikila musangu wa kumpàla, necicyasè musangu mwibìbì, ne musangu ònsò.

33 Mucì, anyì ditàmbà, mwonji wa mvinyo, wòwò mupàtula ditàmbà, ne ditàmbà adi dikwama bimuma kampànda; musangu ùdi ùlondà ùdi mwonji wa—wa mvinyo awu ùpatula ditàmbà, nedikwame bimuma byà mùshindù ùmwèumwè awu.

34 Nènkù pìikalabi ne Yesù ùdi Mwonji wa mvinyo, ne twètù tudi matàmbà; ne Ditàmbà dyà kumpàla, Ekèleeziyà, dyàkapatulà Mwonji wa mvinyo awu adi, kufundabo Mukàndà wa Byenzedi paanyimà pèndè. Ne Ditàmbà dyà kumpàla dyàkabatiiza mu Dīnà dyà Yesù Kilistò. Ne bàvwa ne Nzambì udi ne mwoyi munkaci mwabo, uvwa wenze bintu bimwèbimwè munkaci mwàbò byàkenzaYe pàvwàYe pa buloba abi. Ki bwà cinyi, bantu bavwa bàbàtangìla, nànsha muvwàbu bapangi ne kabàyi balonge kàlaasà amu, bàjingulula ne bàvwaku ne Yesù, bwalu Mwoyi Wèndè ùvwa kùdìbo.

35 Ànu múnkaadi mwambambe ne, bu ne mvwa ne nyumà wa—wa Beethoven munda mwànyì, mvwa mwà kufùnda misambu. Pìikalà Beet-. . . bu mèmè. . . Beethoven musòmbèle munda mwànyì, s’mvwa kwikala Beethoven. Nwamònu anyì?

36 Bu Shakespeare musòmbèle munda mwànyì, nùnkù’s ndi Shakespeare. Ndi—ndi mufwànyine kufùnda tusalà, ne—ne—ne kwimba, ne bikwàbò, bu Shakespeare musòmbèle munda mwànyì.

37 Nènkù pìikalà Kilistò ne mwoyi munda mwànyì, byenzedi byà Kilistò nenùbyènzè. Cyà bushùwà. Bìdi ne cyà kwikala nànkù. Ne Kilistò ncyini? Dìyì. Yèyè kwamba ne: “Nwènù bashààle munda Mwànyì, Dìyì Dyànyì munda mwènù, dībà adi nulombe cinwàsà aci; necyènjìibwe.” Bwalu, Dìyì dīdi mwómò

amu, didi dikèngela ànu Bukènkè cyanààna; ne Bukènkè bùdi bùDivwija ne mwoyi.

³⁸ Pa nàнку mpindyewu ndi nnwàmbile cintu kampànda, mpindyewu, cìndi ncìyi mwàmbe kacya kwònsò aku to. Nènku, mbwena kwamba ne, cintu citùdi bindilendile ntàntà mule (munda mwà bidimu byàbùngì menemene, bidimu binaayi anyi bitaanu, anyi pàmwàpa bipite apu), Nkokelu Mwisàtù, wàshìndikiibu mpindyewu, ne ndi mutwìshìibwe ne nwènù bònsò nudi bamanye cìdici.

³⁹ Mpindyewu vùlukààyi ne, kakwàkwikalaku ditentula dyà cyòci aci to, bwalu kacýena mwà kutentudiibwaku to. Nwamònu's, kacýenaku mwà kutentudiibwa to. Mpindyewu cìdiku. Ne mèmè ndi ne...Ndi mudimwìjìibwe bwà cyòci eci, ne àbìdi adi pànshì aa...Bwa mpindyewu ncyenzèke, bwà kumonaci mwà kumanyisha bwikadi bwaci munkaci mwènù, nwamònu's, kàdi kàcyàkukwàta mudimu mu mùshindù munènè to too ne pààbanga Nsangilu ewu kuumisha maalu. Ne pàdiye ùbanga, pààbangaye...Beena Mpenta, ne bakwàbò, bàdi mwà kutentula pabwipi ne cintu kanà cyònsò cìdi mwà kwenjiibwa aci. Kàdi pàdi cikondo aci cikùmbàna, pààtwàdija dicincimikiibwa, dìbà adi nenùmòne, cinùkaadi bamòne mu mùshindù wà katùpà kipi aci, cimwèneshiibwe mu kaabujima kàà bukolè bwàci. Nwamònu anyi? Nwamònu anyi? Nwamònu anyi? Nwamònu anyi?

⁴⁰ Mpindyewu ndi ne cyà kutùngùnuka mu butangadiki. Ànu mùmwà mutumìibwe ne mudimu, dyàmbedi, ndi ne cyà kutùngùnuka. Nènku, nukaadi bapete Dìyi, ne bamanye cyà kwindila, ne mwà kwimana. Ndi ne cyà kutùngùnuka mu butangadiki. Nènku, balunda bàànyi, shààlaayi bapùwe, ne batùngùnuka ànu ne kwenda kuya, bwalu dìbà dikaadi dyenda diseemena ne lukasa lwònsò, nwamònu's, diikalà cintu kampànda mwà kwenjiibwa.

⁴¹ Mpindyewu, nudi bafwànyìne kumòna tuntu tukese twà pabwàtù twènzeka bwànyi mèmè. Kaciyiku cintu cyà mpèkaatù to; kí ncìndi muswe kwamba to. Kàdi, ndi njinga kwamba ne, cintu kampànda cyà pabwàci cishìilàngane ne mmwenenu wa ciibidilu. Bwalu, kungààfiki mpindyewu, mu mudimu wà bwambi eku, ndi mwalukile paanyimà mwab'ewu, ntangila katupa aku ne mwindile cikondo cyà kukwàta naaci mudimu. Kàdi, necikwatè mudimu.

⁴² Nènku muntu yònsò mmumanyè aci, bwalu, ànu mwàkashìndikiibwa Cyàkumpàla menemene amu, ke mwàkashìndikiibwa Cìbìdì. Nènku bu nwènù mwà kwela meeji ne ntèmà yònsò, nwènù bàdi bàà nyumà abu's. Bu mùdi Bible mwambe ne: "Eci cìdi bwà ewu udi ne lungenyi." Mwisàtù mmushìndikiibwe ànu pyòpyopyò. Nwamònu anyi?

Tudi bamanye mwaba wùdibi. Pa nàнку, Nkokelu Mwisâtù ùdi kaaba aka.

⁴³ Ngwa cijila wa dikema, ne, ncyena ne cyà kwamba byàbúngì pa bwalu abu to. Bu mwàkangambilaYe ku cibangidilu, wàmba ne: “Eci, kwambikùpu bwalu nànsha bumwè to.” Nudi bavùluke aci, kukaadi bidimu anyi? Cìdi cìdyàkwila nkààyaaci. Nwamònu anyi? Kàdi nwènù. . . Mémè nkààdikù muteete kuumvwija bikwàbo abi, ki mémè kwenza cilema. Eci ki cìikalà cintu, cìikalà, ku wanyì mmwenenu. . . Ncyèna ngàmba ne Mukalenge ngudi mungambile cyòci eci to. Eci ke cintu cyàtwadija diitabuuja dyà Dyambwibwa, bwà kuya. Nwamònu anyi? Nwamònu anyi? Nènku cidi. . .

⁴⁴ Ndi ne cyà kushàala mupuwe ànu katanci kakesè. Mpindyewu vùlukaàyi ne, ne bàdi batèèleja mukàbà wà méyi ewu abu, nudi bafwànyine kumòna dyàkàmwè dishintuluka mu mudimu wànyì wà bwambi, dyà ngààlukila paanyimà, nciyi nya mutangile kumpàla to; ngààlukila paanyimà. Tudi mpindyewu mene ànu mu cikondo, nènku kacyèna mwà kwikala, kacyèna mwà kuya kàbidì kule to. Bìdi bìkèngela bwà twètù kwindilaku ndambu too ne pàdì eci cyènzeka lwà *mwab'ewu*, bwà kupetangana, dîbà adi cikondo cilwà. Kàdi, ncimanyishùbwe mu kantu ne kantu.

⁴⁵ Kulwalwa cikondo, mu ditùnga edi, cìikalà ditùnga edi mwà kukwàta mudimu ne bukolè bwònsò buvwa naabu nyama wa lwonji kumpàla kwàdi abu, uvwa mwikale Loomo wa cimpàngaanù awu pààkavwijiibwaye Loomo wa ciipaapà, nwamònu's, bwà ne ditùnga edi ke dyàcyenza.

⁴⁶ Bwàkabuulwibwa 13 ùdi ucyumvwija bitòòke tòò. “Mwànà wa mùkòòkò wakapatukila mu buloba. Nyama mukwàbò awu wàkapatukila mu màyi,” dyungwila ne misumbà ya bantu. Mwànà wa mùkòòkò ewu wàkapatukila mwaba úvwà kawùyi bantu to. Mwànà wa mùkòòkò ùdi uleeja ntèndeleeu. Mwànà wa mùkòòkò wà Nzambì. . . Nènku, vùlukaàyi ne, úvwa wàkula bu mwànà wa mùkòòkò. Cìvwa mmwànà wa mùkòòkò.

⁴⁷ Ne pashìshe, paanyimà pàà mutanci, civwij-. . . wàkapeta bukolè, ne kwakulayè bu dragon; ne kukòokeshaye ne bwònsò bwà—bwà dragon, bukolè buvwà naabu dragon kumpàla kwèndè. Ne *dragon* awu udi “Loomo,” misangu yònsò. Pa nàнку kanwenaayiku numòna anyi? Dingùmba dyà cyena Loomo; “cimanyinu,” dinguмба dyà Mishònyì; “cimfwànyì cyà nyama wa lwonji,” cyènzà bukolè kampànda bwikala mwà kwenzeja beena Mishònyì bònsò, bu didyenza cimùkù. Nebikèngele bwà wèwè kubwela mu Nsangilu wa Maèkèleeziyà ewu, bwà cyanààna kwàkwikala mu bwobùmwè to. Anyi bwà—bwà. . .

⁴⁸ Èè, bìdi—bìdi byàmba kwikala ànu mùshindù awu patùdì twakula apa's. Kwèna mwà kuya ku èkèleeziyà kampànda bwà kuyiisha paùdì kuyi ne karta kàà buumambala anyi

dimanyishiibwa kampànda to. Nènku mpindyewu, bwà bantu bu twètù aba, nebàtuumushe mu byònsò abi, bònsò, ncyà bushùwà menemene, bwalu kabààkupeta mùshindù wà kucyènza to.

⁴⁹ Cidi cyenda cidibonda. Nènku pashìshe pàdì dìbà adi dilwa, ne dicincimika difika mu cipidi cyà ucincimikiibwa ne èyo, dìbà adi tàngilààyì cìndì pabwìpì ne kunwambila mu tusunsa tukesè emu's. Tàngilààyaaku Nkokelu Mwisátù dìbà adi, nwamònu's, ne kakùyì mpatà to necìkale cyàmbila ànu bàdì bajimine kwabo kumana kujika abu, kàdì ne—necìkale bwà Mukàjì-musela ne Èkèleeziyà.

⁵⁰ Mpindyewu tudi batàmbe kuseemena kupìta ne mùdìbì bimweka's. Ncyèna mumanye ne ndìbà kaayi to, kàdì cikaadi ànu pabwìpì menemene, menemene. Ndi mwà kwikala munkacì mwà kwibaka cibùmbà cyà ku cyambilu bwà muntu mukwàbò kulwaye kwimanyinapù. Ndi mwà kwangaciibwa kumpala kwà ciine cikondo aci. Ncyèna mumanye to. Ne diine dìbà adi ndifwànyine kwikala lumingu lùlwalwà elu, lwikala Nyumà Mwímpè mwà kulwa ne. . . ne kutwàla Kilistò Yesù. Yèyè ùdì mwà kulwa lumingu lùlwalwà elu. Ùdì mwà kulwa nànsha dilòòlò edi. Ncyèna mumanye ne Neàlwe dìbà kaayi to. Yèyè kèna ùtwambila aci to.

⁵¹ Kàdì mèmè ndi ngiitabuuja bulelèlè ne, tukàadi pabwìpì menemene, mu mùshindù wà ne nciyikù mufwànyine kufwa lwà bukulakaji to. Pàànyì, ne bidimu makumi ataanu ne binaayi, ncyàkufwàku ne bukulakaji, Yèyè kayi mwab'ewu to. Nwamònu anyi? Ànu bòbò bangàase ku cingoma, banshipe, anyi cingà cintu, banshipe mùshindù kampànda, kàdì bwà bukulakaji kabwàkunshipakù to, too ne ku dilwa Dyèndè. Ne mèmè ndi ngiitabuuja nàнку.

⁵² Nènku ndi muswe kwamba nùнку. Kacya ncitu mwanji kucyàmbaku to kumpàlampala. Kàdì bilondeshile Mifùndù, bilondeshile cyàkambaYe kukaadi bidimu makumi asatu; kukaadi bidimu makumi asatu ne bisatu ku musulu kwaka, mu cidimu cyà 1933, èyowà's wè; cyàkambaYe, bintu byònsò mbyenzeke ànu mu byòbì menemene. Ndi mwà kupanga kucyenza, kàdì Mukenji ewu ki wàleeja Yesù Kilistò kudi bàà pa buloba. Bwalu: “Ànu mùvwà Yone Mubatiiji mutùmìibwe bwà kudyànjidila dilwa dyà kumpàla, ki mùdì kàbìdì Mukenji ne cyà kudyànjidilà Dilwa diibìdì.” Nènku Yone wàkamba ne: “Monaayi Mwànà wa mùkòòkò wà Nzambi ùdì umusha mpèkaatù wa bàà pa buloba.” Nwamònu anyi? Pa nàнку, cidi, cidi cipàlakajiibwa naaci mu mùshindù ne mùshindù wònsò. Kàdì ndi mumanye ne nebyenzeke nàнку, Mukenji neùtùngùnukè.

⁵³ Mpindyewu, kùdì bintu binène byenzeka mu njila amu. Mu dindà emu mvwa ngenza miyiiki yà bàbìdì mu cibambalu emu. Nènku nsongàalùme ka—kampànda wa citende, dyèndè

Autry, ùcìdi pàmwápa mwab'ewu dilòòlò edi. Ngwa mu San Antonio, mu Texas mwàmwa. Wàkalwa bwà kukonka ní... patùvwà tuya ku Dallas, tufùmina ku Californie; ní tuvwaku mwà kupicishaku dilòòlò dimwèpele ku tabernacle wàbò, ànu bwà dilòòlò dimwèpele cyaanàna. Nènku bàdi munkaci mwà kutangila, mu ditùkù dimwè dìdì dilonà anyi àbìdì, bwà kumòna ní tudi mwà kwenza nànkù. Nènku yèyè ùvwà ùngambila bwà bwalu. . . Nkacya ncitukù mwanji kufika ku San Antonio kacya ànu ku masangisha à kumpàla awu.

⁵⁴ Mpindyewu, masangisha à ntwadijilu, pangàakalwà ku San Antonio eku. Mwva kuntwaku, ngeela meeji, ne Mwanèètù Coote ne—ne Cilongelu cyà Buloba bujima cyà Bible aci's. Kàdi ngápù ne mwoyi dibàlaasà mutuvwa benzele masangisha's. Nènku civwa anyi dilòòlò dyànyì dyà kumpàla anyi dilòòlò diibìdì, ngeela meeji ne ndilòòlò dyà kumpàla, pàmvwà ngenda nya ku cibùmbà cyà ku cyambilu apu, muntu kampànda kujuukaye mu nzùbu amu, lwà mu ndekeelu menemene mwàmwa, ne kwakulaye mu myakulu, byenze bu cingoma cìdìdisha mazaji. Nènku wenza ànu ne atwe nyima panshi, ànu kasunsa kàmwe anyi túbìdì nànkù, ke mukwàbò kujuuka pa cibùmbà cyà ku cyambilu apu ne kukùdimunaye mwakulu.

⁵⁵ Ki mèmè kwimana, ku cyàkambaye aci. Ki mèmè kwambila muntu awu ne: “Udi mumanye muntu *ewu* anyi?”

Yèyè ne: “To, mukalenge.” Ki yèyè ne. . .

Mèmè ne: “Udi mulwe mwab'ewu bìshi?”

⁵⁶ Yèyè ne: “Bantu bándì nkwacila mudimu abu, bavwa ku. . . bàvwà mwab'ewu dilòòlò edi, ne bòbò mbàdi balwe nàanyi.” Yèyè ùdi. . . ùvwà mulami wa ngombe.

Ki mèmè ne: “*Udi* wenza cinyi?” Yèyè ne. . . “Udi mumumanye anyi?”

⁵⁷ Yèyè ne: “To, mukalenge. Ncitu mwanji kumumònaku to.”

⁵⁸ Ki mèmè ne: “Udi wenza mudimu kaayi?” Nènku yèyè uvwa ngèndààmùshìngà wa mu cimenga aci.

⁵⁹ Nènku cyàkambabo mu—mu. . . Mpindyewu, mwva misangu yònsò, kumpàla kwà mèmè kuyiila bìmpè, mwva ne mpatà ndambu bwà dyakula dyà mu myakulu; Mwva ndyàmbidila ne byàbùngì abi mbyà musunya, ne bivwa bifwànyìne kwikala nànkù's. Kàdi pàakambiibwa eci, dyumvwija adi divwa menemene ànu civwà Mwanjèlo wa Mukalenge mwambe lwà ku musulu aku, bidimu dikumi ne cimwè kumpàla ne: “Anu mùvwà Yone Mubatiji mutùmìibwe bwà kudyànjidila dilwa dyà kumpàla dyà Kìlistò, wèwè udi mutùmìibwe bwà kudyànjidila diibìdì.” Nwamònu anyi?

⁶⁰ Kàdi's ki bwalu abu, pavwa Mwanjèlo awu, Bukènkè abu bumanyishiibwe bwònsò nkòong. Byònsò ku èkèleeziyà, ku Dìyì, ku maalu à mamanya, ne bikwàbò byònsò, mbimanyishe bwalu

abu. Bukênkè abu, bwà musangu wàbù pààbù wa kumpàla wà kumweka bantu bitwile, bwimane ànu mwaba ùmvwà nsanganyibwa awu; bu pa díbà ìbìdì jaajaaja wa mu mapingaja, ànu lwà ku cilamba menemene aku, ànu lwà kwinshi kwà Mùsèèsù wa Spring eku, mu màyì emu. Mpindyewu, aci's nkukaadi bidimu byàbùngì, byàbùngì menemene. Nènku ànu menemene cyàkambaCi aci, ncyenzeke, mu katoba ne katoba.

⁶¹ Mwanèètù wa balùme ewu uvwa ungambila, mu dindà emu. Ùvwa musele mwànà wa bakàjì kampànda wa mu èkèleeziyà emu, mushikankundè wà Mwanèètù wa bakàjì Noyes. Kàdi ncyena mumanye to, ngeela meeji ne nsongàalùme. . . Ùdi kaaba aka anyi, Mwanèètù Autry? Ncyèna mumanye to. Yèyè ùvwa wa ku San Antonio. Ncyèna mumanye ní ùdi kaaba aka anyi kènàpù to. Yèyè's ùvwa kaaba aka mu dindà emu. Ne ùvwa undondela. Ngeela meeji ne ùvwa nkakwëndè mulùme, mu masangisha awu, ùvwa upaluka biseki kacya bààmulela, ne kulwabo nendè kuntwaku.

⁶² Aci civwa Cyàkumpàla, mbangilu wa mudimu wà bwambi, pààkambaCi ne cidi, dijingulula adi, kutèeka cyanza cyàbò pa cyànyì, ne civwà mwà kwambiibwa aci ncivwa cifwànyìne kwikala civwàci. Ne mèmè kunwambila, ne bààbùngì mbantèmù dilòòlò edi, bàà ne nebyenzeke ne mèmè nèmmanye ne munsokòntò mene wà mu mwoyi wàbò. Nudi bavùluke aci's, kumpàla mene kwà kwenzekaci anyi? Bidimu bitwe ku bitaanu anyi bisambòmbò pashìishe, aci cyàkenzekà; mu Canada mwàmwa, bwà musangu wàci wà kumpàla, ne cyàkenzeka. Pashìishe kwambaYe ne: "Bu wèwè mwa kutùngùnuka ànu ne kwikala ne meeji matòòke, necitùngùnukè ànu ne kuya kumpàla." Nènku mpindyewu cintu Ciiisàtù cikaadi cyenzeke, nwamònu's, citùngùnukè ànu ne kuya kumpàla.

⁶³ Ke kwambaye ne bààkalwa ne tatwëndè mu mulongo amu, ne kumwambilabo bwà ciseki eci, ne bikwàbò, ne kwenzekaku disambila bwèndè. Nènku aci's nkukaadi bidimu dikumi ne bisambòmbò, ngeela meeji ne mmwòmò, kukaadi bidimu bitwe ku dikumi ne bisambòmbò anyi dikumi ne mwandamutekète. Nènku ùdi wàmba ne kacya ànu díbà adi kàtukù muumvwe mupenyi wàci to. Nènku yèyè ùdi ne bidimu biipacila ku makumi mwandamukulu ne bitaanu menemene, ne kacya kayiku ne mupenyi to kubangila ànu piine apu. Ncinyi aci? "Yesù Kilistò umwèumwè awu makèèlèlè, leelù, too ne kashidi."

⁶⁴ Margie Morgan ùdi mu nzùbu emu anyi? Mwanèètù wa bakàjì Margie Morgan, inàbànzà uvwa mudya yònsò kùdì kansèrè; munganga. Mbanganyì bàdi bavùluke Mwanèètù wa bakàjì Morgan? Yèyè mwikale kaaba aka, kèna mwà kubwela to. Yèyè awu ùvwa wondopangana. Nudi numòna's, pa mukàndà wà beena kansèrè bàà mu Louisville, mukàjì awu's ukaavva mufwe kukaadi bidimu bitwe ku dikumi ne bisambòmbò, anyi dikumi

ne mwandamutekète, pa mukàndà wà meena à beena kansèrè mu Louisville.

⁶⁵ Jim Tom Robertson, ndumbùlùlà awu, ndumbùlùlà mwena Kilistò awu, pàakumvwaye bwalu abu, kuyaye ku Lùpitaadi lwà ba-Baptistes aku, bwà kukenketa bwà kumòna ne ncyà bushùwà anyi, bwalu tatwëndè ùdi mu kasumbu kàà balombodi, mulubuludi mu Lùpitaadi lwà ba-Baptistes alu. Ki kutangilabo bwalu abu, nènku mukàjì awu uvwa ne cyà kwikala mumane kufwà, kukaadi bidimu. Kàdi's ùdi munkaci mwà kwondopa ku Jeffersonville, mu lùpitaadi. Pààkiimanaye ànu kaaba aka, pavwabi bikèngela bwà kwikalabo bamukwate, kàyì nànsha mu yèyè mwine to. Kàdi civwa ng'EMU MMÜDÌ MUKALENGE WAMBA, kadi's nyèyè ewu ne mwoyi. Wàkaya ku dyondopangana, mu Louisville.

⁶⁶ Ne mwabilaayi kampànda lwà kwìnshi eku, lwà pa Schimpff's Candy pàpa. Mukalenge Schimpff ùdi mwab'ewu dilòlò edi anyi? Ndi muswa bwà yèyè kucilonda, pìikalaye kaaba aka. Sonny Schimpff, muntu munène mupàyàmè's. Misangu mivule pàmvwà ne ciibidilu cyà . . .

⁶⁷ Ndi ngumvwa bibi bwà kwamba eci's, kàdi's mbulelèlà. Papa uvwa ne ciibidilu cyà kumpa mèyà dikumi mèmè mukwate mudimu lumingu lujima, nènku mvwa mwà kulwa mu cimenga ne ngèyeka dikalu dyànyì pabwìpì ne kwà Mwanèètù Mike Egan kwàka, umwe wa ku balubuludi mwab'ewu. Ne Jimmy Poole, ngeela meeji ne mwanèndè wa balùme ùdi kaaba aka dilòlò edi; Jim ne mèmè, ne Earnest Fisher, nènku tuvwa mwà kupweka mu cimenga mwàmwa, ne tuya kamòna sèndèmà bwà cicyele cimwè cyà mèyà ataana, nènku tuvwa ne ciibidilu cyà kumòna bimfwànyì byà kabìyi byàkula mu tulòndò abi's. Tuvwa bânà bakesè, biikale tubijinga's, ne bidimu bitwè ku mwandamukùlu, dikumi. Tuvwa ne William S. Hart awu's. Bààbúngì bàà kunùdi nwènu balumyana kanwena bamuvùluke to, munàyi wa kale awu. Bimfwaànyì byà kabìyi byàkula's; wa bwalu ncivwa nànsha mwà kubala to. Bivwa binkegela ànu ngikalà mbandila bivwa bipitakana abi. Ne bivwa bikèngela bwà kuciteelabo ku dileeta ku dileeta, nènku ncivwa mwà kucibala to, kàdi mvwa mwà kubandila civwaye wenza aci.

⁶⁸ Nènku mvwa mwà kwikala ne cicyele cimwèpele cyà pamutu. Kàdi mbanganyì bàdi bavùluka kupetaku crème wa dibwe wa dyeyà dimwè? Èyo. Mvwa mwà kusumba crème yisàtù yà dibwe, ne mbòmbò yà mikunze ya mèyà àbìdi. Ncivwa mwà kulama crème wa dibwe awu to, pa nànku mvwa mwà kuyidyà's. Nènku kusumba mbòmbò yà mèyà àbìdi, s'mmifwànyìne kwikala ne bujitu bwipacila cyà binaayi cyà kilò wa bintu abi's. Nènku Schimpff nguvwa ubyènza. Nènku mvwa mbwelamu, ne nsòmbela lwà paanyimà ne mbandila William S. Hart.

69 Nènku mulumyana wa citende ewu, mukulumpe kúndi ndambu, kupetaye disaamà, divwa bamanyi bapiluke bataanu bàà mu Louisville bamulekele naadi, ne bujitu bwà kilô mitwe ku makumi abidi, kàdi mwikàle ùpùnga ne lufù. Mandamu Morgan nguvwa umwondopa. Nènku yèyè ùvwa mu ngiikadilu wa mùshindù awu! Ùvwa ne bintu búngì cyaàààà; bisùlùsùlù byèndè bikaavwa bidìikè, muminu wèndè mukunya wònsò. Tubòko twèndè tukesè atu tushààle bunène bu *nùnkù*, nènku yèyè uvwa mulàlè mwaba awu, ùpùnga ne lufù.

70 Nènku bàvwa bangàta Mandamu Morgan ku mudimu bwa kulwa kumubeeja. Ki kumwambilaye ne: “Musangu kampànda mvwa nsaama kansèrè,” ki kubangaye kumulondela.

71 Yèyè ne: “Ùdì wamba nnganyi, Billy Branham? Mona’s,” yèyè ne, “nkaadi mumusùmbishesùmbishe mishikì ne mishikì yà mbòmbò mikunze ne crèmes yà mabwe.” Yèyè ne: “Ndi ndikonka ní ùdiku mwà kulwa bwà kunsambidila mèmè ewu anyi?” Ki mèmè kuya bwà kasambidila Junie Schimpff.

72 Nènku mpindyewu wèwè muswe kuyiikila nèndè, n’Schimpff’s Candy lwà kwinshi eku, ànu ciibi cìdì cilondele eci, anyi ciibi ciibìdì kuumukila ku LeRose Theatre, kwinshi kwà mùsèèsù eku. Kwà Schimpff Candy, nwènù bònsò mwab’ewu s’nudi bamanye ne mpenyi. Ekèlekèle, s’ncyà kale ne kalèlèlè bwà munu mu Jeffersonville emu.

73 Nènku pavwaye mulàadika mwab’awu, ùpùnga ne lufù, ne bamanyi bapiluke bataanu bamupeesha ànu mèmè naka bwà kwikalayè ne mwoyi. Cìvwa ng’EMU MÙDÌ MUKALENGÈ WÀMBA ne: “Kwàkufwà to; kàdi neùnsùmbishe kàbìdì mbòmbò mikunze, ku cibasà cyà cisumbishilu aku.” Ntàntà mule . . .

74 Mvwa mumanye ne ùkaavwa muumvwe bìmpè, kàdi nkàavwa mucipwe mwoyi kukaavwa ntàntà mule. Nènku mukàjàànyì ne mèmè tuvwa twenda tupweka bwà kusumba ndambu wa mbòmbò, patwàkafikà muneemu mu Noël. Nènku mmunyi, ncyèna mumanye, mutuvwa batùma meeji ku Schimpff’s. Bwalu, pa ciibidilu, uyààya lwà eku ku tùmwe twà ku tufwànkoolo ne kuyipeta, kàdi twetu kwimana kumpàla kwà Schimpff aku’s.

75 Pangàakabwelà, mwanààbo wa bakàjì awu kutangila, kwambaye ne: “Èè, Mwanèètù Branham.” Yèyè ne: “Udi muvùluke Junie anyi?”

76 Mèmè ne: “Èyo.” Nènku ki yèyè awu mwaba awu, muntu munène wa katanku, wa dikàndà, wa mubidi tumatuma.

77 Ke mèmè kwasa lwendu mutangile ku cibasà cyà cisumbishidi aku, kucitangila, kupwekesha mpàla panshi mùshindù ewu. Mèmè ne: “Nèngàngate citùpà cyà kilô cyà mbòmbò mikunze eyi’s.”

⁷⁸ Ki yêyè ne: “Èyowà’s, mukalenge.” Pa nànkù, mwanààbo wa bakàjì bàvwa ne mukàjàànyì. Nènku, ki, kuyìpatulaye.

⁷⁹ Ki mêmè ne: “Mvwa ne ciibidilu cyà kuyìdya, kukaadi ntàntà mule, lwà mu sèndèmâ emu”; kacya ngààlama mutù wànyì mwinyika.

Ki yêyè ne: “Èyo,” yêyè ne, “bànà bààbùngì bàtu bàsùmba yôyì ayi’s.” “Bàcìdi ànu basùmba,” mungààkamba.

Yêyè ne: “Taatù wanyì ngudi muyenze’s, mulongòlòle njila wa diyenza awu’s.” Mêmè ne: “Ncyà bushùwà ne mêmè ntu muyinange be.”

⁸⁰ Mpindyewu, paanyimà pàà yêyè mumane kuyìndongolwela yònsò ne muyimpèeshe, kwambaye ne: “Udikù dijinga ne cintu cikwàbò anyi?”

Ki mêmè ne: “Ncyèna mumanye to,” ki mêmè kujuula mpàla. Kaa, ekèlekèle! Yêyè ne: “Mwanèètù Branham!”

⁸¹ Mêmè ne: “S’ki mbòmbò mikunze, yìngààkakwambidila, ne: ‘EMU MMÜDÌ MUKALENGE WAMBÀ,’ kukaadi bidimu bitwe ku bitaanu.”

⁸² Yêyè ne: “Mwanèètù Branham, mêmè’s ndi mwondopiibwe ànu mu byònsò, kakwenaku nànsha kantu kàmwè kàtàkànyika to. Ndi nguumvwa ne kaalutàtu ndambu mu dicì dimwè.” Ngeela meeji ne ùdi ne bidimu makumi ataanu ne byà mu njila. Yêyè ne: “Ndi nguumvwa ne kaalutàtu ndambu mu dicì dimwèpele, bwalu bàkampèeshe manga à dishipa twìshì bùngì cyanààna pàmvwà muntwamu.” Ngàsà udi ukèmesha wa Yesù Kilistò!

⁸³ Mpindyewu ncyèna ne dîbà dyàbùngì mpindyewu bwà kwamba cikwàbò cintu to, kàdi ndi—ndi—ndi muswè kwamba dîyì edi.

⁸⁴ Mbanganyì bàdi bavùluke bwalu bwà nshìndi? Èyo. Aci civwa m’Mufùndù ùvwà umpanda mutù, mu nsòmbelu wanyì, umvwà nci—ncìvwaku mwà kucyumvwa to.

⁸⁵ Nènku kuvwa mukwàbò ùvwà ùmpanda mutù, ngwà dîbà divwa Mòsà mwà kwambila Nzambi mùshindù mwìmpè kutàmba ùvwa Nzambi mumanye mwà kwenza cintu kampànda, pààkamba Mòsà ne: “Bantu nebàmbè ne: ‘Nzambi Wenù ùvwa ne bukòlè bwà kunùpatula, kàdi kàyì mukumbane mwà kunùlama to,’” nènku Mòsà kudyela yêyè mwine pankaci apu. Pashìishe ki mêmè kulwa kusangana ne, Mòsà, ùvwa n’Kilistò mu Mòsà, mwangate kaaba kàà cisàmbà. Nwamònu anyi?

⁸⁶ Nànkù dîbà adi pa Mufùndù ewu, umvwa nciyiku mene mufwànyine kuyiishapù to ne: “Wèwè mwambile mukuna ewu ne: ‘Tentèmuka.’” Kàdi’s nudi bamanye bwalu bulonda abu, nànkù nèmbulekele. Mpindyewu, ncìvwa nànsha mutàmbe kumanya ne civwa ciya naanyì penyì to. Nènku ndi ngeela meeji ne Mwanèètù Wood ne Mwanèètù Fred, ne bakwàbò abu, bàdi

kaaba aka mu nzùbu emu, bàvwapu pààkenzekà cyòci aci apu, anyi dyàkamwe paanyimà pàà cimane kwenzeka mwaba awu.

⁸⁷ Nènku Mwanèètù Rodney ne Mwanèètù Charlie, bàà mu Kentucky mwàmwa, Mwanààbò ne Mwanèètù wa bakàjì Wood ne bakwàbò bavwapù pààkenzekaci mu Kentucky mwàmwa, ke musangu mwibìdì wàkenzekàci's. Ànu kwamba ne cintu pààci cimweka's, bintu bìvwà kabìyìku to. Nwamònu anyi? Kwakula, dîbà dyònsò, ne kushindika Mifundù, kukankamika.

⁸⁸ Musangu mwisâtù wàkenzekabi ùvwa ng'Hattie Wright. Hattie ùdi kaaba aka dilòlò edi anyi? Aci's ng'Edith... Mbanganyi bàdi bamanye Hattie Wright? Mwanèètù Wood ne mêmè tuvwa basòmbe mwaba awu pààkenzekaci, ne pààkamba Nyumà Mwîmpè ne: "Mupèeshè cidiye muswè," nènku tuvwa twakula bwà bwalu abu, mwàkafika nshìndì ayi ku diikalaku.

⁸⁹ Ki mêmè ne: "Ki, cintu cimwèpele cìdiku, Yèyè ùdi Yèhowàh-Yilè. Ànu pàvwà Abraham dijinga ne cimpàngà cyà mùkòòkò, Nzambi wàkalongolola cimpàngà cyà mùkòòkò aci. Nènku Yèyè wàkalongolola nshìndì ayi. Yèyè ùdi mwà kwamba ànu diyì ne nshìndì kwikalaku, bwalu Yèyè mmufùki, ànu mùshìndù wùm wèwùm wè uvwaYe mwà kwakula bwà cimpàngà cyà mùkòòkò aci amu. Abraham kààkacilombaku to. Yèyè uvwa ànu mutùngùnùke ne kwenza mulambu, kàdi cyàkaleeja ne Yèhowàh-Yilè uvwapù."

⁹⁰ Pangààkambà nànkù, mukàjì mutekète wa didipwekesha... Bwà musangu wà kumpàla ùdicikù cyenzeke, Nkokelu Mwisâtù ewu, pa muntu, uvwa mmukàjì mukesè, mudipwekèshe.

⁹¹ Mwine awu, ùvwa upeta ndola mitwè ku nkama yìbìdì ku cidimu, bwà didyà ne dinwà dyèndè, ki yònsò yìvwàye ùpeta ku budimi bwèndè. Bayèndè mufwè; bânà bàbìdì bakaavwa benze bu bapàmbùke. E kulwaye kufila ndola makumi àbìdì yà musangu, yà ku yòyì ayi, bwà lwibaku lwà Tabernacle ewu's. Nènku Meda uvwa mumpè ndambu wa mfranga mu dindà amu yà kusumba byàkudya, ndola makumi àbìdì, nènku mvwa muswe kumwalujilayi ditùkù adi, pàmvwà kuntwaku, bwà kalù kuyifuta to. Kàdi kavwaku muswe kuyàngata to. Nènku pavwa...

⁹² Ùvwa musòmbe mu ditumba, nènku pangààkambà ne: "Cintu cimwèpele cìndì mumanye, ncyà ne, Yèyè ùcìdi ànu Yèhowàh-Yilè."

⁹³ Ki Hattie mukesè ewu kwambaye mwaku mujaalàme. Yèyè ne: "Aci cìdi ànu Bulelèlè pa bwòbù."

⁹⁴ Nènku pààkambayè nànkù awu, Mwanèètù Banks Wood ewu uvwa umwe wa ku bàvwàpu, cibambalu aci kulwaci bu civwà cyàmba kutùkakana. Kì Nyumà Mwîmpè kwambaYe, Diyì dìm wèdìm wè dyàkaakula bwà nshìndì adi, kwambadì ne: "Mupèeshe cyàlombaye aci."

95 Ki mèmè kwamba ne: “Mwanèètù wa bakàjì Hattie, bu ntèmù kumpàla kwà Nzambi, ki cyôci eci’s. Mpindyewu, piikalaku mpatà kampànda mu meeji èbè, ùlombè cyûdi muswè aci, kadi wêwè kùyì mucipete pa cibànza to, apu kaayi ndi muprôfètà wa mashimi.”

96 Yèyè ne: “Mwanèètù Branham.” Bantu bônso bàvwa munkaci mwà kudila myadi. Yèyè ne: “Cíngààlombà ncinyi’s?”

97 Mèmè ne: “Udi mupèlè, ne udi musòmbèle pa kakùna pààpa, kuyi mfranga to; udi mufwànyine kulòmba ciine aci. Udi ne mwakùnyèbè wa bakàjì mutekète, cikalàbà musòmbè kaaba aka, Edith, utùkaadi basambidile ewu, kukaadi bidimu; udi mwà kulòmba dyondopiibwa dyèndè.” Mèmè ne: “Tatwèbè ne mamwèbè mbakulakaji ne bacyòke; udi mwà kulòmba bwà bwalu bwàbù’s. Cyônso cyûdi ulòmba aci, Mwanèètù wa bakàjì Hattie, ùtangilà mpindyewu ní cidi cyènzeka anyi to, ànu mpindyewu mene.” Ki mèmè ne: “Ûdi ùfùma ànu kudingambila, Dìyì dimwèdimwè adi, dyàmba ne: ‘Mupèèshe cyàlòmbàye aci.’”

98 Ke kukènzakanaye, kwambaye ne: “Néngàmbè cinyi, Mwanèètù Branham?”

99 Mèmè ne: “Amba cidi dijinga dyèbè. Ela meeji ku dijinga dyèbè dyà ditàmbe bunène, udyàmbè.”

100 Nènku bânà bèndè bàà balùme bavwa mene munkaci mwà kukenya ku mènù ne baseka’s. Ki yèyè ne: “Dijinga dyà ditàmbe bunène dindì mèmè naadi ndupàndù lwà bânà bàànyi bàbìdì aba.”

101 Mèmè ne: “Ndi nkupèèshabo, mu Dìna dyà Yesù Kilistò,” ki bôbò kusungidiibwa.

102 Nènku bôbò bàdi ne lulamatu mu èkèleeziyà ewu, ne ku mèèsà à Mukalenge, bânà bakesè abu basòmbè mwaba awu bôwèshangana màyi ku makàsà ne bantu, ne bintu byà mùshindù awu. Twètù bônso tudi bantèmù bàà bwalu abu.

103 Wàkenza disungula dilelèlè. Mamwèndè neikale ne cyà kufwa, nànsha yèyè pèndè, bôbò bônso. Kadi cyàkalòmbayè neciikale cyà Cyèndèlèlè, lupàndù lwà bânà bèndè. Awu ki musangu mwisàtù wàkenzekàci.

104 Musangu mwinâyì wàkenzekàci, s’mvwa mucyùmvwijè kaaba aka musangu wa ndekeelu wúmvwà kaaba aka awu, kuvwa ku mukuna kwàka kuvwa mvula wa cipùpù awu ukungula. Mbanganyì bàvwà bacyumvwe? Kaa, nwènù bônso. Eyo. Mwaba ùvwa mvula wa cipùpù awu ukungula. Ne Nzambi mwikale Mulumbulwishi wanyi mwimane mwab’ewu, ngenda ntulukà ku mukuna aku pavwà . . .

105 David Wood, ùdi kaaba aka mwaba kampànda, ngeela meeji, uvwa mungenzele dyàmpà dyela nyiinyi awu, ne divwa ndyàmpà dyà menemene’s! Ngeela meeji ne ùvwa uteeta bwà kungenzela dyà bwena dingààkenzela papa wendè, kukaadi ndambu wa

bidimu's. Ûwva mwelemù saucisson, ne—ne munyìinyi ne byònsò bisambakaja pàmwè. Nènku mèmè kudijìngila mu mutèèlù wànyì, ke mvula kuloka, ne kushààladi ànu dintamfu dyà lusabusabu's.

¹⁰⁶ Nènku mvwa ngenda ntuluka ku mukuna. Kuvwa cipeepèle cicolè be, mu mùshindù wa nciyiku mene mwà kumòna cyanza cyànyì kumpàla kwànyì to, bikolè be. Nenku ndi mumanye, ànu cintu cimwèpelè, udi unyùngùlùjiiibwa, bwalu cipeepelè aci cidì ànu munkaci mwà kwenza mvùnda.

Mpindyewu kùdi bantèmù kaaba aka, bwà cyòci aci.

¹⁰⁷ Umwe wa kudibo ngumwe wa ku balami bèètù bàà lulamatu, m'Mwanèètù Wheeler. Udi kaaba aka anyì, Mwanèètù Wheeler? Udi lwà penyi? Eyo, ànu apa mene, Mwanèètù Wheeler.

¹⁰⁸ Mwanèètù Mann, muiishi wa ba-Méthodistes wa mu New Albany. Udi mwab'ewu, dilòlò edi anyì, Mwanèètù Mann? Ncyèna mumanye ní ùdipu anyì keenàpu.

¹⁰⁹ Mwanèètù Banks Wood. Udi mwaba ewu anyì, Mwanèètù Banks? Udi mu cibambalu cidì mikàbà yà mèyì yìkwàciibwa. Èyo. Ne—ne David Wood.

¹¹⁰ Ne Mwanèètù Evans uvwapu, ngeela meeji. Mmwòmò anyì, Mwanèètù Evans? Mwanèètù Evans, udi mwimane mweyemene ku cimanu ewu, uvwapu.

¹¹¹ Ne muvwabo baakule ku tudyomba munda mwà matùkù, matùkù àbìdì kumpàla kwà cyòci aci ne: “Cipeepèle cicolè cya nêje cìvwa munkaci mwà kutwà musà mu ditùnga.”

¹¹² Mwanèètù Tom Simpson ùdi kaaba aka dilòlò edi. Pavwaye wenda upweka ufumina ku Canada, kumulombabo bwà kapidici mwab'awu to bwalu kavwa mwà kupicilamu to ne: “Cipeepèle cicolè cyà nêje cìvwa munkaci mwà kulwa.” Mwanèètù Tom, udi mwaba ewu anyì? Udi penyi? Nyèyè ewu, musòmbe ànu lwa apa mene.

Ki mavuba paawu kubànda's. Ki mèmè ne: “Bànà bèètù . . .”

¹¹³ Bantu bònsò kupatuka lubilu lukolè. Kakuvwa muntu nànsha umwe mushààle paanyimà apu to, pa bantu lukama ne byà mu njila paanyimà apu, kakuvwa muntu nànsha umwe paanyimà apu to pa kuumusha kasùmbù kèètù kakesè aku ne mulami wa ngombe, mubàndi wa pa kabalu. Nènku tuvwa ne cyà kushààla.

¹¹⁴ Mèmè kubìikila Mwanèètù wa bakàjì Evans, ne kumwambila bwà kubìikilaye mukàjàànyì ne kumwambila bwà ambile Tony ne: “Mèmè nciyi mupatuke to, akebe muntu mukwabo bwà kuyiisha ku didya dyà dindà dyà Beena Kantu-ku-byanza.”

¹¹⁵ Nènku kuulu kwà mukuna aku ditùkù adi—adi, mèmè kwamba ne: “Mpindyewu pàdi ànu, dimata dikesè dyà mvula dibanga, anyì ní ncinyi ní ncinyi, alukilaayi buludi mu

citùùdilu.” Mémè ne: “Munda mwà tusunsa dikumi anyi dikumi ne tutaanu kanwenàku nànsha mwa kumona byanza byènu kumpàla kwenù to, piikala bipeepèle byà nêjè abi...nèku nekùloke metèlè asambòmbò à nêjè ànu mu katancì kakesè cyanàànà, pa mukuna pònsò apa.”

116 Nèku ke mùshindù ùdi bantu, munùtu nucibale mu cibejibeji, mùtùbo muntwamu ne bàbùtuka, ne bikwàbò byònsò. Kàdi tuvwa bamanye mwà kupàtuka, ne bòbò bavwa bamanye mwaba utùvwà tusanganyibwa, ke twètù kudyùmvwà balombodiibwe bwà kushààla.

117 Nèku ki lwà ku lusongo lwà kakùna aku, pààkabanga cipeepèlè cyà nêjè aci, mémè kutwàdija kupweka. Nèku mwà nsanganyiibwa ànu mu ntanta wa mètres matwe ku nkama mwandamukùlu ne mwaba wùmvwà mémè mubangile awu, ki Dìyì dyà Nzambì kwambadi ne: “Kùdìmukà wàlùkìlè.”

118 Ki mémè kwalukila bu mwàkangambilàYe amu, paanyimà pàà mwindile katancì ne ndya dyàmpà dyela munyìnyì òvwà David mumpèèshe adi, ne kwalukila kuulu aku e kusòmbela panshì.

119 Nèku pàmvwà musòmbè mwab’awu apu, ne lupeepèlè alu luvwandakaja ne lutuuta, nsongo yà micì yituitakanangana, ne mabwe à mvula ne nêjè biikale bìbuuka mùshindù awu, Dìyì kwambadi ne: “Mémè ndi Nzambì wa bufùki.”

120 Mémè kubandisha mèsù muulu, kudyambidila ne: “Aci civwa penyì? Civwa ndupeepèlè, pamwàpa.”

121 Yèyè kwamba ne: “Mémè ngwàkafùka maulu ne buloba. Mémè ngwàkabàtamija mpeepèlè mikolè pa mbù,” ne kutùngunukaye ne kwakula.

Mémè kulandapuka e kutùùla cifulu.

122 Ki Yèyè ne: “Akula ànu ne mvula wa cipupu ewu, ne neàlekelè. Cyònsò cyùdi wèwè wamba aci, ki ciikalà mwà kwenzeka.”

123 Ki mémè kwamba ne: “Wèwè mvula wa cipupu, lekèlè. Nèku, wèwè dîbà, kenka ànu bu pa ciibidilu munda mwà matùkù anaayi, too ne mutwàpàtuka mwab’ewu.”

124 Nèku ncìcituula ànu dîyì, ke mabwe à mvula, nêjè ne bikwàbò byònsò kwimanabì. Mu kasunsa kàmwè anyi túbìdì, dîbà dyà dyòsha bikolè dikaavwa dìntwila nsèsè pa mwongo. Mémè kumòna lupeepèlè lùtuuta nùnkù ewu, lùfùmìna ku Nord, lwenda lùpweka. . . Ndi nswa kwamba ne kuumukila ku Esètè, lùfùmìna ku Esètè. Luvwa luumukila ku Wesètè; mpeepèlè kushintuluka ne kwalukila mùshindù ewu. Ne matutu, byenze bu cintu cyà bukishi, kubandawu mu lupeepèlè, ne dîbà dikaavwa dyèla nsèsè mu tusunsa tukesè.

125 Pashìishe Mukalenge Yesù kwakula naanyì pashìishe ndambu, bwà mukàjàànyì kuntwaku, bu munùdi bamanye, bwà

kúmvwà muye aku. Kacya ncitùku mwanji kwikala kumbèlu bwà mufikilu wa dibàkà to, pèètù's tudi basèlangane kukaadi bidimu makumi àbìdì ne bìbìdì. Mufikilu wà kumpàla, wà nzanzanza, wà dibàkà dyètù, mòna's, mèmè kuya nendè mu lwendu lwà bulembi. Bwalu, ncivwa ne mùshindù wà kungwija mfranga bwà kwenza lwendu lwà bulembi, ne—ne—ne kuya mu dipengama paanyimà pàà dibàkà, kàbìdì to, pa nàнку mèmè—mèmè kwenza bu mubìsange pàmwè. Ki nàнку awu, dîbà adi, kubangila ànu musangu awu ndi ànu mu kutà. Bidi bintwa ku mwoyi mùshindù ûntù mumwenzela maalu.

Mpindyewu, aci civwa mmusangu mwinâyì wàkenzekàci.

¹²⁶ Mpindyewu cintu kampànda cîndì—cîndì njinga kwamba ncyôci eci, nènku ndi ne cyà kwamba menemene ànu bulelèlè. Kukaadi bidimu bitwe ku dikumi ne bisambòmbò mvwa nsanganyibwa mu Californie ne Mwanèètù John Sharrit, nènku mvwa ngenza disangisha. Nènku Meda ne mèmè, ne Mwanèètù wa balùme Sharrit ne Mwanèètù wa bakàji Sharrit, ne bakwàbò, tuvwa basòmbèle mu cilààla-beenyi. Nènku muntu kampànda dyèndè Paul Melikian, utu wimanamanaku mwab'ewu mu Tabernacle ewu emu misangu mivule; ng'Armenien mubanji. Ne mukàjèndè kulelaye mwànà ku Fresno, mu Californie, mùvwàbò basòmbèle mwàmwa; e kupwekaye muneemu, kulwa ne mukàjèndè, ne kumbiikilabo ku cilààla-beenyi aku, bàmba ne: “Ndiku mwà kutwàla mukàjàànyì anyì, Mwanèètù Branham?”

Mèmè ne: “Èyo, udi mwà kwenza nàнку.” Ditùkù dyàkalondà, mvwa nya ku Catalina.

¹²⁷ Ki kulwaye ne mukàjèndè awu, nènku inàbànzà mutekète awu uvwa usaama bikolè be! Ki mukàji kutangila. . . Mèmè ne: “Tentèkà cyanza cyèbè pa cyànyì apa, Mwanèètù wa bakàji Melikian,” mèmè ne, “tumònebi Mukalenge newàtwambilaku bwalu.” Nènku mmwenze ànu untenteka byanza, mèmè ne: “Kaa, mijilu mmyùle bikolè.”

Mukàji awu ne: “Ncyèna bu udi ne cimanyinu nànsha cìmwè to.”

¹²⁸ Mèmè ne: “Wèwè tangila.” Mu matùkù àbìdì, bavwa munkaci mwà kumwondopa bwà mijilu myùle ayi.

¹²⁹ Bu mudi Jim Poole mwànà ewu, mwanèndè wa mu dibòko. Dîngà ditùkù kubwelaye ne disaamà dyà mwoyi adi, mwàkelabo meeji, nènku civwa ndisaamà dyà mfwènke. Ki mèmè kumutentekela cyanza. Mèmè ne: “Mutangilààyì bwà matùkù makesè; ùdi ne kantembele. Nekàpatuke. Mmubidi luuya.” Mvwa mutwilangane nendè dilòlò dishààle. Kwambaye ne, kantembele nkamupatuke, mubidi mujimà. Nwamònu anyi?

¹³⁰ Mpindyewu, mvwa nyiikilangana ne Mwanèètù wa bakàji Melikian, bwà bwalu bwà cyanza. Yèyè ne: “Aci's ncintu cidi

cikèmesha, bwà kucitangila, Mwanèètù Branham.” Yèyè ne: “Bitu bikwata mudimu pa cyanza cyònsò anyi?”

¹³¹ Mémè ne: “Èè, kwòkù kwikale cintu kampànda cibi kùdì mubèèdì awu.” Mémè ne: “Mpindyewu tàngila, néntentekè cyanza cyànyì,” bààbùngì bàà kunùdì biimane bacibandila, kàdì kacỳàkenza nànkù to. Mémè ne: “Mòna, mukàjàànyì kèna ne bubèèdì to, kuteekaye cyanza cyèndè . . .”

¹³² “Tàngila kuneeku, munanga wanyi, tentèka cyanza cyèbè pa cyànyì apa.” Mmusòmbe mwaba awu, mukàjàànyì. Kutentekaye cyanza cyèndè pa cyànyì. Anu wenza nànkù, mémè ne: “Udi ne cyujà ku luseke lwàbakàjì lwà matrice. Udi ne disaamà dyà bantu bakàjì.”

Ki yèyè ne: “Mémè ncyèna ngumvwa dishìlangana nànsha òmwè to.”

¹³³ Mémè ne: “Kàdì’s ke cyùdì naaci.” Becky ùvwa ne bidimu bìbìdì. Mwanàànyì wa bakàjì udi ufuma ku dimba, kukaadi katanci ewu, ùvwa ne bidimu bìbìdì.

¹³⁴ Bidimu bikwàbò bìbìdì, Sarah ewu pwàà, nènku pavwà . . . Kumusabulabo mwànà awu. Ki mémè kukonka Ngàngàbukà Dillman, ngàngàbukà wètù wa mu—mu Corydon amu, bwà ne: “Pawàmupanda, utangileku ku luseke lwàbakàjì lwà matrice alu,” kwenzaye nànkù.

Yèyè ne: “Kakwèna cintu cibi nànsha cìmwè to, cìmvwà mumòne.” Mémè kutenteka cyanza cyànyì; cìcìvwà ànumu.

¹³⁵ Bidimu binaayi pashìshe ki kulwaku Yòzefù. Mémè kumulomba bwà yèyè kutangila cyàkàbìdì. “Kakwena cintu cibi to, ànu mumvwa mumòne amu.” Ntèèkapù cyanza cyànyì; cìcìvwà ànumù. Ki twètù kucipwa ànu mwoyi.

¹³⁶ Mpindyewu eci ncintu kampànda cìdì cìkèngela bwà mémè kwamba. Ncyèna muswè kucyàmba to, kàdì cìdì ànu ne cyà kwenza bulelèlè, nwamònu’s, nènku’s ki cinùdì nukeba ncyòcì aci. Amba ànu bulelèlè misangu yònsò, nànsha kwenzeke cinyi.

Bidimu kupitabi, katùvwakù bacimòne nànsha.

¹³⁷ Nènku ndi ngamba nùnkù ewu, kì mbwalu yèyè mmusòmbe mwaba awu to, bwalu ntu ncyàmba padiye kayipu to. Ne nwènù nudi bamanye nànkù. Ncyèna ngiitabuuja ne nkufwànyine kwikala mukàjì mutàmbe bwìmpè pa buloba apa kupita mukàjàànyì to, ne ndi ntekemena ne yèyè ùdì ushààla ànu misangu yònsò mùshindù awu. Ne ndi muswè kwikala bayèndè wa lulamatu, ne ndi ntekemena ne nsongààlùme yònsò mu nzùbu emu, pàaselaye, neàpete mukàjì bu mukàjàànyì ewu. Ncyèna mumanye ne netwashààla ne mwoyi mùshindù awu too ne ku dìbà kaayi to, kàdì ndi ntekemena ne matùkù ètù ònsò à mwoyi à pa buloba. Tudi ne disànkà diyiila ne panshi pamwè. Nzambì ke wàkangàmbila bwà mémè kumusela.

138 Piine apu, mukàjì neebè kàyi mumanye to, mvwa nkeba bwà kubenga kumusela; kabìyi ne mbwalu ncivwa mumunange to, kàdi mbwalu ncivwa ngeela meeji ne mvwa mukumbane mwà kumukumbajila majinga èndè to. Kàdi ùvwa mukàjì mwîmpè, ne mêmè ncivwa mumukumbanyine to.

139 Ki kupatukaye bwà kukasambila, ne kubuululayè Bible. Nènku ngeela meeji ne...Yèyè kwamba ne: “Mukalenge, kacya ncituku mwanji kwenza cyôci eci kwônsò eku to, kàdi mpaanyiku Mufündù wikalà mwà kunkwàcisha. Byôbì bikèngela bwà mêmè kumupwa mwoyi, ndi ne cyà kucipwa mwoyi.” Kubuulula Bible...

140 Nènku kupatukaye mu kaacisaasa kakesè e kusambila. Nènku pàakabuululaye Bible: “Maalaki 4. Mònaayi, Ndi nnutumina Eliyà muprofeta kumpàlà kwà...” Aci civwa—aci civwa nkukaadi bidimu makumi àbìdì, nciyi mumanye kantu nànsha kàmwè pa bidi bìtangila mudimu wa bwambi wa ditùkù edi to. Nènku mvwa...ncivwa mwà kwikala...

141 Mvwa mudyadije lwà ku musulu kwàka. Ki Yèyè kumbiisha—kumbiisha, dilòlò kampànda, ki mêmè kuMuumvwa mwimane mwaba awu lwà ku ciibi aku. KwambaYe ne: “Nda ukamwagate, ne dibaka dyèbè nedyènzeke mu ngondo wa Kaswà-Mansènsè ulwàlwa ewu, mu dyà matùkù makumi àbìdì ne diisàtu.” Nènku ke cyôci aci menemene cingàkenza. Nènku tutu basòmbe ne disànka. Ku ngàsà wa Nzambì, kacya katùtùkù banji kutànda to. Yèyè ùtu ànu munanga wanyì.

142 Dìngà ditùkù mêmè kubwela. Nènku byàkakèngela bwà yèyè kukolesha bânà aba nkaayendè; mêmè muye mu mudimu wa bwambi. Ki mbakàjì bààbùngì bavwa mwà kutwala aci to; nudi bamanye aci’s, s’mbifwànyine kubàkolela’s. Ki dibà adi mêmè kubwela, e kwambaye cintu kampànda. Tudi ne Joseph lwà paanyimà pàapa, ne yèyè ùdi...Ncyà bushùwà ne yèyè mmwànà wa balùme! Nènku yèyè ke udi mufikishe mamwèndè ku dipeta mvyà ku mutù, pàmwè ne mêmè’s. Pa nànkù yèyè uvwa ànu mwànà wa balùme wetù ewu’s, nenku uvwa mwenze cintu kampànda cyà cibì be. Ki mêmè kumwambila...Yèyè kungambila ne: “Bill, anji mubàbàjeku’s.”

Mêmè ne: “Ncyèna ànu ne dikima to.” Nwamònu anyi?

143 Ki yèyè ne: “Èyowa’s, bu wikalaku ne cyà kubitwala’s,” ne kuntucilaye ciibi mwisù.

144 “Èè,” mêmè kudyambidila ne, “kakwena bwalu to. Kakwàcìkwètù kakàvwa ne meeji à kwenza nànkù to.”

145 Mêmè kupàtuka ànu bwà kutùngùnuka ne kusukula màshinyì àànyì. Nènku ndi mwenze ànu mfika kuntwaku, Nyumà Mwîmpè kàvwa mwanayisha cyôci aci to; KwambaYè ne: “Nda ukamwambile,” ngeela meeji ne n’Kulondolola Mwibìdì, nshapita wa 22. Ncyàkaya to. Mêmè kwela meeji, dyàmbedi, mêmè ngudi ànu mudifwànyikijile aci. Mêmè kutùngùnuka ànu

ne disukula. Ki Cyôci kwamba kàbìdì ne: “Nda ùkamwambilè abale eci.”

¹⁴⁶ Ki mêmè kubwela kwangata Bible, e kucibala. Cìwva mmwaba ùwva Mò- . . . anyi Miliyàmà, muprofeta mukàji awu, museke mwanààbò wa balùme, Mòsà, bwà diselà dyà mwànà wa bakàji wa beena Éthiopie, kàdi Nzambì kavwa mucinange to. Ke Yèyè ne: “Bivwa kwikala bitàmbe bwimpè bu tatwèndè mumutwile matè mwísù, pamutu—pamutu pà—pà kwenza ciine aci.”

¹⁴⁷ Pa nàнку, ke Miliyàmà kupatukaye nsudi, pambidi pajimà. Ki Aalona kulwaye, kwambilaye mwanààbò wa bakàji awu, kwambaye. . . anyi kulwaye kwambila mwanààbò wa balùme, kwamba ne: “Údi munkaci mwà kupùnga ne lufù, ne nsudi.”

¹⁴⁸ Ki Mòsà kubwela lubilu bwà kumusambidila, ku cyoshelu. Nènku pààkenzaye nàнку, Dikunji dyà Kapyà dyàkapwekà, Nzambì. Yèyè ne: “Nda ukamubiikile yèyè ne Aalòna, ne ulwe naabo kaaba aka.” Ne Aalòna uvwa mu bwalu abu, yèyè pèndè. Ki Yèyè ne: “Ubabiikile balwe mwab’ewu.”

¹⁴⁹ Yèyè ne: “Kwòkò kwikale muntu munkaci mwènù,” Nzambì munkaci mwà kwakula naabo mpindyewu’s, “udi wa nyumà, anyi muprofeta, Mêmè Mukalenge nènDimanyishè kudiye. Nèngààkulè nendè mu bikèèna—kumòna, ne nDibuulula kudiye ku bilòòta, ne—ne mbuulula bilòòta, ne bikwàbò.” Yèyè ne: “Kàdi musadidi Wanyi, Mòsà, kakwenaku muntu nànsha umwe mu buloba bu yèyè to.” Yèyè ne: “Mêmè ndi ngàakula nendè mpàla ne mpàla.” Yèyè ne: “Kanùtu nuciìnaku Nzambì anyi?” Nwamònu’s, Nzambì kavwa mucinàngè to.

¹⁵⁰ Èè, pàngààkamònà aci, mêmè kubwela lubilu mu nzùbu. Nènku ùwva usanganyiiwba mu cibambalu cikwàbò. Mêmè kukookola ku ciibi. Úkaavwa mudinjidile. Ki mêmè kumwambila ne ndi njinga kuyiikilangana nendè. Ki mêmè kubwela muntwamu ne kuyiikilangana nendè, kuteeta bwà kumwambila cìwvà bwalu. Mêmè ne: “Munanga wanyi, s’udi ànu mumanye mündi mukunange, kàdi Nzambì kavwa muswe aci to. Kabivwa bikèngela wèwè kwikala mwambe aci to.” Dyàkamwe paanyimà pàà aci, yèyè kupeta lutàtù mu luseke lwèndè amu.

¹⁵¹ Twètù kuya nendè kwà ngàngàbukà muneemu mu Louisville, Ngàngàbukà Arthur Schoen, ki kupetaye cyùjà cyà kansèrè ku citwàdi cyà mayi cyà ku dyàbakàji aku, cìmvvà mupete bidimu dikumi ne bitaanu anyi dikumi ne bisambòmbò kumpàla aci. “Cyùjà cyà kansèrè ku citwàdi cyà mayi cyà ku dyàbakàji, bunène bu bwà musà.”

Mêmè ne: “Abu bwalu kàbìdì bùdi bishi’s, ngàngàbukà wa yààyà?”

¹⁵² Yèyè ne: “Twänji tumònebi cidi cyenzeka. Walukile nendè cyàkàbìdì munda mwà ndambu wa ngondo, ngondo mitwè ku yibìdì anyi cintu bu nàнку.”

153 Twètù kupingana nendè. Cikaavwa cidyunde, cyumuke ku bunène bwà musà ciipacila ku bunène bwà cimuma cyà didimà dyà mpusù. Yèyè ne: “Mbitàmbe bwímpè bwà kucyumusha’s; cyòci cidìdinge citekètangane cìdi mwà kulwa cyà lufù.”

154 Ki mèmè ne: “Èè, ekèlekèle,” mèmè ne, “tu—tuyàaya ku Tucson. Mukalenge mmuntume ku Tucson.”

155 Kumutumaye kwà mpilù mu màsaamà à bakàji; awu ne bwàpita ngàabutama. Pa nàнку ùvwa ne cyà kwikala muyiikilangane nendè bwà mudimu wànyì wa bwambi, bwalu yèyè. . . Ngàngábuka mpilù mu màsaamà à bakàji awu kwambaye ne: “Nebikèngele bwà kucyùmusha’s.” Ki yèyè ne. . . Twètù kumwambila ne tuvwa tuya ku—ku Tucson. Yèyè ne: “Èè, mèmè’s ndikù ne ngàngábukà mpilù, mulunda wanyi munanga. Kale wàwa mvwa musòmbèle mu Tucson.” Yèyè ne: “Nènnùtùm kudiye.”

156 Ki kufundayè kabèji ne kumutuminaku, e kwambaye ne: “Mandamu Branham udi inábànza wa maalu mímpè,” ki kutùngùnukaye mùshindù awu. Yèyè ne. . . Kumutuminaye bunène bùvwà cyùjà aci, ne bikwàbò. Cikaavwa cyandamuke cyùjà dîbà adi’s; ne kwambaye bunène bùvwàci. Ki yèyè ne: “Ndi mumanye. . .” Nudi bamanye’s, yèyè uvwa mumanye ne yèyè. . . Ngeela meeji ne yèyè wàkeela meeji, kungiinyika ne “mwondopyanganyi wa kudi Nzambi.” Ki mwèndè mwònsò mùvwaye pèndè mumanye bwà kucyàmba. Kàdi yèyè ne: “Ndi mwanyishe bwà ne—bwà ne cìdi mwà kuumushiibwa, ne bidi bikèngela nàнку. Byòbi bikèngela bwà cyumushiibwe, ucyumushe.”

157 Kàdi civwa citeeta diitabuuja dyètù. Nèнку ku musangu ne ku musangu tuvwa tusambila. Nèнку patùvwà tutàmba kusambila, cyùjà kudyunda kupita, mu mùshindù wà kufikaci ku dituntamana cimweka ne mu luseke lwèndè amu’s. Twètù kushààla bapuwe naaci; ndambu mukèsè wa bantu mwab’ewu bavwa bacimanye; biikale bateeta bwà kumòna civwa mwà kwenzeka. Kutùngùnukaci ànu nàнку.

Ndekeelu wa byònsò, pàngààkafùminà ku Canada, kùmvwà mushiye. . .

158 Mukalenge kwenza bwà mèmè kufikisha cisàmbà cyà ba-Indiens aci kudi Kìlistò. Nèngàlukilè bwà kubàbàtiiza, mu Dîna dyà Mukalenge Yesù, mu movù wà bintu bitoloka ewu, bu Mukalenge mwà kwanyisha.

159 Mpindyewu, mèmè kwalukila, nèнку dîbà dikaavwa dikumbane bwà yèyè kuya, pàmvwà nsanganyibwa mu New York. . . anyi lwà kwìnshi eku bwà kupeta dikwabo dipand-. . . bwà kupeta dipandiibwa adi, anyi bwà kucikenketa bwà musangu wa ndekeelu. Mèmè kutùngùnuka kuya ku New York. Nèнку pàngààkaalukilà, mèmè kwimana mwab’ewu, nèнку mèmè kubànda. . . Paanyimà pàà mèmè mumane

kwenza disangisha mwab'ewu, disangisha dyà ndekeelu, mèmè kubandaku ne kumubiikidila ku tèlèfonè kwà Mwanèètù Wood.

¹⁶⁰ Ki yêyè ne: “Bill, ncyèna nànsha mwà kutwala ne bilàmbà byànyì bilengèpù to.” Cikaavwa ànu cipatuke mùshindù ewu ku luseke lwèndè aku dîbà adi. Ne mukolo wèndè wà lwine luseke alu, kavwaku mene mwà kuwùtwa panshi to, ki lumingu lubyalùbyalè lwakapicilaye. Mpindyewu mmusòmbe mwab'awu, munkaci mwà kuntéèleja. Lumingu lwà lutàmbe bubi lùwàyeku mupete alu. Ki yêyè ne: “Bìkèngela nye, ku dyà bwàbwa, bwà diteeta adi.”

¹⁶¹ Mèmè kudyambidila ne: “Éyì Nzambi wa yààyà, bôbò bacyumushe, aci's necitupangishe mwà twètù kwalukila kumbelu mu Noël, wa bwalu mèmè mumane kwambila bantu ne nêngiikaleku.” Ki mèmè ne: “Cikondo kaayipu's wè! Kaa, ekèlekèle!” Mungàakadyambidila.

¹⁶² “Mwambile ne, yêyè ne cyà kukupanda, èè: ‘Anji indilebi kakesè, too ne paanyimà pàà Noël.”

¹⁶³ Pashiishe mèmè kubanga kudyambidila ne: “Ncifwànyine kulwa cyà lufù's.” Nènku lwà paanyimà apa, nudi bamanye's, aci's ncintu cibì, cyôci cyàlukila mu twonyi. Cyôci citungùnuke, cilwè cyà lufù, necikushebèyè. Ki dîbà adi mèmè kudyambidila ne: “Cîndi mwà kwenza ncinyi?”

Ki Meda kwambaye ne: “Èè, mpindyewu, wèwè ùmbiikile's,” mwàkambayè.

¹⁶⁴ Ditùkù dîngààkabwela mu Shreveport, divwà difwànyine kwikala ditùkù dyàkalonda, pângààkabwela mu Shreveport, byàkakèngela bwà kuyayè ku mateeta awu. Ki kuyayè ku... Mandamu Norman kuyayè nendè, Mwanèètù wa bakàjì Norman; nwènù bônso's nudi bamumanye, bantu bàtù balwa ku Tabernacle eku abu's. Úvwa ùkamufila, kwà ngàngàbukà mupilùke ewu. Ki yêyè ne: “Anji indilabi tung too ne pawapeta dyèbè dilòdòlò dyà kumpàla, ku—ku...kadi pashiishe walukile.” Bwalu, bwalu dishiilangana, ndyà ntanta wa mèbà àbìdì pàtupù. “Dîbà adi umbiikile pawikala mwalukile, paanyimà pàà masangisha, nènkwàmbilè cidi cikèngela bwà mèmè kwenza.”

Ki mèmè ne: “Éyo.” Pa nànkù, mèmè kutungùnuka.

¹⁶⁵ Nènku pàakacyabu mu dîndà, kumpàla kwà mèmè kuumuka, mvwa ne cyà kukangata Billy ne Loyce. Bùbìdì bwàbò mbasòmbe kaaba aka. Ne misangu yònsò . . .

¹⁶⁶ Tutu ne katambwa kàà kale kàakatwelelabo ciseba kùdi Mwanèètù Palmer, ànu matùkù àdì panshi aa, ne tutu misangu yònsò tudyungwijilaku bwà kusambila, dîbà dyònsò ditùtù... Kaa, cyenza bu, Kaacibasa's, nudi bamanye's, katambwa kàà kuteekela makàsà. Dîbà dyònsò ditùtù tudyungwijaku bwà kusambila, pântù nya ku masangisha, tutu tulòmbe Nzambi bwà atukwacisheku.

167 Nènku mvwa nsanganyiibwa kuntwaku, ndambu wa matùkù, nènku mvwa—mvwa ànu mushààle nkààyaanyi. Nzùbu awu; bânà baye, ne mukàjì muye. Nudi bamanye's, bààbùngì bàà kunùdì mbamanye ne nkaadiku mupicila mu byà nàнку abi musangu kampànda, byà kwalukila ku nzùbu wa munda mutupù abi; kàdì mukàjàànyì awu yêyè, ngakamujiika, Hope. Nènku mpindyewu cìvwa cyàmba kupingana kàbìdì. Ki mèmè kupweka ku binù, kudyambidila ne: “Èè, nèngǎnjì kusambila kàdì pashiishe nye nkangate Billy ne Loyce, bwà tütungunukè.”

168 Nènku pàngàakatwa binù bwà kusambila, mèmè kwamba ne: “Mukalenge, mbansamina mwoyi mu dindà emu, mwab'ewu.” Mèmè ne: “Ndi ndomba bwà Wèwè kubàkwàcishaku ne kubàbènesha. Swaku bwà twètù kwalukila cyàkàbìdì pa kaaba aka. Nènku mpindyewu,” mèmè kwamba ne, “badi kuntwaku mbwalu Wèwè udi muntumèku bilondeshile cìkèèna—kumòna, ne Wèwè kucikumbaja. Mpindyewu ndi muswè kwindila, bwà kumòna ciWàngambilà bwà kwenza paanyimà.” Mèmè ne: “Ndi nsambidila. . . Ikalaku nendè luse.” Ki mèmè ne: “Nkwàcishèku mu masangisha kuntu kwàka.” Ki dìbà adi mèmè kutùngùnuka. . . Mèmè kwamba ne: “Mukalenge, kwitabiku bwa ciikàle cyà lufù nànsha. Nènku enzaku bwà ngàngàbukà awu indileku too ne paanyimà pàà ditùkù dyà kumpàla dyà cidimu, bwà kucyùmusha. Ncyèna—ncyèna munange bwà kumumòna. . .”

169 Mèmè ne: “Mukalenge, kì ncivwaye muswè kwenza mu dindà adi to. Kavwa muswè kwenza nàнку to.” Mèmè ne: “Mukalenge, kacya musangu nànsha ùmwè kàtukù mwanji kwamba dīyì nànsha ùmwè pa bidì bitangila diya dyànyì dyà ku masangisha to, ùtu ushààla ngondo ne ngondo, anyì cyònsò cìvwàku aci. Musangu nànsha ùmwè katukù mwanji kubulula mwèndè mukana pa bwalu abu to. Ùtu misangu yònsò ànu ùtuma bilàmbà byànyì kùdì basukudi, ne ùsukula mitèèlù yànyì, ne ùlongolola bintu byònsò bwà kuya mu masangisha. Dìbà adi, ùdikonka ne mmunyi mudiye mwà kukwacila Nzambì mudimu.”

170 Nwènu bakàjì, paùdì ukwàcila bayeebe mudimu apu, udi ukwàcila Nzambì mudimu, mu bushùwà bwà bwalu.

171 “Nènku mpindyewu, nènku pashiishe pàndì ngàlukila, mucyòkè yònsò ne muzengèle, bantu bàfùmina myaba yònsò. Bitu bikèngela bwà mèmè kupàtukà kuya mwaba kampànda mu lwendu lwà dilòba, anyì mu lwendu lwà bulembi. Mòna's, bantu bakàjì bààbùngì bavwa bafwanyine kwikala babinduluke bwà ciine aci. Cìvwaye wenza ncinyì? Ùvwa yêyè ùdyànjila kundongolwela bilàmbà byànyì byà bulembi bwà mèmè kuya; ùdekela nya.” Mèmè ne: “Mukalenge, kì ncwaye muswe kwenza to.” Ki mèmè ne: “Byàkakèngela bwà kumupandabu misangu yìsàtù, bwalu bàvwa ne cyà kumusabula bânà.” Ki mèmè kwamba ne ndi. . . “Mukalenge, ncyèna—ncyèna munange bwà kumumòna upicila kàbìdì ku kèle to.”

172 Nènkù ànu pa díbà adi mèmè kuumvwa cintu kampànda mu cibambalu amu. Mèmè kutangila muulu. Ki Dìyì kwambadi ne: “Juuka kuulu.” Yèyè ne: “Mpindyewu cyònsò ciwàmbà aci, mùshindù awu ki wikalàci.”

173 Mèmè kwindila ànu kakesè cyanààna. Mèmè kwamba ne: “Kumpàla kwà cyanza cyà ngàngàbukà aci kumulengaci, cyanza cyà Nzambì ciikale cyumùshe cyùjà cyà kansèrè aci, ne kabàcisanganyikù mene nànsha.”

174 Aci kukòsa bwalu, bwànyì mèmè. Ncyàkamubùikilakù nànsha. Twètù kuya ànu kumpàla, twètù kuya kapeta Billy ne Loyce, ne kuya ku Shreveport.

175 Dilòlò dyàkalondà mèmè kumubùikila. Ùvwa ne disànka. Yèyè ne: “Bill, ndi njinga kukwambila’s!”

176 Mpindyewu s’ki yèyè ewu, ne yèyè ùdi mwà kucijaadika. Bìvwa bìkèngela bwà kuyayè muntwamu wenda utebuka; kubwela mu cibambalu amu pàmwè ne mungàngà mukàjì ne Mandamu Norman, ne kuvwala bilàmbà byèndè bwà . . . nkanzu wa muleemùlè awu, bwà diteeta adi. Ngàngàbukà kupatukaye, kàdi uvwa mwà kubanda pa mèsà à cipandidi ne lutàtù; cyùjà aci kacya cyàlebelela mwab’awu, bunènci. Nènkù pàwàye. . . Ngàngàbukà kubwelayè ne ùvwa wàkula nendè. E kulwayè mwab’awu, bwà kubuulula cilàmbà cyà kudìbwikila aci bwà kumulenga, ne, ànu kumpàla kwà kumulengaye, cyòci kuumuka.

177 Nènkù ngàngàbukà kavwa mumanye ne nduseke kaayi luvwaci cisanganyibwa to. Yèyè ne: “Anji indilabi kakesè!” Mwikale ne bipimu bizola ne fòtò yònsò, ne bintu bikwàbò byònsò, kàvwaku mwà kupeta nànsha kashoonyi kààci to. Kumukenketaye, misangu ne misangu. Kwambaye ne: “Ndi mufwànyine kupanga mwà kucyùmvwija, kàdi, Mandamu Branham, cyùjà aci kacicyenamù to.” Ne yèyè kacya kàtukù mwanji kupeta cileejì nànsha cimwè cyàci to, kubangila ànu apu.

178 Cìvwa ncinyì aci? Mònaayi, ànu menemene mùshindù ùvwàDi dyambe ne: “Kumpàla kwà cyanza cyà ngàngàbukà kucilengaci.” Mu katùpà kàmwè kàà kasùnsukila kàà kasunsa, nenku’s cyanza cyèndè cìvwa cìfwànyine kwikala cìcilengè. Mùshindù mwine ùdi Dìyì dyà Mukalenge dipwàngàne’s wè!

179 Mpindyewu, s’ki mukàjàànyì wàwa, ne bùbidì bwètù ntwètù aba kumpàla kwà Nzambì. Kàdi kumpàla mene kwà cyanza cyà ngàngàbukà kulengaci mubidi wèndè, mu njila wenda ulwa kudiye mùshindù ewu, cintu kampànda cyàkenzekà, cyùjà cyà kansèrè aci kuumukaci. Nènkù kabàvwa mwà, yèyè—yèyè kwamba . . . Ngeela meeji ne bìvwa, kabìvwa nànkù to, munanga wanyi? “Ndi muswe kukujaadikila, Mandamu Branham,” (Ncyà bushùwà anyì, ki mùvwaye mucyàmbè? Ncyà bushùwà.) “ne

cyùjà cyà kansèrè aci kacyenapù to. Kwèna ne cyùjà cyà kansèrè to.”

¹⁸⁰ Civwa ncinyi aci? Ànu menemene bilondeshile Dìyì dyà Mukalenge, civwa . . . ? . . . Amen. Aci’s mmusangu mwitânù awu. Itaanu nnomba wa ngàsà, nomba wa d-i-i-t-a-b-u-u-j-a [f-a-i-t-h mu Anglais—Muf.], kàbìdì.

¹⁸¹ Kakùcyèna kàbìdì mpatà mu meeji àànyì to. Ndi mumanye cìdì Nkòkelu Mwisâtù, ne ndi mumanye cìdiye wènza. Mpindyewu ikalaayi ne kaneemu, shààlaayi ànu bapùwe, dìbà nedìlwe kataataka diikala Nzambì mwà kwenza bimwè bintu binène bwètù.

Mpindyewu twinyikààyaaku mitù yètù bwà mwâkù wà disambila.

¹⁸² Mukalenge Yesù, nkaavwa mucimòne pa bantu bakwàbò, kàdì pàakafikabi kùdì mukàjàànyì mèmè wa mushinga mukolè, civwa mu nzùbu mwànyì, dìbà adi, Mukalenge. Mèmè kucitangila ne mèsù àànyì mèmè mwine, mèmè kucyùmva ne byanza byànyì mèmè mwine. Nènku mèmè . . . bidimu dikumi ne bitaan- . . . dikumi ne bisambòmbò kumpàla kwà ciine aci, civwa kàbìdì, Mukalenge, cimanya ne cibiulula kùdì Wèwè. Pàdì cintu kampànda cyakùdìbwe, cìdì ne cyà kwenjiibwa. Wèwè uvwa undeejà, Mukalenge, dìbà adi, ne, dyeyemena dyànyì mu cyùvwa Wèwè mwenze bwà cisambà aci, ne mufwànyine kummanyisha, bwà ngààmòna mwà kubakwacisha. Udi mwenze bwà cyenzekele mwànyì mu nzùbu mene. Aci civwa Nkòkelu wa Kumpàla. Nènku mpindyewu Nkòkelu Mwisâtù ki wàkashindika Nkòkelu wa Kumpàla.

¹⁸³ Tudi ne kusàkidila, Taatù. Utufwileku luse ku mapanga ètù. Tudi cisambà cikesè. Tudi bapange kàlaasà, benza bu bàdì, bantu kabàyi balonge kàlaasà to. Kàdì tudi ne kusàkidila kwàbùngì bu mutùdì ne Nzambì munène wa bukolè bwònsò Udi utùtabaleela ne mwikale utùcyùka, bwalu katwena bamanye mwà kudicyùka twètù biine to. Tudi tudilambula Kùdì.

¹⁸⁴ Mpindyewu, Taatù, ndi ndomba bwà Wèwè kunkwacishaku. Nènku mu Nkòkelu Mwisâtù ewu, swaku, Éyì Mukalenge, bu muWàkamba mu ndambu wa bidimu bishààle ebi bwà bwalu ebu, ucìleeja pa . . . ucyenza cimanyinu pa mikuna, ne bikwàbò, wenda ucitwala ku ndambu ku ndambu. Mpindyewu, mvwa ntangila bwà kumòna ne civwa ncinyì too ne pàvwàcì cishindkiibwe cyònsò mu kaabujimà. Mpindyewu ndi ndòmba, Taatù, bwà Wèwè kunkwacisha bwà mèmè kwikala mu kaneemu menemene, ne eci, kutàmba mùvwàbì kumpàla, ne bwà Wèwè kupetaku butùmbi. Bu mùvwàbì ne, ànu ku cyambilu cìmwècìmwè eci, kwakambiibwa cyà Kumpàla, Ciibìdì, ne mpindyewu Cìisâtù, ne ciWàmbì aci ncyenzeke ànu menemene ànu ciWàkamba aci. Tudi baKwitabuuje, Mukalenge Nzambì.

185 Kwacishaku muntu ne muntu wa kutùdi bwà kwimanshaye dibenga kwitabuuja dyètù ne diitabuuja dyètù dyà majimbu, bwà twamòna mwà kwimana mu Bwikadi bwà Nzambi udi ne mwoyi, bamanye ne, Nzambi umwèumwè wàkuumusha cyùjà cyà kansère aci mu mukàjàanyi udi musòmbe kaaba aka mpindyewu awu awu; cijaadika kùdi yimwè yà ku midimu yà bukolè bwà mubidi mitàmbe kutumbuka yitùdi naayi mu ditunga emu, yàkacikenketa, ne pashiishe kutangila, ne kucikwàta ne fotò; nènku mpindyewu nciye mwamwamwa. Wèwè udi Nzambi ne kakwèna mukwàbò to pa kuumusha Wèwè.

186 Ne tudi baKunangè bwalu Wèwè udi ne—Wèwè udi mutwenze basadidi Bèèbè. Nènku swaku bwà tuKukwacile mudimu ne kaneemu ne dikutwà dyà mushinga, matùkù ètù ònsò à mwoyi. Enzaku nànkù, Mukalenge. Swaku ngiikaleku ne bukolè, ne famiye wanyi, ne bantu bònso aba, bwà kwikalabo ne bukolè bwà kwikalabù Makênkè àdi àkenka, mukele wa mutwe wìkala mwà kuto- . . . kufuka nyòòta munda mwà bakwàbò, bwà kunangabo Yesù udi mutwènzèle byàbùngi nunku ewu.

187 Mpindyewu pàndi nkangula Dîyi apa, bwà kuDìbala bu kààcyèna-bwalu kakesè, ne pashiishe kusambidila babèèdi, ngambulwisheku, Mukalenge. Akulaku neetù, ne ondopaku babèèdi, mu Dìna dyà Yesù mmutùdi tulòmba emu. Amen.

188 Nudiku bafwànyine, ndiku ne dîbà ànu bwà . . . ? [Disangisha didi dyamba ne: “Amen.”—Muf.] Mèmè mulwijakajè bikolè menemene . . . ndambu wa mifùndù kaaba aka, ndi muswe bwà nwènù kubala mpindyewu, anyi kufùnda, anyi cyònsò cinùdi baswè kwenza aci. Wa kumpàla ùdi ùsanganyiibwà mu Mukàndà wà Nomba, 21:5 too ne ku 19, nènku tudi baswè bwà—bwà kubala cyòci eci ne:

Nènku bantu kwakulabu bibi bwà Nzambi, ne bibi bwà Mòsà, Cyùdi mutupatwile mu Ejiipitu mbwà kufwa mu cipèèla anyi? bwalu kamwena dyàmpà, anyi nànsha màyi; nènku yetù misùukà mmicyòkè ne dyàmpà dipeepele edi, cyàkudyà cyà Banjèlo.

Nènku MUKALENGE kutuma nyoka yà lulengu munkaci mwà cisàmbà, ke kusumayo cisàmbà; ne bantu bààbùngi bàà beena Izàlèèlà kufwàbo. Ki bwà cinyi Mukalenge . . .

Ki bwà cinyi bantu bààkalwa kùdi Mòsà, bamba ne: . . .

189 Ditonda! Tàngilàayi ne: “Tudi benze mpèkaatù!” Nwamònu’s, ki cintu cyà kumpàla bwà dyondopa ncyòci aci, ditonda kumpàlampala.

. . . Tudi benze mpèkaatù, bwalu tudi bààkule bibi bwà MUKALENGE, ne bibi bwèbè wèwè; lombaku MUKALENGE, bwà yéyè wamòna mwà kutuumushilaku nyoka eyi kutùdi. Nènku Mòsà kusambidila cisàmbà.

Ki MUKALENGE kwambilaye Mòsà ne: Dyenzele nyoka wa lulengu, ne umutèèke ku lusòkòlò: bwà byàmòna mwà kwikala, kwe—kwenzeka ne, muntu yònsò udi musumùbwe, pàatàngilaye ku nyoka, ashààle ne mwoyi.

Ki Mòsà kwenza nyoka wa cyamu cyà kabanda, ne kumuteeka ku lusòkòlò, nènku kwenzekabi ne, nyoka yèyè musume muntu kanà yònsò, pavwaye utangila nyoka wa cyamu cyà kabanda, ùvwa ùshààla ne mwoyi.

¹⁹⁰ Mpindyewu, kàbìdì, ndi njinga kubala Mufùndù mu Zekààyi, nshapita wa 12, mvensa wa 10.

Nènku mémè nèngùcìkijè pa nzùbu wa Davidi, ne pa bàdì basòmbèle mu Yelusàlèma, nyumà wa ngàsà ne wa misèngeleelu, ne bòbò nebàtangijè mèsù kùndì mémè udibò batwè difumà, ne nebàmudilè, mùdì muntu ùdila mwanèndè umwèpelè wa balùme mulela, ne nebàmudilè mwadi wà bujindajinda, mùdì muntu ùdila bujindajinda bwà mwànàabutè wendè.

¹⁹¹ Mpindyewu bwà cyena-bwalu, nèngàngatè eci nùku: *Tàngijààyi Mèsù Kùdì Yesù*. Umushaayi mèsù ku maalu à buloba, nutangilè kùdì Yesù. Mòsà wakenza nyoka; kàdì ki muprofeta ewu, pashìishe, uvwa wakula bwà cyòcì aci, cìvwà mwà kwenzeka, mu kutangila kùdì—kùdì Yesù.

¹⁹² Bible mmwambe, mu Yeshààyi 45:22. Tudi tusangana ne Nzambì wàkamba ne: “Tàngilààyi kùndì Mémè, nwènù ntengu yònsò yà buloba.” Nènku mpindyewu pàdì buloba bufike ku ndekeelu wabù, anyi ndongolwelu yà buloba mifike ku ndekeelu yààyi, bantu bàtangile kudiYe.

¹⁹³ Mpindyewu nudi bafwànyine kwamba ne: “Tukaadi bùmve eci, ku lukongo ne lukongo. Tukaadi bumvuumve eci kukaadi ntàntà mule.” Ncyà bushùwà, ne nciyiishiibwe kukaadi ntàntà mule. Bambi bààbùngì mbangatangate cyena-bwalu cimwècimwè eci, binunu ne binunu’s.

¹⁹⁴ Kàdì cintu cìndì njinga kunukonka ncyòcì eci, dilòòlò edi, bwà tusuna tukesè tùdì tùlondà etu. Kàdì panùdì nutangila, lukonko lùdì—lùdì ne, cyùdì umòna ncinyi paùdì ùtangila? Cyùdì umòna ncinyi paùdì ùtangila bulelèlà? Aci’s cidi ànu cilaale ku cyùdì wenda ukebangana naaci. Nwamònu anyi? Mpindyewu Yèyè kwamba ne: “Tàngilààyi kùndì Mémè, nwènù ntengu yònsò yà buloba.” Mòsà kubàndishaye nyoka kuulu, ne, yònsò wakatangila awu, wàkondopiibwa. Mpindyewu, mbilààdile ku cyùdì ukebakaba.

¹⁹⁵ Nkaadiku mumòne bantu babwela mu masangisha, mu ditùkù dyà ndekeelu edi, bafwànyine ànu mwà kukumbana mwà kusòmba mu masangisha ànu bwà kasunsa bu kamwè anyi túbìdì. Ki cyònsò cìvwabo mwà kutwàla ncyòcì aci. Nwamònu’s, kabàvwa mwà kucitwàla to.

196 Ncyadyàkupwaku mwoyi to, ndi ntekemena ne eci kacýèna cileeja ní nganyi ní nganyi wa ku Iowa, pámvwà ne masangisha ku Waterloo kwaka.

197 Mwanèètù Lee Vayle, ùvwa mwab'ewu mu dindà emu. Ncyèna mumanye ní udipu dilòlò edi anyi kènàpu. Udi kaaba aka anyi, Lee? Ùvwa kaaba aka mu dindà emu. Èyowà, lwà mu ndekeelu mùtùbo bàkwàcila mikàbà yà mèyi, paanyimà apa. Èyo.

198 Mwanèètù Lee ne mèmè twàkenza byònsò bitùdiku pèètù mwà kwenza abi. Ne kupèèsha nsangilu wa bambi cyàkudyà cyà dindà, cyanààna, ànu bwà kulwa kwakula naabo. Mwanèètù Lee Vayle, mu bushùwà bwà bwalu, mmumanyi wa dibàla ne—ne Docteur en Divinité, udi bulelèlè mupetelemu dipoloma dyèndè adi. Ki mèmè kuteeta bwà kumufikisha ku dyakula kumpàla kwà ba-Luthériens aba, ba-Presbytériens, ne bakwàbò, kàdi kwambayè ne: “To, mbindile bwà wèwè kucýènza.”

199 Èè, mèmè kupweka e kwangata cyena-bwalu cyànyì, kumpàla kwà bambi aba, paanyimà pàà bóbò bamane kujikija didyà. Mèmè kwangata cyena-bwalu cyànyì ne: *Ncyàkashikuka Ku Cikèènà-Kumònà Cyà Mu Dyulu Nànsha*. Ànu njikija kubala Mufundù, bu bàbìdì kutangilabo, s'ki bóbò bàyaaya pambelu bàba. Nènku ndi mwenze ànu mbanga kwamba ne: “Bu Pòlò mu ditùkù dyèndè, mwikale ne mudimu wa bwambi wa pawwàwù, nènku mpindyewu yèyè mmwimane kumpàla kwà Agrippa ne wàmba ne kàvwàku micìshìkùkila to,” bakwàbò bu bàbìdì anyi bàsàtù kujuukabo kuulu. Nènku patwàmbe kafika ku cikondo cimvwà mwà kwambaku cintu kampànda pa cyena-bwalu, kùvwa kushaala ànu bu bàsàtù anyi banaayi basòmbe mwaba awu. Bakaavwa bònsò bajuuke bayè.

200 Kabingila kà cyòci aci, kàdi ne, kàdi nunku. Bamwe bàtu balwa ku masangisha kampànda, pàdìbo bùmvwa bàmba bwà mutangadiki kampànda, mùshindù udiye uvwala ùdi ne cintu kampànda cyà dyenza kùdi bantu. Yèyè kàyi ùvwàla bilàmbà byà mùshindù mujaalame to, bàmwè bàà kudibo . . .

201 Mèmè kuumvwa mulongi wa—wa ngenyi wàmba, dîngà ditùkù; Docteur Narramore, muntu mulenga, mwena Kilistò, ndongamu wèndè ùtu ku KAIR kwaka, dibà dyònsò. Kwambayè ne: “Mùshindù wà kumanya ne muntu kampànda ùvwa ujimija lungenyi, mpàdiye kàyi ùvwàle bilondeshile milongo yèndè to.” Nudi bamanye's, bilondeshile mùshindù ùdìbì bikèngela bwà yèyè kumweneka kumpàla kwà bantu awu, ke cìvwa cimanyinu cyà ne ùvwa munkacì mwà kujimija lungenyi lwèndè.

202 Èè, dibà adi, mèmè's ntu mupàle mu matùkù ànyì wònsò àà mwoyi amu's, nwamònu's, bwalu ntu mvwàla cinsàlàbeeta ne bikwàbò byònsò abi's, nwamònu's. Pa nànkù, bilondeshile milongo yànyì, ndi ne cyà kuvwàla bu mwambi, mu ngaakwilu mukwàbò, bwà—bwà kwikala mwambi's.

203 Ncyèna ngeela meeji ne Yesù ùvwa ùvwàla bu mwambi to. Ùvwa ùvwàla bilàmbà bu muntu wetù wa pàtupù ewu. Ùvwa ùbwela munkaci mwà bantu, kadi mvwadilu kàvwa ne bwalu nànsha bùmwe to.

204 Kàdi aci cidi ànu, nwamònu's, mùshindù udi meeji à muntu. Kacyena. . . Kàdi netwámbe cinyi bwà muntu ewu, anyi, ndi ndikonka cidi docteur awu mufwànyine kwela meeji bwà bwalu ebu, pavwa muprofeta kampànda mu Bible mutumina díyi bwà kuvuula bilàmbà byèndè ne kwenda butaka kumpàla kwà bantu? S'ùvwa mufwanyine kwikala mupàle wetù wa menemene, kí mmwómò anyi? Kàdi Nzambi's nguvwa mumwambile bwà kucyenzaye.

205 Mukwàbò uvwa ne cyà kulààla mu luseke lwèndè munda mwà ngondo nkama yisàtù ne makumi anaayi, ngeela meeji ne mmùvwàbi, mwikale mulààle ku luseke lwèndè, luseke lùmwe; ki pashìshe kukudimukaye luseke lukwàbò. Ne kudyà lwesu lwà citèkutèku civwàye mwenze mwab'awu; byàkakèngela bwà kuyaye ne kutumpa bintu abi ne kubilàmbà, pamwè, ne kubìdya byònsò díbà adi; wòlola cyanza wambula dyanza ùdya, mulààdila pa luseke lwèndè, bu cimanyinu. Nwamònu anyi?

206 Kaa, bantu bàdi mwà kuya kule, mu bulelèlè, ne Díyi dyà Nzambi. Bàdi ànu batàmbe kulonga tùlaasà mu mùshindù wa balonga bàdisaka kule ne Nzambi. Pàdi muntu wakula wàmba mudiye mulonge kàlaasà, ndi mumanye ne aci ki mùshindù udiye kule ne Nzambi; nwamònu's, dipolome dyà bu docteur. Ncyèna ngamba bwalu ebu bwà kubengangana ne Docteur Vayle to, bwalu yèyè kèna wa mùshindù awu to. Kàdi, pa ciibidilu, pàdi muntu ùpeta dipolome dyà bu docteur, mbwena kwamba ne, bwànyì mèmè, yèyè udi mmutambe kuya kule ne Nzambi ntàntà awu, nwamònu's, ànu yèyè mushààle mulamate ku Díyi ne kùdi Nzambi's.

207 Mpindyewu, tudi tusangana ne bàmwè bàlwalwà bwa kutèèleja mùshindù útù wakula awu, pàdìbo balwa bwà kutangila apu. Wèwè wakula bwà dyondopa dyà kùdi Nzambi ne bwà Mukalenge; muntu yèyè kàyi mulonge tùlaasà, wa meeji à njanjama awu to, bantu kabèèna ànu mwà kujimija díbà dyàbò bwà kumutèèleja ne dyakula dyèndè dyà "ìnhì-túng, hain't," ne—ne myaku bu. . . Bàdi ànu. . . Kabèèna mwà kwenza nàнку to. Bàdi beela meeji ne aci cidi kule menemene ne Nzambi.

208 Nènku pàvwa Yesù wàkula ngaakwilu wa bantu bònsò awu, mu mùshindù wà ne, leelù ewu, ùdi upeesha balongeshi bàà cikunda cibwejàkàji, bwalu bôbò bàdi bateeta bwà kumumvwija bilondeshile mamanya à tùlaasà manène ne ngaakwilu wa ditùkù adi, pèndè's ùvwa ngaakwilu wà bapìci bàà mu njila. Ki bwà cinyi. . .

209 Mòna's, kùdi dishìilangana dinène nànsha mùnu mu États-Unis wètù emu's! Mvwa mubiikidile mu Floride, ku New York,

nènku byàkakèngela bwà mèmè kupeta mukàjì kampànda lwà apa nùnkù, kàbìdì, ku St. Louis kwaka, bwà kwandamuna pankacì pàà nsongààkàjì wa ku sud ewu ne nsongààkàjì wa ku nord ewu. Ki dishiilangana divwàku ndyòdì adi. Nwamònu anyi? Cyà bushùwà menemene's.

²¹⁰ Mpindyewu cìdiku ncyà ne, bantu abu bàtu bakebangana ànu ne bintu abi, mishindù yà dyakula, pamutu pàà Dìyì. Dìyì diikale dimwèneshiibwe ki cileeji cyà ne Dyòdì ndyà cyà bushùwà. Nwamònu's, Dìyì diikale dimwèneshiibwe! Bòbò kabàadyàkutangilaku Aci to. Bìkèngela wikale ne mmwenenu wa mamanya à mu mutù, bwà kumanya, nda ku sèminère bwà walonge mùshindù wà kwinama, mùshindù wà kwimana ànu kaaba kàmwè, ne byònsò. Kaa, aci's ncifwànyine kushiikija mwoyi wà mwambi kampànda, byà mufwànyine kufwà, uvwa mùle ntèntè ne Nyumà Mwîmpè awu. Nwamònu anyi? Mpindyewu, aci's ncyà mamanya à mu mutù.

²¹¹ Nènku mùshindù awu ki ùkaadi ditùnga dijimà edi dilwa. Dìdì ne mmwenenu wa Kilistò wa mamanya à mu mutù. Ki cidìbo bakeba ncyòci aci. "Nènku piikalabi ne Kilistò ùdi munda mwèbè, bìdì bikèngela wikale mumanyi wa dibàla, bìdì bikèngela wikale mwena mamanya à mu mutù," bwalu ki cidìbo bòbò beela meeji ne ki cidì Kilistò aci's.

²¹² Ne cikondo cikwàbò, cintu cikwàbò, bàdi bàkwatakaja mmwenenu yàabò bòbò yà cìvwa cikèngela bwà Yèyè kwikala, mmwenenu wabò sungasunga, pamutu pàà kwangata cìvwa Dìyì dyàmbe. Mùshindù awu ke ùdìbi ne pàdìbo batangila, nànsha bamòne Yesù Mwine, bàdi bàpanga kuMujingulula. Bàakacyènza mu Ditùkù dyà Mpenta. Bàakacyènza pàvwàDi mu mubidi. Bàakacyènza pàvwàYe mu cidìilu cyà nyama. Bàakacyènza pàvwàYe mu misèsèsù yà Yelusàlèmà. Bàakacyènza pàvwàYe ku nkùrusè apu. Nènku Yèyè uvwa dyula dyà Dìyì adi. Kàdi, nànsha nànkù, bàvwa ne Maasiyà wa ùtùùluka mu kajila kaa ku Dyulu, ne bikwàbò byònsò, ne bìvwa ntùpàkànyì, bwalu cìvwa mmwenenu wabò wa mamanya à mu mutù. Kàdi bàakapanga kuMumòna, pàabù, baMutangile buludi. Ki mùdìbi kàbìdì leelù ewu!

²¹³ Udi umòna cinyi paùdì utàngila? Bàmwè bàdi bàkeba kumòna, pàdìbo bàMutàngila, bàdi bàkeba kumòna mwashi wa èkèleeziyà kampànda munène wa maalu à mamanya à mu mitù, muntu kampànda udi bulelèlè mwà kupàtula twitabàayi kampànda wìkala mwà kufikisha bantu bònsò ku disukumina twitabàayi ewu, cintu cyà mushindu kampànda. Ke cidìbo bàkeba pàdìbo bàMutangila.

²¹⁴ Bàmwè bàtu bàkeba bwà kumòna bwalu bukwatakaja, bu mùdì Taatù Noël, pàdìbo bàtangila apu. Bàdi bàbala Bible, bàmba ne: "Aa, aci's ncintu cikwatakaja. Ncintu kampànda cidì ànu muntu mufunde's. Ki cyòci aci, bòbò, bwalu pàdìbo..."

Mmwenenu ùdì wangata bwà Bible awu, ki wùdì wangata Bwèndè. Nwamònu anyi?

215 Bàmwè bàdì bàkeba bwà kumòna mwànà wa mu dibòko. Bàmwè bàtangila bàmona kà—kàlulù anyi Taatù Noël. Bàmwè bàdì bàkeba kumòna mukàndà kampànda wa maalu malonda úvwàku makèlèlèlà awu kàdì kawùyikù leelu to.

Kàdì, lukonko lùdì ne, udi umòna cinyi paùdì utàngila?

216 Bààbúngì bàà kunùdì, bàdì bàmba mùdìbo ne Nyumà Mwímpè abu, nudi nutangila numòna muntu mwibìdì wa mu búsatu. Pààbí, kacýèna nànsha citèèdiibwe mu Bible to. Cintu bu nànkú kacitukù to. Mwaku pààwu ne mbúsàtu kawèna nànsha mu bizubu byà Bible to. Kàdì, nànsha nànkú, paùdì utàngila Yesù, udi uMwangata bu mupersona mwisàtù anyi mupersona mwibìdì wa mu búsàtù, nènku ki bwà cinyi kwèna ne kúyààyà to.

217 Nudi bamanye cyàkambàYe anyi? “Mémè ndi Nzambì, ne kakwèna mukwàbò to pa kuumusha Mémè.” Nwamònu anyi?

218 Mbilààdile ku cyùdì wèwè utàngila. Wèwè muswè kuteeka bu mwànà wa kutumakaja, anyi muntu mukulakaje ne mwedi cipamba, ne bikwàbò; pìikalabi ne mshindù awu ki wùdì utàngila Yesù bu muntu kampànda mushiilàngàne ne Nzambì, udi utàngila bibì. Kwèna uCimòna to.

219 Mwab’ewu ànu àbìdì àdì panshi aa, mvwa muvwale bìnete byà mu mpàta. Mvwa nteeta bwà kutàngila ngulungu kampànda, anyi ngulungu kampànda lwà mu budimi kampànda. Nènku mwanàànyì wa balùme uvwa uteeta bwà kundeeja, pèndè’s mmwànà kùndì menemene. Ki yèyè ne: “Angata tulòndo atu, papa! Ki ngulungu nyèyè wàwa mwimane ànu mwaba wàwa!”

Mémè ne: “Ndi mwà kumumòna ne dísù dyànyì dyà cifùkìlu edì’s.”

Yèyè ne: “Angata tulòndo etu.”

220 Pangààkatàngila, mémè kumòna ngulungu mitwè ku dikumi, kàdì tulòndo atu katùvwa tujaalamija mu tótò nànsha. Nènku pangààkatùludika bímpè, yònsò dikumi ayi kulwayi umwèpelè.

221 Nènku bu nwènù mwà kujaalamijaku meeji ènù pa Díyì dyà Nzambì, bàsàtu abu nebiikale Umwe. Nwamònu anyi? Kàdì tulòndo twèbè twà butèndeledi katwèna tujaalamija mu twótò to paùdì uteeta kuMuvwija bàsàtù. Yèyè ùdì Umwe. Nwamònu anyi?

222 Kàdì mbilondeshile ku cyùdì wèwè utàngila. Cyùdì umòna ncinyi paùdì utàngila? Vùluka ne, udi mwà kuMumòna ànu paùdì uMutàngidila mu Díyì. Kwèna mwà kuMutàngidila mu mukàndà wà dilongeshangana naawu to. Kwèna mwà kuMutàngidila mu twitabààyì kampànda to. Neùmòne nzambì yìbìdì anyi yìsàtù, ne bikwàbò byònsò, mu twitabààyì ayi. Kàdì Mutàngidile mu Díyì, nènku neùmòne ne Yèyè ùdì “Emanùwèlè, ‘Nzambì mmuvwijìlwe mubidi munkacì mwètù.” Yèyè mmwàmbe ne:

“Mémè ndi Nzambì, ne pa kuumusha Mémè kakwena mukwabo nànsha umwe to.” Yèyè ùdi Nzambì.

223 Yeshààyi wàkatàngila musangu kampànda, mupròfetà awu, ne pàakamònaye Yesù. . . Cyena-bwalu cyànyi cidi ne: “kwikala mutàngile kùdi Yesù.” *Tàngijààyi Mésù Kùdi Yesù*. Pàakatàngila Yeshààyi muumùsha mèsù ku byà pa buloba, bwà kuMumòna, wàkamba ne: “Ndi mmòna Mubedyanganyi, Mfùmù wa Ditalala, Nzambì wa Bukolè, Taatù wa Kashidi.” Ki cyàkatàngidila Yeshààyi pa bule ne kumònaye ncyôci aci.

224 Danyèlè, musangu kampànda, ùvwa mwimane pàakamònaye nde—ndekeelu wa makalenge à bàà Bisàmbà byàbendè. Yèyè wàkamòna cimfwànyi cyàkalòòta Nebùkàndènèèsà aci. Wàkamòna mùshindù wùvwàwo mwà kulondangana bùmwe ne bukwbò, pàvwàwo ènda apweka apu. Nèku pàakakèbaye bwà kumòna cyònsò cìvwà ne cyà kwenzeka ku nshùkidilu, pàakamònaye Yesù, Yèyè ùvwa “Dibwe dijoomòke ku mukuna, kakùyi dyambulwisha dyà byanza to,” dyàkàvingutula makalenge à bàà Bisàmbà byàbendè.

225 Nebùkàndènèèsà kwelaye bàna bàà beena Ebèlu bàsàtù mu cikùtù cyà kapyà, bàvwa biitabùjè Nzambì ne biimanyine pa Dìyi Dyèndè abu. Pìikalabi bikèngela bwà kufwà bwàDì, bàvwa ne cyà kutwà mikolo panshi, nànsha byà munyi; ànu kantu kakesè, kàa kutwà cinù cyàbo panshi mu mùshindù kampànda. Kàdi pàakatàngilaye ne kumòna Yesù, Wàkamòna “muntu mwinâyi” uvwa mu cikùtù cyà kapyà awu, nènku cyàkuumusha luuya lukolè lwònsò kùdi basadidi Bèndè bàà butùmike abu. Ki cyàkamòna Nebùkàndènèèsà ncyôci aci.

226 Yèhezèkèlè wàkakeba bwà kuMumòna dîngà ditùkù, ne Yèyè ùvwa “Lukàta munda mwà lukàta,” muulu menemene mu mpepèlè mwàmwa. Yèyè ùvwa Cinyingilu cyà lukàta alu, kùdi lusambu lwònsò lukàngila. Amen! Lukàta lunène lùvwa lùnyùnguluka ku diitabuuja, kàdi Lukàta lukesè alu luvwa lùnyùnguluka ku Bukolè bwà Mukalenge. Ki Yèyè wàkamòna Yèhezèkèlè pàakatàngilaye.

227 Yone Mubàtiji wàkatàngila dîngà ditùkù, nènku, pàakenzaye nànu, kumònaye Nkuci; ne Dìyi, dyàmbe ne: “Ewu m’Mwân’Àanyi munanga Mwena munda Mùndi nsanka bwà kusòmbela.” Ke cyàkamònaye. Nènku, kumònaye Yesù ne Nzambì biikale Mupersona ùmwèùmwe awu, bwalu Nyumà wàkatuuluka mu Dyulu mwenze bu Nkuci, wàmbe ne: “Ewu m’Mwân’Àanyi munanga Mwena munda Mùndi nsanka bwà kusòmbela.” Ki cyàkamònaye ncyôci aci. Mònaayi, Yèyè ùdi uDimanyishila mu mùshindù awu.

228 Noa, pàakakebaye bwà kuMumòna, Noa wàkamòna ànu manyooka à Nzambì munkaci mwà kulwa pa bantu bàà pa buloba ebu bàvwa babenge Dìyi Dyèndè abu. Ki cyàkambà Noa pàakatàngilaye.

229 Mòsà, pààkatàngilaye, wàkamòna cipuka cilàkuka kapyà. Dikunji dyà Kapyà divwà diDyaluje mu cipuka, nènku, pààkaseemena Mòsà pabwîpi naaDi, Yêyè kwamba ne: “Kopola bisàbaata byèbè, bwalu: ‘NDI.’” Mpindyewu, bu wêwè mwà kupima mwàkù awu wa ne: “NDI,” ncikondo cikaadi cipite, cikondo cyà mpindyewu, ne cikondo cicilwalwà. “NDI,” Wa Cyendèlèlè! Nwamònu anyi? “NDI,” yêyè wàkamòna “NDI awu.” Ki cyàkamònaye mu cipuka cìvwa cilakuka kapyà.

230 Izàlèlè uvwa utangila nyoka wa cyamu cyà mitakù uvwa Mòsà mwênze awu, ne kumòna makenga à Kilistò bwà cilumbulwidi bwà babèèdi, bwalu tudi bamanye ne nyoka uvwa wakula bwà Difuta dyà cibawu.

231 Yesù nguvwa Difuta dyà cibawu adi. “Ànu mwàkabandisha Mòsà nyoka wa cyamu cyà mitaku mu cipèèla amu, ki mwikala kàbìdi Mwànà wa muntu ne cyà kubàndishiiwba,” mu kiipacila kàmwèkàmwè aku. Nwamònu anyi? Bwà cinyi? Bàvwa bènze mpèkaatù, ne kusaamabo; aci cìvwa mbwà dyumushiibwa dyà mpèkaatù yààbò ne bwà mabèèdi àbo. Nènku ki cyòci aci: “Yesù wàkatapiibwa mputà bwà matomboka ètù; ku mibùndabùnda Yèndè twàkamana kwondopiibwa.” Kuumusha dyondopa dyà kùdi Nzambì kùdi Kilistò, udi uumusha cyàbibìdi cìmwè cyà Difuta dyà cibawu, mu bitùpà bibìdi abi. Nwamònu anyi?

232 Cyùdi umòna mu Yêyè ncinyi paùdi utàngila? Udi umòna aci anyi? Udi umòna ne: “Wàkatapiibwa mputà bwà matomboka ètù; ku mibùndabùnda Yèndè twakamana kwondopiibwa anyi?” Paùdi utangila kule, udi mwà kumòna aci anyi, anyi udi mwà kumòna ànu luseke lùmwe lwà Difuta dyà cibawu? Nudiku mwà kumòna nseke yònsò yìbìdi yà cyòci aci panùdi nutàngila anyi?

Wêwè mucitàngidile mu twitabàayi, bôbò nebàkwambilè ne: “Matùkù à dyondopa àkaadi mamane kupita.”

Kàdi wêwè mucitàngidile mu Dîyi, neùmòne ne: “Yêyè ùdi umwèumwè awu makèèlèlè, leelù, too ne kashidi.” Nwamònu anyi?

233 Bayiidi bààkatàngila KudiYè pàvwàbo pa mbù mubindùlùke, ne kumònabo dikwacisha dimwèpelè divwà mwà kubakwacisha adi, dilwa.

234 Marta wàkatàngila kudiYe mu cikondo cyà lufù, ne kumònayè ne Yêyè uvwa “dibiikà dyà ku lufù ne Mwoyi.” Amen! Mu cikondo cyà lufù, Marta wàkamòna, pààkaMutangilaye. . . Wùvwa mubèngiibwe kùdi cisàmbà cyèndè; Úkaavwa mudyombodiibwe; nànsha nànku, ùvwa mutume bantu bakaMukebe, kàdi Yêyè kàakalwa kùdi mwanààbò wa balùme to. Kàdi ndekeelu wa byònsò pàakalwaYè, ke kuyaye ne kudyupwila panshi bwà wàmòna mwà kuMutangila, kusanganaye ne Yêyè ùvwa byònsò bibìdi “dibiikà dyà ku lufù ne Mwoyi.” Amen!

235 Yayilo wàkenza cintu cimwècimwè aci, mwena kwitabuujà wa mu musokoko; Presbytérien mutekète, Méthodiste, Baptiste, uvwa mwitabuuje cyà bushùwà, kàdi kàyi mwà kuseemena to, ànu bwalu dingumba dyèndè kadivwa mwa kumulekela useemena to, bwalu ùvwa mufwànyine kwipaciibwa. Kàdi mwanèndè mukese umwepelè wa bakàji mulààle wàmba kutuula nkìndà, nènku byàkakèngela bwà kuyayè. Kàdi pààkaMusanganaye, wàkajandula ne Yèyè ùvwa dibìika dyà ku lufù ne Mwoyi.

236 Pààkatumaye bantu bwà kuMubiikila, mutumibwe kulwaye lubilu ne kwambaye ne: “Kutàcishi Mfùmù to, bwalu nsongààkàji ùkaadi mumane kufwà.” Yèyè... Ki mwoyi wèndè mukèsè awu kwamba kwimana.

237 Kàdi Yèyè kwamba ne: “Ncyèna mwambe ne: ‘Wèwè ànu mwitabuuje, neùmòne Butùmbi bwà Nzambi’ anyi?” Yayilo kujandula ne Ùvwa mwà kajuula bafwè, pààkatàngilaye kùdi Yesù.

238 Mwena nzala kutàngilaye kùdiYe, e kupeta cyàkudyà cikwacishi cyà mwoyi. Aci cívwa cyà mu bufùki emu. Mwena nzala, wa mu nyumà, ùdi mwà kuMutàngila ne kujandula ne Yèyè ki Dyàmpà dyà Mwoyi.

239 Mwìvi uvwa upùnga ne lufù wàkakeba bwà kumòna civwaye mwà kumòna, e kusanganaye, mu Yesù, difwidiibwa dyèndè dyà luse. “Wamvùlukaku mémè, Mukalenge, paWàbwèla mu Bukalenge Bwèbè.” Yesù wàkamba ne: “Leelù ewu newikale Naanyi mu mpàlàdiizò.” Ki cyàkamònaye mu dībà dyà lufù lwèndè.

240 Babèèdi kuMutàngilabo, e kumònabo Mwondopi. Mpofo wàkatàngila, ne ùvwa mwà kumòna’s.

Mbilondeshile ku cyùdi wèwè utàngila mpindyewu. Cyùdi utàngila ncinyi?

241 Peetèlo ne Natanaela bààkatàngila, ne bààkamòna Dìyi dilaya dyà mupròfetà wabo, Mòsà, dimwènèshiiibwè. “Mukalenge Nzambi wenù neàjuule Mupròfetà mufwànàngàne naanyi, ne bantu nebàMulamate. Nènku bònsò bàdi kabàyi baMwitàbuuja, ne buumvwa Mupròfetà awu, nebùmushiibwe mu bantu.”

242 Nènku pààkabwelà Peetèlo mu Bwikadi Bwèndè, Yesù wàkamba ne: “Dìna dyèbè n’Simona, ne udi mwànà wa Yona.” Wàkamanya ànu pa dībà adi mene, pààkatàngilaye musangu wa kumpàla kùdi Yesù, bwà ne ki cívwa dikumbana dyà cívwa Dìyi dyà Nzambi dyambe ne Yèyè neikalè aci. Amen.

243 Ndi ndikonka ní udi mupete cintu cimwècimwè aci paùdi uMutàngila bwà musangu wà kumpàla apu? Ndi dikonka ne Dìyi dilaya didi diDimwenesha kùdi pawàkaMutàngila anyi?

244 Natanaela, mmwenzè ànu ùfika mu Bwikadi bwà Yesù anyì, mu dyelakana ndambu. . . Tudi tujandula ne Filipino ùkaavwa muyè kamwambila ne: “Lwàku, kùmonè Utùdì bapete ewu.”

Ki Natanaela kulwayè, ne kwambayè ne: “Ngwepi?”

Yèyè ne: “Pàmwàpa ngùdi kuulu kwaka munkaci mwa kusambidila babèèdi wawa.”

245 Kudifindaye mu bantu amu too ne mwàkafikaye kùdiYe. Nènku mmwenzè ànu utàngila anyì, Yesù kwambayè ne: “Mònaayi mwena Izàlèèlà mwena munda mùdi kamùyì lubombo.”

Yèyè ne: “Laabi, ndìbà kaayi dyùdì Wèwè mummanyèku?”

246 Yèyè ne: “Kumpala kwa Filipino kukubiikilaye, paùvwa mwinsì mwà mucì apu, Mèmè’s mvwa mukumòne.”

247 Dìbà adi Natanaela wàkasangana cinyi? Wàkajandula ne ki Mfùmù wa Izàlèèlà awu. Yèyè ne: “Wèwè udi Mwàna wa Nzambi. Udi Mfùmù wa Izàlèèlà.” Ki cyàkamònaye pààkatàngilaye. Yèyè wàkapeta dyumvwija dyà Mufùndù, mumutòokeshila kumpàlà kwèndè. Yèyè wàkawùmòna, Mufùndù ùmwèùmwè ùvwa Mòsà mupròfetà mulaaba awu mwambe ne: “Yèyè neikale Mupròfetà mufwànàngàne naanyì.”

248 Mukàji wa ku ciinà cyà màyi awu, wàkatàpa disù musangu kampànda, kàdi cyàkamònaye cinyi? Wàkacijikula patòòke mu cimenga. Yèyè kwamba ne: “Lwàyi, kanùmònaayi Muntu Udi mungambile bintu bìndi mwenze. Ki m’Maasiyà mwine anyi?” Pààkatapaye disù dyèndè dyà kumpàla kùdi Yesù Kilistò, kumònaye Maasiyà.

249 Bantu bàdi mwà kutàngila cintu cimwècimwè aci leelù ewu, kàdi kuCibiikila ne “ndubùku.” NebàCibiikile ne “nditèndeela dyà bakishi.” NebàCiinyike dìnà dyà dyabulu dyà mùshindù kanà wònsò udibo mwà kuCibiikila, bwalu kì mbamanye cidibo bakeba to. Amen. Kabeena buumvwa to. Bàdi benda bàkebangana ne twitabàayi kampànda. Bàdi benda bàkebangana ne muntu kampànda wa meeji bwà kuteeka èkèleeziyà mu bulongame. Bàdi benda bàkebangana ne bidimba byàbúngì, kàdi bàpanga kumòna Mukalenge Yesù Kilistò mubènèshìibwe mu Dìyi Dyèndè dimanyìshìibwe. Cyà bushùwà.

250 Mbilondeshile ku cyùdi wèwè ukèba. Wèwè ukèba dikumbana dyà mulayi wà leelù, neùdimònè. Kàdi, wèwè ukèba cintu kampànda cyà meeji à mu mutù, anyì cintu kampànda citùbu ànu bàkèba misangu yònsò, mujuudi kampànda munène wa cisumbù, mulongi wa maalu malonda, muntu kampànda mukwàbò, cintu kampànda cikwàbò, neupangile mwà kuDìmòna. Kàdi paùdì uMutàngidila mu Dìyi, Dìyi ndìdi dyamba ne Yèyè n’Nganyi.

251 Yèyè wàkeela bantu bàà ditùkù Dyèndè kadyòmbò bwà kwenza cintu cimwècimwè aci. Kabàvwa mwà kuMumòna to.

Yèyè ne: “Nwènú bampofò balombodi bàà bampofò. Nudi nwamba mùdì Mòsà mupròfetà wènú. Bu ne nuvwa bamanye Mòsà, nùnkú’s nudi baMmanye. Mòsà wàkafùnda bwànyì Mémè.” Ne bóbò bavwa batàmbe kufofoma bwà kuCimnòna. Batàngile buludi kùdìDi, kàdì bàtàmbe kufofòmijìibwa bwà kuDimòna.

²⁵² Ndi nswikakaja ne “bukènkè bwà mafi” mu dindà emu, bwà katanci kakesè, nudi numòna’s. Bàdì bàkèba, kàdì kabàyi bamanye cìdìbo bàkèba aci to, bwalu bàdì ne mmwenenu mubì wa cìdìbo bateeta kupeta. Mmunyi mùdì mufwànyine kumanya cyùdì muswè kupeta aci, pìikalabi ne kuvwa mumanye cyùvwa ukèba aci?

²⁵³ Mmunyi mùdì mufwànyine kuya kukebangana ne diwòji, kàdì kuyi mwanji kudimòna ne muumvweku bàakula bwàdì? Mmunyi mùdì mufwànyine kuya kasangana cibimbi, pàdìbi ne kacya kuvwaku mumanye ne kùtu cintu bu nànkú, ne cìdì mùshindù kaayi? Mòna’s, udi mwà kapeta cilòwalowa, kàdì kwela meeji ne ki cibimbi aci’s. Udi mwà kupeta cingà cintu, udi mwà kupeta dìdyòtù, kàdì kwela meeji ne ncibimbi.

²⁵⁴ Kàdì bìdì bikèngela umanye cyùdì munkaci mwa kukèba. Ne mùshindù ùmwèpelè uwìkalaku mwà kumanya cyà djenja, cyùdì ukèba aci; pawìkala ukèba Yesù, neùtàngile ku Dìyì, bwalu Yèyè ùdì Dìyì. “Yòyì ayi ki Yìdì yìmfidila Mémè bujaadiki. Kenkètaayi Mifùndù.”

²⁵⁵ “Nudi nwamba munùdì. . . beena kwitabuuja bàà bapròfetà, kàdì nudi bàà tatwènú dyabulu. Baatatwènú, bàdì bamba abu; pàvwa Nzambì ubàtumina bapròfetà, bàakabèèla mu lukìta. Bóbò–bóbò kushebeya bapròfetà. Yònsò uvwa mulwe,” mwàkambà Yesù, “nganyi wà kùdìbo uvwa baatatwènú kabàyi baase mabwe? Nènku nenwenze byenzi byà tatwènú.” Amen! Bantu baakàne, bantu bàà cijila, muntu ùdì wèwè kuyi mwà kufunkuna munu to, kàdì Yèyè wàkabàbìikila ne “nyoka ne badémòns.” Nwamònu anyì?

²⁵⁶ Cyùdì ukèba ncinyì? Pawìkala ukèba muntu kampànda wa kaneemu kàà ntèndeleeleu? Bàmwè bantu bàtu beela meeji ne bwalu Nyumà Mwìmpè ùdì ùkwàcila mudimu munda mwèbè, bivwa bikèngela wikale muntu kampànda mulemule, wa kaneemu kàà ntèndeleeleu, unyùngùluka utwa eku utwa eku ne kuyi nànsha mene. . . Aci kí n’Nyumà Mwìmpè to. Nzambì katu ùkwàta mudimu ne banjèlo bàà nànkú to, anyi bàà ku dínà to. Nzambì ùtu ùkwàta mudimu ne bantu. Bible mmwambe ne: “Elìyà uvwa muntu muswikìibwe ku nkuka bu twètù,” kàdì kanùvwa mwà kwìkala nendè kanùyì bamòne Yesù to.

²⁵⁷ Peetèlo ne Yone, ku ciibi cìvwàbo babìikila ne n’Cilengèle aci. Nènku pàakabàpulumunabo kuntwaku bwà dyondopiibwa dyà muntu awu, “Bakaavwa bajingulule ne mbapangi, kabàyi balonge mukàndà to, kàdì bàakajingulula kàbìdì ne bàakavwa

ne Yesù,” nwamònu’s, bwalu Mwoyi Wèndè uvwa munkaci mwà kudileejila munda mwàbò.

Mpindyewu, mbilondeshile ku cyùdi ukèba.

258 Mukàji awu uvwa mubala Bible. Ûvwa mumanye ne kuvwa Maasiyà uvwa ne cyà kulwa, ne ùvwa mumanye civwa Maasiyà awu mwà kwenza. Nènkù Yesù mmwenze ànu umwambila ne: “Ntwàdilèku mâyi à kunwà.”

Yèyè ne: “Kacitu cilèlè to.” Ànu Muntu wetù wa patupu ewu.

259 Mpindyewu, bu ne Ûvwa musòmbe mwaba awu ne muzabi munène menemene pambidi, ne bilengejilu byà mishindù yònsò pambidi Pèndè, byà—byà muntu kampànda wa cijila, mòna’s, mukàji awu’s uvwa mufwànyine kwikala mwambe ne: “Èè, s’ki mwakwidi nyèyè wàwa,” nènkù muye. Anyi ne: “Wawa’s nlaabi kampànda’s,” mukeba kwa kuya muye.

260 Mwambi, cintu kampànda; leelù ewu, mèmè kumòna muntu mulwè bwà kudyà, mwaba wùmvwà mukadyà. Nènkù muntu kubwelaye, ùvwa—ùvwa ne nkuruse mivule ne bintu pambidi; misangu mikwàbò ncintu cìmpè pàdi bantu abu ne byà nànkù. Ndi ngeela meeji ne bìvwa bikèngela bwà wèwè kwikala ne nsòmbelu. Kabyena bikèngela bwà wèwè kwikala ne bilàmbà byà butèndeledi bûngi cyanààna to, bwà kujaadika cyùdi. Misangu mikwàbò bàtu bànwà maala, benza ndambu mukumbane wa maalu a lukutukutu, bànwà mfwankà, ne bikwàbò byònsò, bikèngela bavwale bilàmbà byà butèndeledi bwà kumanya nànsha ne mbyaiishi anyi to. Ncyà bushùwà.

261 Nyawu nzwambila, bilàmbà byà butèndeledi byà muntu kuvwàlayè ndibatiiza dyà Nyumà Mwimpè. Aci necikumanyishishe ne uvwa ne Yesù! Ncyà bushùwà.

262 Mpindyewu, tudi tujandula ne, aci ncilàadile ku cyùdi ukèba. Muntu muvwale bu kapènzù, pelupelu, muzàbi wà mùshindù kampànda; kwàdyàkuMumònaku to, bwalu Yèyè uvwa ànu Muntu wetù wa pàtupù ewu. Nzambi ùtu ùkwàta mudimu ne muntu. Yesù ùvwa Muntu; Nzambi uvwa munda mwà Muntu, ne Yèyè uvwa Nzambi.

263 Mpindyewu, tudi tujandula ne mukàji ewu, pàakamònaye cimanyinu cidì kacyi cyùmvwikà eci, mu mùshindù wà ne Yèyè uvwa mwà kumwambila cìvwaye mwenze cìvwà cibì aci, anyi cìvwà pa mwoyi wèndè, wàkamanya ànu dîbà adi ne ùvwa m’Maasiyà awu. Pa nànkù, pàakatàngilaye kùdì Yesù, kumònaye Maasiyà awu.

264 Maasiyà awu, byenzedi byà Maasiyà bìvwa cinyi? Ûvwa mufwànyine kumanya mìnsokòntù yà mu mwoyi. Aci ncinubwele ànu menemene anyi? Ndi ndikonka ní nwìkalakù mwà kuumvwa. Bu nwènù mwà kuMukèba, dilòlò edi, nuvwa mwà kukèba cinyi? Yèyè uvwa mwà kwikala umweumwe awu. Maasiyà n’Diyì, Diyì adi! Ne Bible mmwambe, mu Ebèlu

nshapita mwi4, ne: “Díyì dyà Nzambì dìdì ne mwoyi, ne bukolè kupita mwele wà mvitá wà nseke yibìdì, dikosa too ne ku ditapulula dyà mufùbà, ne dijinguludi dyà meeji àdì mu mwoyi.”

²⁶⁵ Nènku pààkamanyàye ne Maasiyà ùvwa ne cyà kwikala Díyì adi dimwènèshiiibwe, ne uvwa mwà kumwambila civwa cìmutàcisha, wàkamanya ne ùvwa m’Maasiyà. Kabìyi mùshindù ùvwaye muvwàle to, kabìyi bwà búngì bwà tùlasa tùvwàYe mulonga to; kàdi, ku cimanyinu cyàkamuleejaYe ne, Yèyè ùvwa Maasiyà. Pààkamònaye Yesù, wàkamòna Maasiyà awu; Nzambì mu Muntu, bu mwàkalayiibwabi bwà cikondo cilaaba maanyi aci.

²⁶⁶ Kàdi nudi bamanye mùdì bwalu anyi? Bààbúngì, bàà ku bikondo bìmwèbìmwè byà bwena bìndì mwambe abi, kacya kabààkamònaku cintu aci to. Bààbúngì bàà kudibo kabààkacimòna to. Byà mwomùmwe leelù ewu. Bààbúngì kabààkajingulula Mòsà to. Bààbúngì kabààkajingulula Eliyà to. Bààbúngì kabààkaji-...Kabààkabàjingulula to ànu pakààvwabo baye, dìbà adi kucijingululabo.

²⁶⁷ Mwena bupidya wàkamòna, mu matùkù à Noa, bupidya butangile ànu ku cinyi? Ngǎnwǎmbìdì cyàkamòna mwena kwitabuuja, mpindyewu twǎnji tumònaayibi cyàkamòna beena bupidya. Mu matùkù à Noà, cyàkamòna beena bupidya ncinyi—cyàkamònabo kale wàwa pààkatàngilabo? Bààkamòna “mukoleshi wa maalu, ukutakanangana ku dyanza dyà civwabo bàbiikila ne mbwatu.” Ki cyònsò cyàkamònabo aci’s. “Muntu kampànda mupàle wa kale mwikàle ne mwedi mule mutòoke tòò, uvwa mujimije lungenyi, ne, ùbengangana ne bukebikebi bwà maalu à mamanya ne cijaadiki, wamba ne: ‘Kùdi màyi muulu mwàmwa.’ Mòna’s, mukwacikwetù mukulakaji awu!” Bòbò kumuumvwila luse. “Mulekelaayi; yèyè, nebàmwambe ne mmupàle àbìdì àdì panshi aa. Mmujimije lungenyi.”

²⁶⁸ Kàdi yèyè uvwa ne Díyì dyà Mukalenge. Ùvwa mumònangane ànu ne dyanza dyà bwatu, mukònamepù, eku Nzambì munkaci mwà kuleeja cijaadiki cyà ne mvula ùvwa ne cyà kuloka. Civwa cimanyinu kudibo. Aba bààkabènga kwitabuuja bwalu bwà Noà bààkalalakana mu mîdimà, ne kuupukabo mu lufù, mu màyi, ne lukita lwà iferno.

²⁶⁹ Pâlò, yèyè wàkatàngila musangu kampànda. Wàkamòna cinyi, cyàkamòna Pâlò ncinyi? Wàkamòna “mukoleshi wa maalu kampànda, mupròfetà wa ku dìnà awu, mwikale ne malàbàkànyì àbúngì à disungila dyà ku dìnà’s.” Ki cyèndè cyònsò cyàkamònaye aci; musopi wa bitoci, mupika kampànda mwimane munkaci mwà bantu, wa bwalu wamba mùvwàye yèyè mwine mutùmiiibwe kùdi Nzambì bwà kwenza bishimà. Mòna’s, bàvwa beela meeji ne muntu awu uvwa mujimije... Kwambabo ne: “Mulekelaayi, ní ùdi ubuluka abuluke. Yèyè neà-...S’nebadika ne ‘mmupàle,’ matuku adi panshi aa.”

270 Kàdi yèyè uvwa ne EMU MMÙDÌ MUKALENGE WÀMBA. Beena kwitabuuja, Aalòona, Yoshuwà, ne bààbùngì bàà kudibo, bààkamòna Nzambi mu Mòsà. Nènku byenzedi byà Nzambi, byàkenzà Mòsà abi, ke bwà cinyi bààkamanya ne Nzambi ùvwa munda mwèndè. Bààkatàngila e kumòna Nzambi mu Mòsà.

271 Muntu mubanji awu wàkatàngila ne kumòna ànu menemene ne Yèyè ùvwa Nganyì. Nwamònu anyì? Kàdi yèyè wàkabènga kuMulonda, bwalu ùvwa munange maalu à pa buloba, bitàmbidile, bwà kulonda Yesù.

272 Mbantu babanji bùngì kaayi bàdi mwà kutèèleja mukàbà wa mèyì ewu, wà mùshindù awu! Kabyena bikèngela bwà kwikala misangu yònsò ànu babanjìke mu mfranga to; to, udi mwà kwikala mubanji mu dyalakana, mubanji mu bisànkàsanka byà mwoyi ewu. Mbantu balùme bùngì kaayi, nsongààkàjì bùngì kaayi, ne nsongààlùme bùngì kaayi, biikala kabàyi mwà kupaana luumu lwàbo lwà kayowà-bayombo kampànda, anyì Ricky kampànda mwikàle ne kasanji kàà kaabandyo anyì cindaala, ùpàtùka ùkacyonkòmoja ne maja kampànda a bìdùndadùnda, anyì maja kampànda adiyè mwà kuja awu's! Mbanganyi bàà kudibo biikala mwà kulaka mukana bwà kunana mabanji ààbo à buu lwàkamanyabo, ne babenga, pàdibo bàsòmbe ànu mu masangisha ne batangila Cyanza cyà Nzambi cikwata mudimu ne cikòbola Dìyì Dyèndè! Mbanganyi bàdi baswe kucyenza's!

273 Yèyè kusungula dingumba dyèndè. Ùvwa mwà kwikala ne mwoyi ku dyòdi adi. “Yesù uvwa mukoleshi wa maalu,” bwà dingumba dyèndè. Nènku bivwa bikèngela anyì bwà yèyè kwangata cìvwà Yesù mwambe, anyì bìvwà bikèngela bwà yèyè kwangata. . .

274 Bwà cinyi kààkayaku kùdi mwakwidi wèndè, kwamba ne: “Cìndi mwà kwenza ncinyì bwà kupeta Mwoyi wà Cyendèlèlèlè?” Ùvwa mumanye ne mwakwidi awu kavwa mumanye kantu nànsha kàmwè pa Cyòci aci to.

Ki kulwaye kùdi Yesù, e kwambaye ne: “Cìndi mwà kwenza ncinyì?”

275 Yesù kwamba ne: “Lamà mèyì matuma.” Kumwelaye cilumbu pambidi.

Yèyè ne: “Nkaadi mwenze aci.”

276 Yèyè ne: “Lamà mèyì matùma.” Nenku, yèyè kavwa ànu ne Mwoyi wà Cyendèlèlèlè to, ne uvwa mumanye ne kavwa naawù to. Udi mwà kulama mèyì matùma wònsò, kàdi kwèna mwanji kupeta Mwoyi wà Cyendèlèlèlè to, nànsha nànkù.

277 Ki Yesù kwamba ne: “Mpindyewu wèwè muswà kwenza cidi cijaalame, nda ùkasumbishe byùdi naabi abi, ne ubifile kùdi bapèlè. Ulwa, undondè Mèmè.”

278 Kàdi aci cìvwa citàmbe kwikala cikolè bwèndè yèyè. Nwamònu anyi? Tudi tujandula ne yèyè wàkatàngila e kumòna ne Ùvwa Nganyì, kàdi nànsha nànkù wàkabènga bwà kuwàngata. Kàdi kwende kutàngila kwàkalonda kùvwa mmu iferno, ubàndisha mèsù muulu e kumònaye Lazàrò mu cyàdi cyà Abraham.

279 Pilaatù wàkatàngila, musangu kampànda, pààkaMutwàlàbo. Kacya kavwaku mwanji kuMumòna kwònsò aku to. Byanza Byèndè biswika; mashi biMupatuka mu mwongo; cifulu cyà mèbà ku mutù Wèndè. Pilaatù wàkatàngila, ne kutwishiibwaye.

280 Bwalu, mpundà wàkalwa wènda untumpika upweka ne mùsèsù, ne mumubandi kutuulukayepù, ne kwasa lubilu wàmba ne: “Mòna’s, mukàjèèbè nyewu mukutumine mukàndà.”

281 Nènku kuwùtàngilaye, ne mukàji ùvwa wàmba ne: “Pilaatu, bayaanyi munanga, kubwelakanyiku ne Muntu mwakàne awu to, bwalu leelù ewu ndi mukenge bikolè menemene mu cilòòta bwà bwalu Bwèndè.”

282 Kuzakalaye. Binù byèndè kukùmàkananganabi. Ki yèyè ne: “Pìikalabi ne Wèwè udi Mwànà wa Nzambi, pìikalabi ne Udi Mfùmù, bwà cinyi Wèwè kwèna wakula? Udi Mfùmù wa Izalèlèlà anyi?”

Yèyè ne: “S’ngwèwè awu ucyàmba’s.”

Yèyè ne: “Twámбилè bulelèlà.”

283 Yèyè ne: “Ndi mulediibwe bwà bwalu abu’s.” Ki Pilaatu kukàcilaye. Yèyè. . .

284 Bwònsò, bantu bònsò, bàvwa bàsèngeleela ne badila myadi ku makàsà èndè. Yèyè ne: “Ndi ne bukòokeshi bwà kuKushipa, anyi ndi ne bukòokeshi bwà kuKulekela.”

285 Yèyè ne: “Kwena ne bukòokeshi bwà cintu nànsha cìmwè, amba ànu bòbù bukupa kùdi Taatù Wanyì.” Yoyòyò!

286 Mukalenge, ùvwa mutwishiibwè ne Awu ùvwa mutàmbe ne muntu. Ùvwa mutwishiibwe menemene ne Cìvwa citàmbe ne muntu. Ncyà bushùwà ne, ki cìvwaye. Kàdi (cinyi?) cidiidi cyèndè ne dimanyika bivwa bitàmbe bunène. Nwamònu’s, kuMudyombolaye. Dimanyika dyèndè dìvwa ditàmbe bunène. Cidiidi, milongo yèndè yà mu nsòmbelu, bivwa bitàmbe bunène, bwà kwitaba mukoleshi wa maalu ewu.

287 Ndi ndikonka ne mbùngi kaayi bwà baa Pilaatu bìikala munkaci mwà kutèèleja eci, bwà ne mulongo wèbè mu dingumba kampànda newikale mutàmbe bunène, bwà kwitaba Mukalenge Yesù mulelèlà mwimane pa kaaba kadiYe leelù ewu aka.

Musalaayi wa beena Loomo, ku nkuruse, wàkatàngila Yesù.

288 Paanyimà pàà buloba bumanè kupeta disaamà dyà mutù munyunguluke, kunyukushiibwabu mu mùshindù wà

ne mbwebwe kutùùkayo ku mikùna. Ki dībà kubweladi mundaamuunya, ne kwandamukadi mīdimà. Mitootò kayàkapatuka bwà kufila bukênkè bwàyì to. Nènku buloba kutaayikabù ne mbwebwe ne dizakala dyà buloba. Ki mikenyi ya nzaji ayi kutàmbàkanayi mu maulu; ne kupandayi cilàmbà cikudika cyà mu ntempelu kuumukila kuulu too ne kwinsi. Nènku, bantu kunyeemakanabù bènda beela mbila mikolè, kabàyi bamanye ne cìvwa cyenzeke ncinyi to.

²⁸⁹ Nènku musalaayi wa beena Loomo wàkambulwisha bwà kuMupoopelabo musonso mwaba awu, wàkamutwa mwele wa mvità munda mwà mwoyi Wèndè, pashìshe kutàngilaye, kàdi dībà dikaavwa dimane kupìta. Kutàngilaye ne kwitabuujiye, kàdi dībà dikaavwa dimane kupìta bwà kwitabuujiyè. Cìvwayè mwenze aci cikaavwa cikose bwalu bwà kabùtù kèndè; yèyè ùvwa mutwè difuma mu mwoyi wà Musùngidi. Kakucivwa kabìdì dībà to.

²⁹⁰ Ndi ndikonka ne mbeena Loomo bùngi kaayi leelù ewu bàdi benze cintu cìmwècìmwè aci, ne biikala mwà kwenza cintu cìmwècìmwè aci. Udi mufwànyìne kutàngila, dīngà ditùkù, kàdi mbifwànyìne kwikala ku shòò. Bààbùngì bàà leelù ewu nebàlwe mu ditùkù adi ne nebiikalè mùshindù wùmwèwùmwè awu. Mbamanyè.

²⁹¹ Mwanèètù Wood ewu; makèlèlèlè awu. Ndi ngàmba eci ànu bwalu cìdi mu Mukenji ewu. Lwà kwinsi ku Cyàpu cyà Slider eku, kùvwa mwena Kàtòlikè kàà cyena Loomo musòmbekù. Ùvwa muyaku bwà kupeta dibwe dyà nshàmenda bwà èkèleeziyà mwab'ewu, nènku, pàakayaye, wàkamwambila mwaba uvwaye umukebela. Kàdi mwena Kàtòlikè kàà cyena Loomo awu kwambayè ne: “Awu m'Mwanèètù Branham anyi?”

“Èyowà.”

²⁹² Yèyè ne: “Nèngàmbè cintu cìmwèpelè; pàdiye usambila, Nzambì ùtu wàndamuna.” Nwamònu anyi?

²⁹³ Ndi ndikonka pashìshe ne, mwikàle mucimanye, umòna dishindika dyà ne bushùwà ng'Èvànjeeliyò, kí mmémè to; muntu kanà yònsò uleeja mpàla wa Kìlistò. N'Dìyì ditùdì twamba, kí mmuntu to.

²⁹⁴ Cìndì nteeta kwamba ncinyi? Eci, mbwena kwamba ne, bàdi bamòna Dìyì dishindika bitòòke tòò, mùvwà Pilaatu ne bakwàbò abo bamòn'amu, bu mùvwà musalaayi wa beena Loomo amu, kàdi newikale mwà kwindila too ne ku shòò bwà kwenza ní ncinyi ní ncinyi pa bwalu abu anyi? S'ùvwa kwikala mukwate mudimu ne difùma adi mùshindù mukwàbò. Biibi nebiikalè bikànga, bu mùvwàbi mu matùkù à Noà, ne pashìshe dībà ndimane kuya. Udi mufwànyìne kutabuluka dīndà kampànda, e kwamba ne: “Ndi ne meeji a kupàtùka mu cimvundu eci.” Kwindidi ntàntà mupitepite bule to. Cìmpè cyà wèwè kwenza nkutangila bwà kwikala ne mwoyi mpindyewu.

295 Luther wàkuumusha mèsù ku dingumba dyà Kàtòlikè. Cyàkamònaye cinyi? Dikunji dyà Kapyà. Wàkamòna èkèleeziyà mudìshikàmìne.

296 Wesley wàkuumusha mèsù ku dingumba dyà ba-Anglicans. Kumònaye cintu cimwècimwè aci.

297 Mpenta wàkuumusha mèsù ku mangumba ònsò. Kàdi wàkalwa kushaala cinyi? Bantu banène, bàà bukolè.

298 Muntu ne muntu wa kùdìbo wàkenza cinyi? Pavwa bajuudi abu, Luther ne Wesley, ne bakwàbò, nènku pààkacyùngululabo mèsù ne kumòna cyàkenzabo ne kutwàdija aci; bàna bààbò, bàvwa balwa paanyimà pààbò, kwalujabo mèsù paanyimà kùvwàbo bafùmìne, balòpòke mu dingumba, ne kwalujabò musumbà wà bantu awu buludi ànu mu cimvundu cimwècimwè mùvwàbo bapàtùkile amu.

299 Nwènù nudi batàngile ku cinyi? Bajuudi bàdi batàngila mudibi bikèngela. Kàdi bantu, bàvwa bàbàlonda abu, bààkapingaja mèsù paanyimà mu cìvwà bajuudi bapàtuke amu aci, ne kwenza ànu menemene cìvwà bajuudi babenge aci's; balaaba maanyi bàà Nzambì abu.

300 Nudi bamanye's, bikèngela ndwijakaje, bwalu mulongo wà babèèdi mmungindile, ne ndi mumanye ne bààbúngì bèènù bàdi ne cyà kwenza lwendu.

301 Dìngà ditùkù mèmè kutàpa dísù. Mèmè kumòna Dìyì divwijìbwe mubidi. Mèmè kumòna Alpha ne Omega. Kacya ncitu mumònaku bantu bàsàtù, bànaayi, anyi bàtaanu to; ngàkàmòna Umwe. NgàkàMumòna bu Musùngidi wanyì. NgàkàMumòna, Dìyì adi. NgàkàMumòna, Bukènkè abu. NgàkàMumòna, Nzambì wa Bukolè awu. Mèmè kumòna Nzambì mu Yèyè. Ngàkàmòna Dikunji dyà Kapyà. Ngàkàmòna, mu Yèyè, ànu menemene cìvwà Bible mwambe ne ki cìvwaYe aci. Ngàkàmòna ne Yèyè ùvwa Alpha ne Omega, ne Yèyè ùvwa Dikunji dyà Kapyà. Yèyè ùvwa umwèumwè awu makèlèlèlè, leelù, too ne kashidi. Ngàkàmòna cyàkambilabo Yone, kùdi Dikunji dyà Kapyà ne: "Bwikadi Bwèndè bùtù kabùyìkù bupangila abu." Bu mwàkambaye mu Yone amu, kuntu kwàka ne: "Ne Bwikadi Bwèndè bùtù kabùyìkù bupangila abu kabwàkunùshìyakù to." Mwanèètù, wanyì mmwenenu dilòlòlò edi, kwimba musambu awu ne:

Tàngila wikale ne mwoyi, wèwè mwanèètù wanyì, ikala ne mwoyi's!

Tàngila mpindyewu kùdi Yesù ne wikalè ne mwoyi;

Bwalu mbifùndìbwe mu Dìyì Dyèndè, àlèluuyàh!

Bìdi ànu ne wèwè "tàngila ne wikale ne mwoyi."

302 Tàngilààyi! Nudi numòna cinyi? Nudi numòna disungidiibwa anyi? Nudi numòna cidiYe anyi? Tàngidilààyi mu Díyi numòne cyàkadiYe, díbà adi nutàngidile mu Díyi òm̀wèdimwè adi bwà numòne ne Yèyè ùdi umwèumwè awu leelù ànu muvwaYe musangu awu amu. Yèyè ùdi mubidi wà bwalu wà nyoka wa cyamu cyà mitaku mu cipèèla, bwà kabingila kàmwèkàmwè aku, mpèkaatù ne disaamà.

303 Yudaàsa kutapaye disù, dingingà ditùkù. Kàdi mmwenze ànu utangila anyi, paanyimà pàà yèyè mumane kuMutangila byà bimpè menemene. . . Yèyè uvwa ànu utangila ku cibùcilu, kumpàla kwà cyòci aci, difwètà dyà mfranga òwàbò naadi. Kàdi dingingà ditùkù pàakatàngilaye ne kumòna Yesù, nudi bamanye ciwwaye mumòne anyi? Wàkamòna ne ùvwa mupùile. Wàkamòna ne kavwa mukùm̀bànyine kwikala ne mwoyi to, nènku yèyè kudyòwa.

304 Mu dindà kampànda, òmwè dyà ku maadindà à matàmbe bunène mu maalù malonda ònsò à cikondo. Bwà kujikija, ndi ngàm̀ba nùnkù. Kùdi cintu kampànda munkaci mwà kwenzeka mu Yelusàlèmà, nènku dyàkàm̀wè musumbà wà mäsàlaayi kupwekawu ku—ku bùlokò. Ndi mwà kuumvwa didilakana dyà—dyà minyòòlò; kuumvwa didikòka dyà difumà mu mùsèsù awu.

305 Udi paanyimà apu nganyi? Baalàbààsà. Ùkaadi pabwìpi ne kufwà. Mmwibi. Kì mmuntu mwimpè nànsha. Mmwena mucima. Mmushipyanganyi. Ùdi ne cyà kufwà.

306 Katanci aka anyi, yèyè ne: “Èè, kwànyì’s kwàjiki. Nènshipiibwè mu dindà emu.”

307 Katanci aka anyi, mulami awu kukàngula ciibi ne: “Baalàbààsà, patuka.”

Kupàtukaye kwamba ne: “Èè, ngeela meeji ne bwànyì bwàtùùkù’s.”

Yèyè ne: “Baalàbààsà, kakùyi mpatà to udi mudishikamine.”

“Cinyi? Ndi cinyi? Ndi. . .”

“Mudishikamine kakùyi mpatà to! Bàkulekedi,” ke mùndi mwàmbe.

Yèyè ne: “Mmunyi mùdìbo mwà kundekela?”

308 Yèyè ne: “Èè, lwìla apa, Baalàbààsà, tàngila kuulu kwàka. Udi umòna Muntu udi ùpunga ne lufù kuntu kwàka wàwa anyi? Yèyè mmwàngate kaaba kèèbè.”

309 Ndi ndikonka ne twètù bònsò aba, dilòòlò edi, ní tudiku bafwànyine kutàngila ne kumòna cyàkamòna Baalàbààsà, muntu kampànda wàngàta kaaba kèètù? “Wàkatàpiibwa mpùtà bwà dishipa dyètù dyà mikenji, muzaajìibwe bwà bubì bwètù. Dinyooka dyà ditalala dyètù dyàkaponna pambidi Pèndè; ne ku mibùndàbùndà Yèndè,” mèmè kwondopiibwa, wèwè

kwondopiibwa. Ndi ndikonka ne twètù aba, bàdi bapìile aba, bàvwa ne cyà kwikala bàsaama, tudi mwà kumòna mu Yèyè disùngidiibwa dyètù anyi? Nwènù bàvwa ne cyà kuya mu iferno; kumòna mu Yèyè budishikaminyi bwènù, njila wenù wa kuya mu Dyulu. Ndi ndikonka ní nudikù mwà kumòna cyàkamòna Baalàbààsa mu ditùkù adi aci?

³¹⁰ Yèyè wàkamba ne: “Katanci kakesè aka bàà pa buloba kabààkuMmòna kàbìdì to, kàdi nwènù nenùMmòne.” Kaa, èkèleeziyà! Pashìishe, Byòbì ne Wàkamba ne: “NenùMmòne,” aci’s ncijaadiki cyà ne udi mwà kutàngila cyàkàbìdì. “NenùMmòne, bwalu Nèngiikalè neenù, munda mwènù mene, too ne ku nshìikidilu kwà buloba.” Dìbà kaayi? Nudi nuMumòna bishi? Ku Dìyì. Yèyè ùdì Dìyì. Tàngilààyì ku Dìyì bwà numòne cìdì mulayi, bwalu Yèyè ùdì umwèumwè awu makèèlèlè, leelù, too ne kashidi.

³¹¹ CìvwaYe pàvwàYe wènda mu Ngalèlè apu, ncintu cìmwècìmwè aci cìdìYe dilòòlò edi mu Jeffersonville emu, ncintu cìmwècìmwè cìdìYe ku Branham Tabernacle. Cìnùdì nukeba kumòna ncinyì, mujuudi, muntu wa cyena mangumba anyi? Kanwàkucìmònaku mu Yesù to. Nudi nutàngila bwà kumòna mwakwìdì munène kampànda anyi? Kanwàkucìmònaku mu Yesù to. To. Nudi numòna Yesù bishi’s? Ku Dìyì dyà Nzambì dimwènèshìibwe, bwalu Yèyè uvwa Dìyì dyà Nzambì dimwènèshìibwe. CìvwaYe musangu awu aci, s’ki cìdìYe dilòòlò edi, ne ke cìikaleYe kashidi.

³¹² Twinyikààyì mitù yètù bwà katanci kakesè cyanàànà. Nèngiìpidijèku eci ndambu’s.

³¹³ Mukalenge Yesù, ki disambila dyànyì ndyòdì adi, lekelàku ngùmushe mèsù àànyì ku maditacisha à mu nsòmbelu. Mukalenge, ndi—ndi mumanye ne tudi ànu bantu bèètù bàà pàtupù aba, kabàyi balonge kàlaasà to. Katwèna ne bintu byà pa buloba ebu byàbùngì to, kàdi tudi baKunangè, Mukalenge.

³¹⁴ Nènku ndi ngààkula bwà cisàmbà eci. Kì mbafwànyine kusòmba mu mwaba bu nùnkù, babàmbàkànàngàne ne bafinàkàne, ne munkacì mwà bisùmbù emu; ne basòmbè, bòòshika ne luuya, mu—mu luuya; anyi bàkanka ne mashika, ne biimane mu . . . ne balwa ne bàna bààbò balela ne bakwàbò, basaama ne mu ntàtu, balwa mwab’ewu; bòbò balwe mwab’ewu bwà kumòna cìngà cintu pa kuumusha Wèwè to. Bantu abu, Mukalenge, kì mbafwànyineku kulwa bwà kumòna muntu to. Kudi bantu bùngì cyanàànà mu mùsèèsù; bònsò’s mbafwànàngàne.

³¹⁵ Kàdi bàdi balwa bwà kumòna Muntu awu, Muntu wa Nzambì awu, Yesù wa mu Nazalèeta wa mubidi awu, mwikale Nzambì. Mpindyewu, Taatù, Wèwè udi mutwàmbile ne: “Katanci kakesè, bàà pa buloba kabààkuMmòna kàbìdì to,” nànsha bòbò batàngile bishi, kabààkuCimòna to. Kàdi Wèwè wàkamba ne:

“Nwênù nenùMmòne,” mwena kwitabuuja mulelèlà, “bwalu Mémè nêngiikalè neenù, munda mwènù mene, too ne ku ndekeelu kwà buloba.” Wèwè utu mutùlaye ne, twètù batàngile, tudi bafwànyine kumòna. Nènku ndi ndòmba, dilòlòlò edi, bwà Wèwè kutùkumbajila cyàkàbìdì Mufundù awu dilòlòlò edi, bwà twamòna mwà kutàngila ne kumòna Yesù uDimanyisha kutùdi, mu mùshindù ùmwèùmwè ùtùYe uDimanyisha misangu yònsò awu, mwikale uuja Dìyì Dyèndè, kubangila ku mpindyewu, Mukalenge.

³¹⁶ Ki mèmè kwamba dìyì kampànda, kumpàla kwà cyòci eci, ne ncyà bushùwà ne ndi mwambe bintu ebi byùmukila munda mwà mwoyi wànyì, pa bìdì bitàngila Nkokelu ayi, ne Wèwè ngutù mungambile. Nènku mpindyewu, nànsha mùdìbì bimweka kabìyì byumvwika to, bu twètù ànu mwà kukàmaku kondo kèètù kàà mwoyi, ne kumòna ne bintu abi kabivwa mwà kwikala bìdyanjila kwamba, ànu mu byòbì menemene mùdìbìemu, bu kabìyì bifumina kùdì Nzambì to.

³¹⁷ Mmunyì mutùvwa mwà kumòna ne cintu Cyàkumpàla aci ncyenzeke? Mmunyì mùvwa Ciibìdì mwà kwenzeka? Mmunyì mùvwa Ciisàtù mwà kwenzeka? Mmunyì mutùvwa mwà kwimana mwab'ewu, ngondo ne ngondo kumpàla kwà kwenzekaci, ne kwamba civwa mwà kwenzeka mu Tucson? Ne mùvwcì mwa kukangula Bitampi Mwandamutekète, ne kwaluja bwalu-busokoka abu, ne kubuulula bintu bisokoka byà Nzambì, bìvwà bisokoka ànu kacya ku cibangidilu cyà cikondo abi. Nènku pa kubimòna, bijaadikìbwe, ne bifidila bujaadiki, ne bishindika kùdì maalu à mamanya!

³¹⁸ Mukalenge, Wèwè ki cyètù cinyeemenu ne dikàndà. Wèwè ki cyònsò citùdì naaci. Nènku ndi nKwela twasàkidila, bu mündì, Mukalenge, citùpà cyà cibucilu Cyèbè cinène eci. Ndi nKwela twasàkidila, bu mündì cidimba cyà Mubidi Wèbè, pàmwè ne bààbúngì mwab'ewu bàdì bidimba byà Mubidi awu, bààbúngì pa buloba bujimà mu èkèleeziyà mishìlèshìlàngàne, bàdì bidimba byà Mubidi musokome wa Kilistò awu.

³¹⁹ Musangu wònsò wutùdì tutàngila, tudi tuMumòna! TuMumòna pàdì nyuunyi yimba misambu. TuMumòna pàdì dìbà dipatuka, anyì pàdìdì dibwela. TuMutèèleja mu misambu. TuMutàngila mu bantu Bèndè. TuMumòna mùdìYe ùshindika Dìyì Dyèndè.

³²⁰ Éyì Mukalenge wa yààyà, Wèwè's udi Nzambì wetù. Ne dindà bwè netùKusoke. Wèwè udi Taatù wetù wa luse. Utufwile luse ku bilema byètù.

³²¹ Mukalenge, tukaadi ku cikondo cyà nshìkidilu. Ndi mmòna ne biibi ne bikangiibwe kataàtaaka, biibi byà mpùngà. Nènku pàcìdì kwìsù kutòoke apa ne pàncìdì ànu mwà kubwela mu yimwè yà ku myaba eyi, Mukalenge, nkwacisheku bwà mèmè kuya. Nyewu nkààdì nkùlakaja; mpèesheku makàndà.

Vwijilulaku bunsonga bwànyì bupyabùpyà, Mukalenge. Nkwàcishèku, bwà ngàmòna mwà kwenza cintu kampànda kuntu kwaka, mpindyewu, pàndì mwindile bwà cikondo cinène eci kulwaci, ciikalà kaaba aka aci apa. Nkwàcishèku, Mukalenge, pàndì mpatuka apa, bwà ngàmòna mwà kukumbana, mu mùshindù kampànda, mwà kubàkùlaku Dimiinu didyànjila kulongolola dyà ndekeelu adi, diikalà mwà kwaluja Mukalenge Yesù. Nkwacishèku, Éyì Nzambì wa yààya!

³²² Nènku piikalabi ne ndi munkaci mwà kwasa cishimikidi bwà mukwàbò wâlwa kwimanapù, enzaku, Mukalenge, bwà ne cyènzeka kataataka, bwà Dìyì dyàmòna mwà kùla.

³²³ Dijinga dyà mwoyi wètù ndyà kumòna Dìyì Dyèbè dyùlè. Tudi baKunangè. Tudi baKwitabùùje. Munkaci mwà bantu bàdi kabàyi biitabuujà, bàà mpatà, lukongo lwà—lwà—lwà citùdi naaci leelù ewu elu, Mukalenge Nzambì, tucidi ànu twitabuujà ne Dìyì Dyèbè kadyàdyàkupangilaku to. Tudi twitabuujà, ne: “Maulu ne buloba nebijimine, kàdi Dyòdi kadyàdyàkupangilaku to.” Tudi twimana ne dikima dyònsò bwa Cyòci aci.

³²⁴ Mpindyewu, Taatù, bwà kasumbù kakesè kàdi kindile aka. Kudi babèèdi bààbùngì mwab’ewu. Ne kùdi mwà kwikala udi kàyi musùngidìibwe mwab’ewu. Bantu bàkààdi basùngidìibwe, kàdi kabàyi buujìibwe ntètè ne Nyumà Mwimpè to. Mukalenge Nzambì, swaku bwà Ùmateku mu cyalu, ku Dìyì Dyèbè dyà mulayi, bwà bantu bàtàngile ne bàmòne Yesù, ne pashiishe biiname ne bàfile myoyi yààbò kudiYe. Swaku bwà babèèdi bàtàngile ne bàmòne ne kabyenaku mwà kwenzeka bwà cingà cintu kwenzaci nùku to, ànu Nzambì nkààyende, bwalu n’Dìyì Dyèndè dyà mulayi.

³²⁵ Citùdi bambe leelù ewu, Mayiisha ònsò àbìdi, swakukù bwà kushindikiibwabi mpindyewu. Byònsò bìdi mu byanza Byèbè, Mukalenge. Ne mèmè ndi mu byanza Byèbè. Ne di—disangisha didi mu byanza Byèbè. Kwacilaku mudimu munda mwètù, Mukalenge, bwà kutwà Dìna Dyèbè dinène mushinga. Éyì Wa Cyendèlèlè Wànyì, enzakù eci bwà butùmbi bwà Nzambì. Amen.

³²⁶ Ndi mumanye ne kùdi luuya lukolè, nènku ndi muswè kuteeta kusambidila babèèdi mpindyewu. Nènku bu nwènù mwà kumpaku tusunsa tutwè ku dikumi ne tutaanu, anyì makumi àbìdi, Ncyèna mumanye bùngì bwà twarta tùdibo baabànye to, kàdi netwikale ànu ne cyà kubanga kusambidila babèèdi.

³²⁷ Mpindyewu, Billy mmungambile ne mmufile, civwa ncinyi? [Muntu kampànda ùdi wàmba ne: “Ùmwè too ne ku lukàmà.”—Muf.] Lukàmà- . . .Ncinyi, cinyi? [Muntu kampànda ùdi wàdamuna.] Éyo. Èè, tùbàngààyi. Mmwambe ne mmufile ku ùmwè too ne ku lukàmà. Mbanganyi bàdi ne twarta twà disambila mwab’ewu? Elààyi byanza byènù muulu; twarta twà disambila. Èè, mbavù. Netùteete bwà kufika ku cyònsò citùdi

ne mùshindù wà kwenza aci, bu twètù mwà kupeta mùshindù. Mpindyewu, katwèna mwà kwenza ne dijingulula pa bônso aba to, nudi bamanye's, pa nàнку netùsambile ànu cyanààna. Nènku, bantu bônso, mbanganyì kaaba aka bàdi kabàyi ne karta kàà disambila, kàdi biikale bàsaama? Elaayi byanza muulu. Bààbúngì.

³²⁸ Mpindyewu, tàngilààyi. Ncinyì ciine aci? Mpindyewu, ndi mumanye ne, tudi mwà kwikala paanyimà pàà—pàà ndongamu kakesè, ne tusunsa tutwè ku dikumi ne tutaanu, kàdi ndi muswè kwamba cintu cimwèpelè eci. Ncifwànyine kwikala dishiilàngana pankaci pàà, mwab'ewu, kupicishila Cyendèlèlè mu Dyulu anyì mu Iferno. Nwamònu anyì? Tàngilààyi, ikalaayi mu kaneemu ne batàngile, katanci kakesè, teelejàayi Dìyi, bwà kumòna ne Yèyè ùcidi ànu Kilistò.

³²⁹ Mpindyewu, muntu yònsò mwab'ewu pàmwàpa mummanyè. Ne bààbúngì bàà kunùdi ncyèna munuùmanyè to, bwalu ncitu ndwa nshaala apa ntàntà bule bukùmbàne bwà kunùmanya to. Ne bààbúngì bàà kunùdi mbàà pambèlu pàà cimenga. Mbanganyì bàdi bàà pambèlu pàà cimenga, elaayi byanza muulu. Nwamònu anyì?

³³⁰ Mpindyewu, mvwa mukonke muntu kampànda mu cimenga emu, ditùkù adi, mèmè kwamba ne: “Kacya ukàadikù mulwe anyì?”

³³¹ Yèyè ne: “Kabyèna ne dikwàcisha bwà twètù kulwa to.” Yèyè ne: “Kudi bantu búngì cyanààna bàà pambèlu pàà cimenga eci, bàdi bàlwamu, katwena ne mushindu wà kubwela to.” Nwamònu anyì?

³³² Kàdi aci—aci cidi ànu cimpè. Netùbàlongolwele mùshindù wa kubwelabu. Wèwè lwàku, nànsha byà munyi. Mònaayi, bavwa bapete mpùngà kumpàla kwà wèwè kumupeta's. Èyowà.

³³³ Mpindyewu vùlukàayi, mpindyewu, mèmè ndi ànu mwanèènu. Ncyà bushùwà ne nudi bumvwe aci. Mèmè ndi muntu; Yèyè ùdi Nzambi. Kàdi ànu Nzambi ngudi mwà kukwàta mudimu, ne ngutu misangu yònsò ànu mukwàtèkwàtè mudimu, ne ùtu mukwàtè mudimu, ànu kupicila ku muntu. Mpindyewu tàngilààyi dilòòlò edi, kí kúndi mèmè anyì kùdi muntu mukwàbò kanà yònsò ewu to, kàdi tàngilààyi kùdi Yesù Kilistò.

³³⁴ Mpindyewu tàngilààyaaku dilòòlò edi ku Mufùndù, cyàkalayaWu. Mbanganyì bàà kunùdi . . . Mèmè ndi mwà kufila ànu Mifùndù yà mishindù yònsò, kàdi mbanganyì bàdiku baswè kwitabuuja ànu Ebelu 13:8, ne: “Yesù Kilistò udi umwèumwè awu makèlèlè . . .”? Kàdi mbanganyì bàdi biitabuuja Yone 14:12 ne: “Byenzeni bìndi Mèmè ngenza nenùbyènzè pèènu”? Nwamònu anyì? Mbanganyì bàdi biitabuuja ne Yèyè wàkalaya ne bintu mene byàkenzaYe abi, mu mùshindù wà “dijingulula dyà meeji mu mwoyi,” bìvwa mwà kwalukila cyàkàbidì mu ditùkù dyà ndekeelu ànu kumpàla menemene kwà Dilwa Dyèndè?

Uh-huh. Bushùwà's. Twètù bônso tudi bacimanye. Èyo. Kaa, mbanganyi bakwàbò, nkama ne nkama ya Mifùndù, kàdi tudi bacimanye!

³³⁵ Mpindyewu tàngilààyì. Kanùtàngidi bwà kumòna mwambi to. Kanùtàngidi bwà kumòna mpaasàtà to. Tàngilààyì bwà kumòna Yesù. Kanùmònu muntu to; mònaayi Yesù. Panùdì nutàngila, nuMumòne. Bu mémè mwà kunwambulwisha, s'ndi mufwànyine kucyenza, kàdi ncyèna mwà kucyèna to. Mémè ncyèna mwà kukwambulwisha to; mémè ndi ànu mwanèènù. Kàdi, Yèyè udi Mukalenge webè, ikala muMutàngile ne witabuujè. Èyo.

³³⁶ Mpindyewu tùbangilaayi ku karta kàà disambila kàà nomba. . . Èè, netùbangile lwà ku nomba umwe. Mbanganyi. . . Nomba umwe, nganyi udi ne karta kàà disambila kàà nomba umwe? Ela cyanza cyèbè muulu. Ùdi penyi? [Mwanèètù wa balùme kampànda ùdi wàmba ne: “Ànu lwà paanyimà pààpa nàka.”—Muf.] Udi uswa kwamba ne webè. . . [“Muntu mukaàji mmwimane kuulu.”] Ngwàwa anyi? Kaa, mfwilakù luse. Èyo. Nomba umwe, lwà kuneeku, inábànzà, cyà bushùwà. . . Mmùshindù kaayi wùdì muswe kulwa naabu, mùshindù ewu anyi? Èyo, lwàku ànu *apa*, bu—bu wèwè mwà kwenda. Muntu yèyè mubiikidiibwe mpindyewu, mwikalà cikalàba, bàmwè bàà kutùdì bàkwambulwisheku bwà kukutwàla kuneeku. Nomba ùmwè.

³³⁷ Nomba ibidì, nganyi udi ne karta kàà disambila ibidì? Ela cyanza muulu, lukasa ne mwèbè mwònsò. Nomba ibidì, ùdi penyi? Ncyèna mmumòna to. Mpenyi? Mfwilaku luse, ncyèna—ncyèna mwà. . . Ànu apa nùнку, inábànzà.

³³⁸ Nomba isàtù, udiku mwà kujuukila kuulu, anyi cintu kampànda anyi? Ncyà bushùwà, nomba isàtù.

³³⁹ Nomba inaayi. Karta kàà disambila nomba inaayi, udiku mwà kwela cyanza muulu anyi? Kàdi penyi? Ncyèna mukàmòne to. Karta kàà disambila nomba inaayi. Wamba ne? Nomba inaayi.

³⁴⁰ Nomba itaanu. Nganyi udi ne nomba itaanu, swaku wèlè cyanza cyèbè muulu? Ncyèna ncimòna to. Nomba itaanu.

³⁴¹ Nomba isambòmbò. Nomba isambòmbò. Lukasa, ne lukasa, nomba isambòmbò. Èyo.

Mwandamutekète. Wèwè, mwandamutekète anyi? Èyo. Mbîmpè.

³⁴² Mwandamukulu. Mwandamukulu, ne lukasa lwònsò mpindyewu. Juuka, ne lukasa. Èyo, mwandamukulu. Abi mbîmpè, mukalenge.

Citèèmà. Citèèmà, ùdi lwà penyi? Nomba citèèmà. Èyo.

Nomba dikumi. Dikumi, èyo, dikumi, ànu lwà apa nùнку. Dikumi.

Dikumi ne ùmwè, dikumi ne ìbìdì, dikumi ne ìsàtù, dikumi ne ìnaayi, dikumi ne ìtaanu.

³⁴³ Nènkù kabààkubìikila bantu bapitepite búngì to, bwà nwàpeta. . . Nwamònu's, citùdì twenzela cyòci eci. . . Cìdì ànu nkarta bafùndepù nombà kampànda, nwamònu's, nènku wèwè udi ulwila ànu ku nombà awu's. Ki cìdì cibàlama mu mulongo.

Dikumi ne ìtaanu. Karta kàà disambila dikumi ne ìtaanu. Èyo.

³⁴⁴ Dikumi ne ìsambòmbò, dikumi ne mwandamutekète, dikumi ne mwandamukùlù, dikumi ne citèemà, makumi àbìdì, makumi àbìdì ne ùmwè, makumi àbìdì ne ìbìdì, makumi àbìdì ne ìsàtù, makumi àbìdì ne ìnaayi, makumi àbìdì ne ìtaanu.

³⁴⁵ Balwe, bèlè mulongo mpindyewu, makumi àbìdì ne ìtaanu, too ne pààkumbana mulongo wènu awu. Mpindyewu juukilaayi kuulu bilondeshile nombà yènu. Ncyà bushùwà's. Kanùlù bònsò dyàkàmwè to. Lwilàayi luseke lukwàbò elu, bu nwènu mwà kuswà, panwikala nusanganyiibwa luseke lukwàbò alu, nènku lwáyì. Mpindyewu makumi àbìdì ne. . .

³⁴⁶ Citùdì babìikilè, mmakumi àbìdì ne ìtaanu anyi? [Mwanèètù wa balùme kampànda ùdi wàmba ne: "Makumi àbìdì ne ìtaanu."—Muf.] Èyo, twikishilààyìbi pa makumi àbìdì ne ìtaanu, ànu bwà katanci kakesè cyanàànà. Èyo.

³⁴⁷ Mpindyewu ndi ngàmba ne, wèwè kuyi muswe kushààla mwimane kuulu ntàntà mupitepite bule to, panùdì numòna cyòci aci cyenda cipweka, díbà adi nudi nubwelamu naabu buludi; makumi àbìdì ne ìtaanu, makumi àbìdì ne ìsambòmbò, makumi àbìdì ne mwandamutekète. Ànu, èè, indilabi, anji lekelaayi mulongo upwekeku ndambu, nànkù kabyàkukèngela bwà nushààle biimane kuulu ntàntà wàbùngì, mupitepite bule to.

Mpindyewu twìnyikàayi mitù yètù.

³⁴⁸ Kaa, balunda bàanyi, mpindyewu eci ncinyi? Mpindyewu tukàadi penyi? Mpindyewu tukàadi ku—ku ndekeelu. Tudi pa díbà dìdì dikèngela bwà cintu kampànda kwenjiibwaci, kwamba ne "èyowà" anyi "to." Bikèngela Nzambì asanganyiibwe wa bushùwà anyi wa mafi.

³⁴⁹ Mpindyewu, leelù ewu ndi muyiishe mayiisha àbìdì, mashile, nteeta kunwambila cìdìYè, kunwambila ne cikondo cikaadi cijika; cìdìYe, cìvwàYe. Nènku mpindyewu patùdì tutàngila, dilòdòlò edi, tuMutàngilaayi.

³⁵⁰ Mpindyewu, muntu yònsò, mu Dìna dyà Mukalenge Yesù, shààla musòmbe pa kaaba kèèbè mpindyewu. Kanùtambakanyi eku ne eku to. Sòmbaayi ànu bapuwe menemene too ne panwàbìkidiibwa. Lekelaayi bànà bakesè. . .

³⁵¹ Mpindyewu, byòbì byenzeke ne ngàmbe ne: "Inyikaayi mitù," enza nànkù ne lukasa lwònsò, munanga wanyì, bwalu

bintu bibì bìdi byumuka, bu mùdì kansère ne màsaamà, ne bipàtuka munkaci mwà bantu, ne bibwela mu bakwàbò. Bònsò bàdi biitabuuja aci, ne bamanye ne m'Mufùndù, ambaayi ne: "Amen." [Disangisha didi dyàmba ne: "Amen."—Muf.] Tudi tusangana, mu Bible ne, nyumà mibi yivwa yuumuka kùdi ewu yiya kùdi mukwàbò, pàvwàyo yìpaciibwa. Nènku yìdi yiteeta kupeta mwaba kampànda.

³⁵² Nènku mmisangu búngì kaayi yitùkaadi bacimòne mu disangisha's! Bantu balwa mu disangisha, ne mubidi tumatuma ne makànda à mubidi, basòmba mwaba awu badyula; nènku, ditùkù òmwè anyi àbìdi paanyimà pàà cyòci aci, basanganyibwa bampòfo ànu bèètù bàà menemene aba, anyi batuucike kùdi kansère, anyi bacibukile panshì. Nwamònu's, bwalu bavwa beena bupidyà. Mémè ncyèna mwambule bujitu bwàbò bòbò to; ànu bwà beena kwitabuuja. Bààbúngì bàà kùdìbo bakaadi babwele mu lupitaadi, kukaadi bidimu byàbúngì, ne bacidi ànumù, bàmwè bamana kujiika, ànu bwà diikala ne dyambu, babenga kwitabuuja.

³⁵³ Kakwèna mwaba bwà mwena bupidyà mpindyewu to. Mmwaba wa beena kwitabuuja. Ikalaayi ne diitabuuja kùdi Nzambi!

³⁵⁴ Taatù wa mu Dyulu, mpindyewu disangisha edi n'dyèbè Wèwè; ditu ànu Dyèbè, díbà dyònsò. Mpindyewu, mémè ndi mwà kwakula pa Dìyì Dyèbè; kadi mpindyewu, kubangila ànu ku mpindyewu, ncyèna mwà kwakula to. Wèwè ke Udi wakula mpindyewu, Mukalenge. Bimanyiibwè ne musadidi Webè mmubàmbile Bulelèlè. Swaku bwà bantu bàdi apa aba, pàmwàpa bààbúngì bàdi basaama mwab'ewu, ne kabààkupicilaku nànsha mu mulongo wa babèèdi to, kadi Wèwè ucidi ànu mwab'ewu, Mukalenge. Udi mwà kwondopa pambèlu pààpa, ànu mùdì mwà kwondopa mwaba kanà wònsò. Dìyì Dyebe dimanyikeku, mu Dìna dyà Yesù, mmùndì ndomba emu. Amen.

³⁵⁵ Mpindyewu bu mémè mwà kupetaku ntema yènù yònsò bwà katanci kakesè cyanààna. Ndi muswe kupwekesha mèsù ku mulongo wà babèèdi ewu. Ncyèna ngeela meji bulelèlè ne ndi mumanye muntu nànsha umwe to. Mu mulongo wa babèèdi ewu, nwènù bònsò nudi beenyi kùndì, bamanye ne mémè ncyèna munùmanye anyi? Elàayi byanza muulu panwìkala beenyi kùndì. S'ki cidibo. Mbanganyi mu batèèleji bàdi bamanye ne mémè ncyèna mumanye kantu nànsha kàmwè pa bìdi bìnùtàngila? Elàayi byanza byènù muulu, mu batèèleji amu, nwamònu's. Ncyà bushùwà ne, byà pa lukama makumi citèemà ne bitaanu byà bantu bàdi apa aba, ncyèna mubàmanye to. Aci ncilelèlè.

³⁵⁶ Mpindyewu mukàji mutekète nyèyè ewu, ncitù mwanji kumumònaku to kacya bandela. Yèyè mmwenyi ànu wetù wa menemene ewu kùndì. Mpindyewu, ùdi mwà kwikala kaaba

aka bwà disaamà. Ûdi mwà kwikala kaaba aka... Pàmwápa yéyè mmwénze cintu kampànda. Pàmwápa ùdi mwab'ewu bwà bwalu bwà mpetu. Pàmwápa ndutàtù lwà ku lubanza. Pàmwápa ùdi kaaba aka bwà muntu mukwàbò. Ncyèna mumanye to. Ncyènakù ne cingenyengenya nànsha cikesè to.

³⁵⁷ Kàdi cimfwànyì ncyòci eci menemene cìdì mu Yone Munsantu, nshapità mwi4, mulùme ne mukàjì biikale batwilangana bwà musangu wà kumpàla. Nènku kakùyi mpatà to, ne, nsongàakàjì wàkatuutakeena ne Yesù awu, Yéyè uvwa mupite mukàjì awu ku bidimu, bwalu: “Yéyè,” mwàkambabò, “Yéyè ùvwa ne mmwenekelu wa bidimu makumi àtaanu, anyì mupite pa makumi àtaanu,” ne pàmwápa ànu nsongàakàjì mulenga kumòna uvwa mwab'awu ku ciinà cyà màyi aci, ùvwa ànu nsongàakàjì. Nènku mwaba ewu kàbìdì, dilòòlo edi, bantu bàbìdì mbàtwilàngana, nsonga ne mukulumpe, kabàyi bamanyangane to.

³⁵⁸ Nènku mpindyewu nyéyè ewu mwimane mwaba awu. Kùdi kabingila kampànda kadi kamufikishe mwab'awu. Ncyèna mumanye to. Mmufwànyine kwikala mwimane mwaba awu, bu museeswishanganyi. Mmufwànyine kwikala mwimane mwaba awu, wamba cintu kampànda, pàdibi kabiya nànkù to, ànu bwà kumòna cìikalà mwà kwenzeka. Byòbì nànkù, tàngilààyì numòne cidi cyenzeka. Nwamònu anyì? Nwamònu anyì?

³⁵⁹ Mpindyewu, ncyèna mumanye inàbànzà ewu to; ncitù mwanji kumumònaku kacya to. Wafùmu ku dyela cyanza cyèndè muulu, ànu mu katanci emu, ne mèmè ncivwa mumumanye to. Nènku nyewu ndi mwele cyanza muulu ne, yéyè mmwenyi kùndì. Ncitu mwanji kumumònaku kacya. Èè, mpindyewu piikalabi ne ndi... .

³⁶⁰ Ànu bu muntu, bìvwa bikèngela mèmè kwamba ne: “Inàbànzà, mbwalu kaayi bùdi wèwè naabu? Cyùdì wenza mwab'ewu ncinyi? Cyùdì ukèba ncinyi?”

³⁶¹ Nènku ùvwa mufwànyine kwamba ne: “Mukalenge Branham, ndi—ndi mwaba ewu bwalu ndi—ndi nsaama ka—kansèrè. Ndi nsaama disaamà dyà cyàdì. Ndi nsaama cyùjà cyà kansèrè.” Anyi ne: “Ncyèna nànsha ne dyeyà to. Ndi... . Bayaanyi mmundekele.” Anyi ne: “Ncyèna musediibwe to, kadi mulunda wanyi wa balùme mmwenze cikampànda.” Bìvwa bikèngela bwà yéyè kungambila.

³⁶² “Èè,” ndi mufwanyine kwamba ne, “èyo, nê—nê—nêkusambidilè; ne nkutenteketele byanza, ngàmbe ne: ‘Mukalenge Nzambì, pèeshakù mukàjì ewu cidiye muswè. Amen. Yesù, enzaku nànkù!’” Kumulekela uya. Èè, ngeela meeji, bu yéyè mwà kwitabuuja aci, ùvwa mwà kuumvwa bìmpè. Abi bìdi ànu bìmpè. Aci's ke civwa mudimu wa bwambi kukaadi bidimu byàbùngi menemene.

363 Kàdi cyàkalayiibwa, mu matùkù à ndekeelu, bwà ne mùvwà Mwanjèlo, Nzambi, musòmbèle mu mubidi wa buntu wàkajuukà ànu pabwípì ne Sodoma kwoshiibwaye, ne Yèyè musòmbè ne nyimà Wendè mukoma ku ntentà kùvwà Sarah usanganyiibwa, ne kwambilaye Abraham civwaye wela meeji mu ntentà; Nzambi, mu mubidi wa buntu, muvwàla bilàmbà byà buntu.

364 Nènku ki mùshindù umwèpelè ùdi Nzambi mwà kucyenza leelù ewu, mpàdiYe ùbwela mu mubidi wèbè, nwamònu's, bileeja ne Nzambi ùvwà mwà kumweneshiibwa mu mubidi wà buntu.

365 Yesù wàkamba ne: “Ànu mwàkadibi mu matùkù à Sodoma, ki mwikalàbi kàbìdi ku dilwa dyà Mwànà wa muntu.” Tudi ne mùsànjeela, Billy Graham ne bakwàbò mu Sodoma mwàmwa, kàdi Èkèleeziyà musungula mmwakidile Mukenji ne mùsànjeela.

366 Mpindyewu, piikala inàbànzà mutekète ewu. . . bu Nyumà Mwimpè. . . Ncyena ngamba ne Yèyè neàcyènzè to, kàdi bu Yèyè mwà kulwa kungambila cyùdi mwimanyine kaaba aka eci, anyi—anyi cyùdi ujinga, anyi cintu kampànda cyùdi mwenze, anyi cintu kampànda cyùdi wamba kwenza. Mòna's, s'udi ànu mufwànyine kumanya ne bìvwà bìkèngela cifùmìne ku mushimì kampànda wà mutàmbe mfukilu, bwalu twètù tudi ànu biimane kaaba aka, nwamònu's. Aci ncifwànyine kwikala cyà bushùwà, kì mmwòmò anyi? Dìbà adi's udi mufwànyine kumanya ne civwa ne cyà kufùmìna ku bukolè kampànda bwà butàmbe mfukilu. Nènku piikala Bible mwambe ne Yesù wakenza cintu cimwècimwè aci, ne mulaye bwà kucyenza cyàkàbìdi mu matùkù à ndekeelu, dìbà adi udi mufwànyine kwitabuuja ne ùvwà n'Yèyè. Mbanganyi bàdi bafwànyine kwitabuuja cintu cimwècimwè aci? Dìbà adi nudi bafwànyine kumòna Yesù. Nudi bafwànyine kumòna Dìyì Dyèndè.

Mpindyewu wèwè udi wamba ne: “Yèyè udi Dìyì anyi?”

367 Bible ùdi wamba ne Yèyè ùdi Dìyì. Ne Bible mmwambe ne Dìyì didi dijingulula meeji adi mu mwoyi. Ncyà bushùwà anyi? Pashiishe necikalè Dìyì dyamba ku mishiku yà buntu, munkaci mwa kujingulula meeji.

368 Mpindyewu, ncyèna mwà kucyènzà to. Ncyèna ne mùshindù wà kucyènzà to, nwamònu's, bwalu ncyèna mumumanye to; kàdi Yèyè mmumumanyè, ne Yèyè ùdi Dìyì.

369 Ne Yèyè ki Udi mwà kwangata nyumà yètù yibìdi, bu mudi mukàji wa ku ciinà cyà màyi ewu, ne Yèyè, ne kubitwangaja pàmwè; ne pashiishe uumuka uya kandeeja ànu cidiye mulwile apa, cidiye mwenze, anyi cidiye ukèba, anyi cintu kampànda. Pashiishe ndi mwà kucyàkula ne kucyàmba, nènku dìbà adi ncilumbu cyèndè's.

370 Mpindyewu wèwè udi wamba ne: “Mwanèètù Branham, udiku mwà kumwondopa anyi?” To, to. Ncyèna mwà kwenza

aci to. Ûkaadi mumane kucyènza. Ku mibùndàbùndà Yèndè twàkondopiibwa.

371 Kàdi aci cidi ànu mbwà kukolesha diitabuuja dyèndè, bwà kumufikisha ku dimanya, ne, piikalàYe mumanye civwaye ne cidiye ukeba, Yèyè mmumanye—Yèyè mmumanye mwà kucifila ne cìkalaye paanyimà. Ncyà bushùwà anyi? Mpindyewu, bantu bônso bàdi biitabuuja aci anyi?

372 Mpindyewu ikalaayi ne kaneemu kàà menemene. Ne nwènù bàdi mu bateeleji abu mpindyewu, kanüyi ne twarta twà disambila, sambilaayi.

373 Mpindyewu, vùlukààyi ne, Yesù wàkopicila mu kasùmbù kampànda dîngà ditùkù, ne mukàji mutekète kampànda wàkalenga civwàlù Cyèndè. Ki Yèyè kukudimuka, kwamba ne: “WâNdengi awu nganyi?” Ki kwambululaye mèsù kutangila mu disangisha dijima amu too ne pààkamupetaYe, ne kumwambilaye ne uvwa ne disaamà dyà mashi alwa munda. Ki mashi èndè kwimanawu pa diine dîbà adi. Nwamònu anyi?

374 Mpindyewu, Bible mmwambe ne Yèyè ùdi mpindyewu “Mwakwidi Munène udi mwà kulengiibwa kùdì mateketa ètù.” Ncyà bushùwà anyi?

375 Ndi ntangila pambèlu apa kùdì Mwanèètù Way, musòmbe ku luseke lwà mukàjèndè eku. Ànu àbìdì àdi panshi aa muntu awu ùvwa mwimane kaaba aka mèmè munkaci mwà kuyiisha, ànu mùvwà Pòlò munkaci mwà kuyiisha bufùku bujima dilòlò kampànda, kàdi muntu ewu kukulukaye kufwà mu bateeleji amu. Ki Nyumà Mwìmpè kumwaluja buludi cyàkàbìdì ku mwoyi. Yèyè mmujaadiki, nwamònu’s, wa ne: “Yesù Kilstò ùdi umwèumwè awu makèlèlèlè, leelù, too ne kashidi.”

376 Mbanganyi batu kabàyiku banji kumòna Mwanèètù Way, ne baswe bwà kumumòna; elaayi byanza muulu, kacya kabàyi banji kumumona to. Mwanèètù Way, udiku mwà kujuukila kuulu anyi? Muntu nyèyè ewu, kukulukaye mufwe ànu lwà pàdìye musòmbele mpindyewu apa. Mukàjèndè nyèyè ewu, munganga mukàji mumanyike, mwimane ànu mwaba awu. Mwoyi kàwùyi utuuta to, mufwè; mèsù èndè makudimuke paanyimà, nènku ùkaavwa mumane kufiika kwìsù; disaamà dyà mwoyi.

377 Ngàngàbukà mmumwambile ne mmupete disaamà dyà mwoyi. Kumpàla kwà cyòci aci, mvwa mucijandule mu dijingulula, ànu àbìdì adi panshi àà, mumwambile ne ùvwa ne disaamà dyà mwoyi. Ki pashiishe, dyàkamwe, mwoyi wèndè kwimanawu, nènku kudyelaye panshi. Nènku ki yèyè awu mwaba awu, mulàale mwaba awu, mufwè mufwilemù.

378 Aci’s mmisangu mitwè ku yìsambòmbò anyi mwandamukulu yinkàadi mumòne Mukalenge Yesù wàluja muntu mufwè. Ndi muMumòne ùcyènza, ne Ùdi mwà kucyènza dilòlò edi.

379 Mpindyewu ndi ngàngata nyumà yònsò, muneemu emu, mu bukontononyi bwànyì, bwà butumbi bwà Nzambì, mu Dìna dya Yesù Kilstò. Ikalaayi mu kaneemu. Tàngilàayi.

380 Ndi njinga kuyiikilanganaku neebè, inàbànzà. Mwua nyiisha, udi umòna's. Nènku ànu bwà kubakula nyumà webè cyanàànà, ke cìndì ngenza menemene. Nwamònu anyì?

381 Kùdi cintu kampànda munda mwebè amu, mwoyi kampànda, cyanàànà kuvwa mufwànyine kwikala mwimane mwaba awu to; s'udi mufwànyine kwikala ànu mmwenekelu kampànda, mulààle mufwè, kàdi kuyi mufwànyine kwikala ne mwoyi munda mwebè to. Kàdi, bu mudibi ne kùdi mwoyi mu mubidi awu, ùdi ukukontonona. Nwamònu anyì? Nènku mpindyewu nànsha meeji èbè ne byùdi wèwè wela meeji abi, mèyì àudi wamba, ne bikwàbò byònsò, ki kùdi mwikadile ne mwoyi. Nwamònu anyì? Ki cyùdi wèwè ncyòci aci, mmèyì èbè, meeji èbè, ne cyònsò cyùdi aci.

Mpindyewu, tudi, tudi kaaba aka, biikale twitabuuja. Mpindyewu Nyumà Mwìmpè. . .

Bu mwàkambila Yesù mukàjì awu ne: “Ntwàdilàku màyì à kunwà.”

382 Nènku, pààkatwàlà mukàjì awu, kwambaye ne: “Mòna's, Wèwè, kabivwa bikèngela bwà Wèwè kundomba aci to. Mémè ndi—mémè ndi mwena Samaalèyà. Wèwè udi. . . Udi mwena Yuda. Katùtu biibidilàngane neenù to, kakwena—kakwena mùshindù nànsha ùmwè to, katùtu tubobeshila neenù makwenda pàmwè to.”

383 Mpindyewu, kàdi, mu bushùwà bwà bwalu, twetu bònsò bàbidi tudi bàà Bisàmbà byà bendè. Ne tudi biimane mwab'ewu ànu biikale twitabuuja Nzambì. Mpindyewu, bu Nyumà Wendè mwà kungiikila ku dipà kampànda, ne mwà kukwambila cidi bwalu; bwà nwènù kumanya ne ncyà bushùwà anyì kì ncyòci, bwalu nudi ne citùpà cyà mwoyi aci. Dìbà adi, dìbà adi udi ne dipà, bwà kudiitabuuja. Nènku wèwè mucitàbùùje, ne Yèyè mukwambile bwalu abu, dìbà adi kwònsò nkumane kujika. Nènku nebikwate mudimu pa muntu ne muntu mwab'ewu. Mpindyewu, bantu bònsò biikale mu kaneemu kàà menemene.

384 Nènku inàbànzà ùdi ne lutàtù pa muminu. Ùdi ùsaama muminu. Pìikalaci cyà bushùwà, ela cyanza cyèbè muulu. Mpindyewu, nцитuku mwanji kumumòna to kacya bandela. Ncyà bushùwà. Ki cidiye muvwile kaaba aka, bwà mémè kumusambidila bwà muminu wèndè.

385 Mpindyewu, ànu mwaba ewu mene, ndi mwenze ànu mfika ku dyamba aci, anyì kumpàla menemene, yèyè uvwa. . . Ùvwa mumanye ne kuvwa Cintu kampànda pabwìpì nendè apu. Cintu kampànda kulwaci pabwìpì nendè apu, dìbà adi mene. Nuvwa mwà kumòna divwayila pambidi pèndè apu, njiya kampànda ya kalolo, bu nànkù awu, kumulengayi.

386 Bukênkè bunùdì numòna mu fòtò bwàbwa. George, udi penyi? Bukênkè buwua mu fòtò abu, mbulebelele ànu kumutù kwà mukàjì awu aku, mpindyewu mene. Nwamònu's, mmu cipaapu cikwàbò. Mmwena kwitabuuja, kî mmwena kwitabuuja wa budìngìbudìngì to. Mmwena kwitabuuja.

387 Mpindyewu, bu mudibi ne wèwè udi mwena kwitabuuja, udi witabuuja ne mèmè ndi musadidi Wendè ne mupròfetà anyi? Bikèngela bìikale nànkù, bwà kumanya aci. [Mwanèètù wa bakàjì awu ùdi wamba ne: “Èyowà's, mukalenge.”—Muf.] Udi witabuuja ne Yèyè mmufwànyine kukwambila bintu bikwàbò bìdì mu mwoyi wèbè anyi? [“Èyowà's, mukalenge.”] Èyo.

388 Cintu cìdì pa mwoyi wèbè ncyòcì eci. Mmuntu ùdì usambidila; mmwàna. Udi witabuuja ne Yèyè ùdì mwà kungambila cìdì cimutàcisha anyi? Udi ne kiishi. Mmwòmò anyi? [Mwanèètù wa bakàjì awu ùdì wamba ne: “Ncyà bushùwà. Èyowà.”—Muf.] Udi witabuuja ne Nzambì ùdì mwà kungambila ne wèwè udi nganyi anyi? [“Èyowà's, mukalenge.”] Udi Mandamu Walker. [“Cyà bushùwà.”] Kwèna wa muneemu to. [“To.”] Udi wa ku Sud. [“Cyà bushùwà.”] Mu Géorgie. [“Cyà bushùwà.”] Neùpingane kumbèlu, musangale. Yesù Kilistò wàkwondòpù ne mwanèèbè awu. Kuditacishi bwà bwalu abu to. Kwajiki. Nzambi àkubènèshè, mwanèètù wa bakàjì.

389 Wetwawu? Mpindyewu mukàjì mukwàbò nyèyè ewu. Mèmè ncyèna mumumanye to, nciù mwanji kumumònaku kacya. Yèyè ùdì ànu muntu mukàjì mwimane mwaba awu. Mpindyewu tàngilààyi, mvwa nyiisha, ànu kuyiisha, kubangila pa dîbà mwandamukulu jaajaaja, kàdì nyewu tukaadi dîbà dikumi mpindyewu. Mmèbà àbìdì àndì mwaba ewu aa. Dijingulula dimwèpele adi divwa dincyòkeshe kutàmba mèbà àbìdì à diyiisha. Nwamònu anyi? Aci cìdì . . . Nwamònu anyi?

Udi wamba ne: “Udi muswè kwamba nànkù anyi?” Kaa, èyowà's.

390 Mukàjì wàkalenga cizembe cyà civwalu Cyèndè awu. Yèyè ne: “Ndi njingulula ne bukolè mbupatuke munda Mwànyi,” dikànda. Ncyà bushùwà anyi? Ki cìdì bwalu nànkù.

Mpindyewu, muntu mukàjì nyèyè ewu ùndì nciyiku mwanji kumòna kacya.

391 Billy wàyì kuntwaku, bu nwènù bamòne cintu kampànda, ne kwangataye mwànà wa balùme utùdì nendè mwaba ewu ewu, George. Yèyè mmwànà wa balùme wa ba-Baptistes. Ndi muswè bwà yèyè kumòna citùdì twamba ne n'Nzambì. Tatwèndè, famiye, mbantu bàà maalu mîmpè. Bàdì mu Mexique, missionnaire, muntu mwîmpè maalu. Ne tatwèndè pèndè, ùdì ùsaama. Ndi ànu mwindile bwà yèyè kulwa. Mpindyewu anji tàngilà ànu ne ntèmà, George.

392 Mpindyewu, inàbànzà ewu, mèmè—mèmè—mèmè ncyèna mumumanye to. Nciù—nciù mwanji kumumònaku to.

Ngeela meeji ne katwèna bamanyangane to. [Mwanèètù wa bakàjì awu ùdi wàmba ne: “Ncyà bushùwà.”—Muf.] Katwèna bamanyangane to.

³⁹³ Kàdi mpindyewu, Nyumà Mwîmpè, bu mùdì bupolè bwà Yesù bwikalepù, twètù bônso tudi tufila bujaadiki abu. Mpindyewu bu Mukalenge Yesù mwà kunsokolwela cintu kampànda bwà bwalu bwèbè. . .

³⁹⁴ Mpindyewu, bu mèmè mwà kukwondopa, ndi mufwànyine kucyènza, kàdi ncyèna mwà kwenza cikaàdiYe mumane kwenza to. Cintu cimwèpelè, bu ne Yèyè uvwa mwimane mwaba ewu dilòlò edi muwale nkooci ewu, uvwaYè mumpèeshe ewu, èè, mpindyewu, Yèyè—Yèyè kî mmufwànyine kukwondopa to, bwalu Yèyè ukaadi mumane kucyènza. “Ku mibùndàbùndà Yèndè twàkondopiibwa.” Nwamònu anyi? Kàdi cintu cimwèpele civwaYe mwà kwenza, bwà kuDileeja ku Dìyì dyàkalayàYe, ne ukufikisha ku dimòna ne Yèyè ùdi umwèumwè awu makèèlèlè, leelù, too ne kashidi. Ne Yèyè wàkalaya bwà kucyènza.

³⁹⁵ Mpindyewu bu Yèyè mwà kukwata naanyi mudimu bwà kukwambila cyùdì mulwile kaaba aka, newukwàta mudimu ne diitabuuja dyùdì naadi, mu Yèyè, bwà kwitabuuja ne udi upeta cyùdì naaci. . . cyùdì muwile mwab’ewu anyi? Ne mwoyi wèbè wónso anyi? [Mwanèètù wa bakàjì awu ùdi wàmba ne: “Èyowà, nèngiikalè mwà kukwata naadi mudimu.”—Muf.] Èyo, Mukalenge àcìfilèku.

³⁹⁶ Ndi mmòna ne inàbànzà ùdi ne cintu kampànda cimutàcisha. Diteeta didii dileeja ne—ne mpùtà mu cifù. Ncyà bushùwà. Mbulelèlè, èyowà’s, mukalenge, mpùtà mu cifù. Udi witabuuja ne Nzambì ùdi mwà kwondopa mpùtà awu anyi? [Mwanèètù wa bakàjì awu ùdi wàmba ne: “Èyowà’s, mukalenge. Ndi ngiitabuuja ne byònsò bìndì mwà kwitabuuja abi.”—Muf.] Nwènù, nwènù bônso—nwènù. . . [“Ne byònsò bìndì mwà kwitabuuja.”] Nzambì àkubènèshè.

³⁹⁷ Mpindyewu, kwèna wa muneemu to. Cìvwa diditacisha dyàbùngì bwà wèwè kufika kaaba aka. [Mwanèètù wa bakàjì awu ùdi wàmba ne: “Èyowà, bìdi nànkù.”—Muf.] Mmwómò. Èyowà. Èyowà. Udi wa ku Tennessee. Ncyà bushùwà. Mandamu Hart. Alukila; kwedi mpatà to. Neòndopiibwe, bu wèwè mwà kwitabuuja.

³⁹⁸ Wetwawu, inàbànzà? Katwena bamanyangane to. Ncìtùku mwanji kukumònaku to kacya bandela, ku dyanyi paanyi dimanya. Ndi mufwànyine kwikala, mwaba kampànda mu disangisha, kàdi udi mufwànyine kwikala mummòne mèmè, kàdi mèmè ncyèna mukumanye to. Nzambì ngudi mukumanye. Udi witabuuja ne mèmè ndi musadidi Wendè, ne Dìyì dîndì muiyishe adi didi Bulelèlè anyi? Èè, bu mudibi ne ncyèna mukumanye; ne Dìyì, dîndì muiyishe, wèwè udi mwitabuuja.

399 Cintu cimwèpelè, cìdi ne, muntu kampànda mmukupèeshe karta; anyì umwe wa ku baawisiyè, anyì mwanàanyi wa balùme, anyì muntu kampànda mmukupèeshe karta. Nombà webè kubiikidiibwaye, ne ki wèwè ewu. Ki cyònsò cìndi mèmè mumanye ncyòci aci.

400 Kàdi udi mwab'ewu, usaama disaamà dyà mutù mubinduluke. Didi dikutacisha bibi be. Udi ne muntu kampànda paùdi apu. Udi ne muntu ùdi usambidila. Udi. . . Mbàyeebè. Nènku udi ne lutàtù lwà mu nyumà ludiye kàyi ànu mwà kujikija to. Ne udi ne mwànà ùsaama, kàbidì. Wèwè kwèna wa muneemu to, kàdi udi mufumine ku Nord. Udi wa ku Canada, wa mu Alberta. Ncyà bushùwà. Udi ngiitabuuja mèmè bu mupròfetà wa Nzambi, ne witabuuja ne cìndi nkwambila aci m'Bulelèlè, alukilaaku kwèbè nènku neùpete cyùdi naaci aci. Èyowà. Itabuuja. Nzambi àkubènèshè, inàbànza.

401 Ndi mwenyi kùdì. Udi mwenyi kùndì. Mèmè ncyèna mukumanye to. Kàdi Nzambi mmukumanye bushùwà. Udi witabuuja ne mèmè ndi musadidi Wendè anyi? [Mwanètù wa bakàji awu ùdi wàmba ne: “Èyo, ndi ngiitabuuja.”—Muf.] Ne mwoyi wèbè wònsò anyi? Mèmè ncyèna mukumanye to, ncyèna mumanye bwalu bwèbè nànsha bumwe to. Bu mèmè ne mùshindù wà kukwondopa, nùnkù's ndi mwenze nànkù, kàdi ncyèna—ncyèna mwà kukwondopa to. Mèmè ncyèna mwondopi to. Ndi ànu muntu. Kadi Yèyè udi Nzambi. Ndi ànu mu cibwejàkàji cikesè cyanàànà, bwalu nyawu kudi mukàji mukulakaji mwimane pankaci pàanyi mèmè ne wèwè apa. Mmuntu kampànda ùdi usambidila. Èyo. Mmamwèbè. Nènku ùdi ùsaama disaamà dyà—dyà lwendu lwà mashi aya lubilu. Nènku wèwè udi ne—ne twonyi ne kishi. Ncyà bushùwà. Udi witabuuja nànkù anyi? [“Èyowà, ndi ngiitabuuja.”]

402 Mamwèbè kèna kaaba aka to. Kàdi pawàya kudiye, wangate citàmbalà cyùdi mujingile mu nshingu aci, ucitentèkè pa mamwèbè, kuyi wela mpatà to, nènku lwendu lwà mashi aya lubilulubilu alu nelùùmuke kudiye, ne kishi kèbè aku nekàfwe. Ndaaku, itabuuja mpindyewu.

403 Udi witabuuja mpindyewu anyi? Ne mwoyi wèbè wònsò anyi? Mpindyewu, nudi numòna's, ndi ntuma mèsù mu batèeleji amu, nènku bidi ànu bimweka bu bicidi ànu—bicidi ànu bibangisha bu bìdi bibwicidila, nànkù awu, lwà muntwamu.

404 “Bintu bìndì Mèmè ngenza ebi nenùbyènzè pèènu.” Yèyè's mmubyenze bipitèpìte mwab'ewu mene's, dilòòlò edi, kutambidila muvwaYe. . . byà mùshindù awu, kutambidila mwakenzaYe mu matùkù Èndè ònsò à mwoyi. Ncyà bushùwà.

Mpindyewu, inàbànza ewu ewu, nsongàakàji. Ncyèna mumumanye to, mmwenyi kùndì. Kàdi udi witabuuja ne mèmè ndi musadidi Wendè anyi? [Mwanètù wa bakàji awu udi wàmba ne: “Èyo.”—Muf.] Mpindyewu anji indila kakesè.

405 Muntu mulùme kampànda mmulwe kumpàla kwànyì, muntu kampànda mu batèèleji amu. Mpindyewu anji indila kakesèè. Muntu kampànda mu batèleji emu. M'Buumuke mwab'ewu ànu mpindyewu; Bukènkè abu bùmùkù mwab'ewu. Nènku kuvwa muntu mulùme kampànda mwimane pabwìpi naaBù, mwaba kampànda mu batèèleji emu. Kudyàbàkèènyì to; kolesha ànu ku mwoyi.

406 Twàlukilààyì cyàkàbìdì bwà tumòne mukàji awu. Mpindyewu bu Mukalenge Nzambi. . . Eci mbasambòmbò anyì mwandamutekète, anyì cintu kampànda cikwàbò, badi bapicile mu mulongo, mu dijingulula. Nènku bu Mukalenge Yesù mwà kunsokolwela, bwà mukàji ewu, cyònsò cìdì cìmutacisha aci, ncifwànyine kufikisha bakwàbò bàà kunùdì ku diitabuuja ne mwoyi wènù wònsò anyì? Nudiku mwà kwitabuujiila Kilistò pa bishìmikidi abi anyì? Nwamònu anyì? Musangu ùmwè ùvwa ne cyà kucijaadika. Misangu yìsàtù ndishìndika. Kàdì eci's mmisangu binunu makumi, kacyi cìpangile musangu nànsha ùmwè to.

407 Kwèna mulwè kaaba aka bwèbè wèwè mwine to. Udi kaaba aka bwà muntu kampànda. Ne ndi mmumòna musòmbe ne mutù mwinyika. Udi munkaci mwà kunwà mucì wà mfwankà, nènku udi munkaci mwà kusambila bwà mfwankà yimumuka. Aci cìdì. . . Mukalenge Nzambi akupèèsheku dilòmba dyèbè, mwanèètù wa bakàji. Ndaaku, mwikale witabuuja ne mwoyi wèbè wònsò, nènku démon wa ciibidilu aci uumukeku bayeebe, mu Dìna dya Mukalenge Yesù.

408 Lutàtù lwèbè ludi mu nyimà webè amu. Udi witabuuja ne Nzambi neàmwòndòpè anyì? Udi witabuuja anyì? [Mwanèètù wa bakàji awu udi wàmba ne: "Èyo, ndi ngiitabuuja."—Muf.] Èyo. Ndaaku, wàmbe ne: "Twasàkidila, Mukalenge."

409 Ndi mumanye mukàji ewu, ngeela meeji ne mmwànà wa bakàji wa Mandamu Neece. Ki mmwòmò anyì? [Mwanèètù wa bakàji awu udi wàmba ne: "Èyo."—Muf.] Mvwa mwele meeji ne mmwòmò. Nzambi àkubènèshè. Lutàtù lwà kale lwà nyimà alu nelùkuumuke mpindyewu ne udi mwà kuya ne kuumvwa bimpè.

410 Udi witabuuja ne Nzambi udi mwà kwondopa binyoka abi ne kukusangaja anyì? Ndaaku uMwambile mùdì muMwitabuuje. Itabùùja ànu cyanàànà ne mwoyi wèbè wònsò.

411 Wetwawu, mukalenge? Udi witabuuja ne Nzambi ùdì mwà kwondopa dĩaamà dya cifù adi ne kukusangaja anyì? [Mwanèètù wa balùme awu udi wàmba ne: "Amen."—Muf.] Èyo, pashìshe ndaaku, wàmbe ne: "Twasàkidila Mukalenge, nèngìikalè—nèngìikalè mwà kusangala mpindyewu." Nènku—nènku newùmvwè—newùmvwè bimpè.

412 Dĩaamà dikwàbò dya binyòka, ne dya bununu, kàbìdì. Udi witabuuja ne Nzambi neàkusangaje bu mèmè mwà kukutentekela byanza anyì? [Mwanèètù wa bakàji awu ùdì

wàmba ne: “Yèyè ùkaatu mwenzenze misangu yàbùngì, neebè, mu kumutentekela kwèbè kwà byanza, mwanèètù wa balùme.”—Muf.] Nùmvù aci anyi? Mukalenge àbèneshèku mwanèètù wa bakàjì, ne àmupeku cyàkàbìdì disùngidiibwa dyèndè dilòlòlò edi. Amen. Mwitabuuje ànu patupu’s.

413 Disaamà dyà mwoyi, disaamà dyà cifù. Udi witabuuja ne Nzambì udi mwà kudyòndopa anyi? Èyo. Ndaaku, mu Dìná dyà Mukalenge Yesù, Yèyè akwondopeku’s.

414 Wetwawu, nsongàalùme? Dìsaamà dyà mfwènke. Udi witabuuja ne Nzambì ùdi mwà kwondopa mfwènke anyi? [Mwanèètù wa balùme awu udi wàmba ne: “Èyo.”—Muf.] Ndaaku, itabuuja nànkù; Yèyè neàcyènzè. Èyo.

415 Disaamà dyà nsukàadi. Udi witabuuja ne Nzambì udi mwà kwondopa mashì èbè ne kukusangaja anyi? Ndaaku, uMwitabùùje, ne Yèyè neàcyènzè. Udi ucìitabuuja ne mwoyi wèbè wònsò anyi?

416 Kàdi bu ne ncìvwa mukwàmbìle bwalu nànsha bumwe to; cibì mukutentèkele ànu byanza cyanààna; udi witabuuja ne Nyumà Mwìmpè udi kaaba aka bwà kukusangaja anyi? Kì mùshindù wa kucyènza ngwòwò awu. Lwàku apa. Mu Dìná dyà Yesù Kilistò, yèyè ayeku ne ondopiìbwe. Amen.

417 Lwàku, inàbànzà. Mèmè ncìyi mukwambìle cintu nànsha cimwe to, udi witabuuja ne Nzambì mmufwànyìne kukwondopa ku lutàtù lwà bukàjì lud-. . . To, numfwileku luse, Yèyè ùkaavwa mumane kucyàmba. Tùnguùnukà. Nzambì àkubènèshè. Ndaaku, nda, wenda witabuuja, dìbà adi, usangale.

418 Udi witabuuja anyi, mukalenge, ne mwoyi wèbè wònsò? Nzambì ùdi wondopa disaamà dyà mwoyi, kì mmwòmò anyi? [Mwanèètù awu ùdi wàmba ne: “Èyowà’s, mukalenge.”—Muf.] Udi usangaja muntu. Mèmè ndi mutwishìibwe ne Yèyè udi wenza nànkù.

419 Yèyè, Yèyè ùdi Nzambì. Nudi nwitabuuja aci anyi? Nudi nuciìtabuuja ne mwoyi wènù wònsò anyi? Ikalaa yi ne diitabuuja mu Nzambì’s!

420 Muntu kampànda mwaba ewu ùvwa mwenze cintu kampànda, ànu mu tusunsa tukesè emu. Ndi muswe kupeta aci. Cìvwa mmashi. Muntu kampànda cyenze bu njiwu, anyi cintu kampànda cyàkenzekà. Cìvwa—cìvwa dizòloloka dyà mashì. Cìvwa mwaba kampànda. Muntu awu uvwa mwimane kaaba aka. Mpindyewu sambilaayi ànu cyanààna. Èyo, mmwòmò. Muntu udi musò-. . . Mòna’s, n’J. T. Parnell. Mèmè ntu mumanye mwàna wa balùme awu. Udi ne mashì azòloloka munda mwèbè amu, J. T. Udi witabuuja ne Nzambì neàkusangaje anyi? Èyo, neciimane pa dìbà adi, J. T. Itabuuja ne mwoyi wèbè wònsò.

421 Inàbànzà mutekète udi musòmbe mwab’ewu ewu, udi kacya watangila, udi musòmbe mwaba wàwa ku luseke lwà Mwanèètù

Grimley. Kudi Bukênkè ku luseke lwèndè. Wèwè, ne nshingu wa mutèèlu mutòòke. Mariya, mèmè ncyèna mukumanye to, kàdi ke dînà dyèbè ndyôdi adi. Udi mutàcishùbwe ne lutàtù lwà mu nyumà, kàbidì udi ne mutù ukunyunguluka bikolè. Pwaku bwalu abu mwoyi; byònsò abi nebiikale ànu bîmpè. Itabuuja ne mwoyi wèbè wònsò. Ikala ne diitabuuja mu Nzambi. Bu wèwè ànu mwà kwitabuuja.

422 Inābānzà mutekète udi musòmbe lwà paanyimà pàapa lwà mundekeelu mwà mulongo wàwa, lwà ku luseke lwà dyām wāmwa wàwa, ngwa mu Michigan, ùdi usaama dīsaamà dyà bānà bakājì. Udi witabuuja ne Nzambi neākusangaje anyi? Dībà adi s'udi mwà kupeta cyūdi ulomba aci. Udi ucītābuuja anyi? Amen. Ela cyanza muulu, wāmbè ne: “Ndi mucitabe.” Èyo, udi mwà kwalukila kwèbè kumbèlu ne kuumvwa bîmpè. Ncyèna mumanye inābānzà ewu to, kàdi Nzambì ngudi mumumanye bushūwà.

423 Kàdi wèwè ùdi pa kalāàlu kàà babèèdi ewu? Wèwè ki muntu umwèpelè udi mucibùkile panshi, anyi muntu udi pa kalāàlu kàà babèèdi's. Ndi mwenyi kùdi. Ncyèna mukumanye to. Nzambì mmukumanye. Kadi, ndi ngamba mpindyewu ne, udi mubwikila kùdi mundidimbi wa lufù. Udi ne kansère. Udi mufùmìne ku myaba milemilè. Udi mufùmìne ku Cincinnati, apa. Dînà dyèbè m'Mukalenge Hawk. Itabuuja ne mwoyi wèbè wònsò. Wèwè musòmbe mwaba awu, uf wāfwa. Itaba Yesù Kilistò ne ondopiibwe. Udi uMwitabuuja anyi? Nānku juukila kuulu, upatuke mu kalāàlu kàà dyambwila babèèdi aku, ne witabe Yesù Kilistò.

424 Mbanganyi munda emu bàdi baMwitabuuje, mu kasunsa emu? Nudi nwitabuuja ne mwoyi wènu wònsò anyi? Nānku, muntu ne muntu wa kunùdi, ajuukile kuulu mpindyewu mene. Juukilaayi kuulu. Mpindyewu mu mùshindù wèbè wèwè mwine, mùshindù wùtù usambila awu, tentèkela muntu udi ku luseke lwèbè awu cyanza.

425 Mwanèètù wa bakājì Brown udi penyì? Ûvwa musòmbe mwab'ewu, usaama cyôci aci. Ditùkù adi yèyè kumbiikila ku tèlefonè, kàdi kàyì mwà kwela byanza muulu to. Mèmè kumòna ne civwa ncintu kampànda cibi mu mashi èndè. Pāngāākapetanganà nendè ditùkù adi. . . Ûvwa ne dīsaamà dyà nsukāādì. Yèyè awu ùdi penyì? Ûvwa mwab'ewu ne Mandamu Dauch, katanci aka. Èyo, Mwanèètù wa bakājì Brown. Dilòlò edi, ndi muswè witabuujè ne mwoyi wèbè wònsò. Ndi mumanye ne udi mumanye cidi cikutacisha, kàdi ndi muswè bwà wèwè kwitabuuja. Udi mupatuke mu lùpitaadi, bwà kulwa mwab'ewu, nwamònu's, bwà kukusambidilabù. Ndi nkusambidila mpindyewu. Itabuuja. Newùsangale.

426 Margie, ikala ne diitabuuja kùdi Nzambì. Nedyùmuke mpindyewu mene. Nedijike. Udi mwà kwondopa dīsaamà

dyà nsukàadi, Ûdi mwà kukwondopa disaamà dìdì mu cìfù cyèbè adi.

427 Mpindyewu muntu ne muntu tentèkèlanganaayi byanza muntu ne mukwèndè, nènku ikalaaayi ànu balame byanza byènu mwaba awu bwà katanci kakesè cyanaànà. Tentèkèlanganaayi ànu byanza muntu ne mukwèndè, nwikale bakwate... Nwamònu's, tukàadi batàngile ku díbà dikumi ne òmòwè, ne nebikèngele bwà bantu bàábúngì aba kwendeshabo màshinyì too ne mu Tennessee ne myaba mishùilèshùilàngane.

428 Ncyà bushùwà ne, Mukalenge Nzambi wǎjaadiki. Ciwámònu ncinyi, dilòòlò edi? Nuvwa bamòne muntu anyi nuvwa bamòne Yesù, Yesù mwikàle ùshìndika Dìyi Dyèndè?

429 Mishwàla eyi nyeyi mitèèkùbwe mwab'ewu, pàcidì dilaabiibwa edi pambidi pàanyi apa, Nyewu ntentekela mishwàla eyi byanza, nsambila bwà Nzambi wa Bukolè bwònsò... Mbambè ne: "Bàvwa bàngata pambidi pàà Pòlò mishwàla, anyi tululù."

430 Ki bàvwà bafwè, ne bakàadi babiìshùbwe ku lufù mbòbò aba. Bàvwà mu njiwù, bazaajike, ne bondopiùbwe mbòbò aba. Kudi... .

431 Ndi mmòna Mandamu Wilson mwimane mwab'ewu, wa bwena, ànu àbìdì àdì panshi aa, ùvwa ne mashi àpòngoloka bu wakufwa, ne disaamà dyà cyàdì, kukaadi bidimu. S'ki yèyè ewu dilòòlò edi, bàngàngàbuka bàakamupésha ànu mèbà makèsè à kwikalaye ne mwoyi. S'ki yèyè ewu mwimane dilòòlò edi.

432 Eku ne eku, mwab'ewu ònsò, balèma, bampofu, bikalaba, mu màkalu à balèmà ne bikwàbò byònsò, ki kwimanabu eku dilòòlò edi bu bileejì byà bucimunyi bìdì ne mwoyi. Bwà cinyi ciine aci? Yesù Kilistò udi ne mwoyi, Yèyè udi umwèumwè awu makèlèlè, leelù, too ne kashidi.

433 Muntu udi ufuma ku difila bujaadiki, katanci aka, bwèndè yèyè, lwà kuntu kwàka, ùvwa ne ciseki awu, uvwa naaci bidimu byònsò ebi awu, ne bikwabo byònsò, kàdì ànu musangu umwèpelè mu disangisha's. Ne ciine aci ncyenzeke kukaadi ntàntà, bidimu bitwe ku makumi àbìdì; kacya katukù mwanji kupaluka to kubangila ànu piine apu. Awu ngumwe wa ku binunu dikumi.

434 Yèyè mmwondopi. Amen. Ûdi wondopa. Mpindyewu, kusalukiku to. Ànu, ne diitabuujà bu dyà bwànà, tàngilàayi ku Kàlvaryò. Bwitàayi kwìsù nupwe mwoyi ne nudi mu Tabernacle ewu. Bwità kwìsù upwe mwoyi ne kùdì muntu ku luseke kwèbè, kàdì utàngile kùdì Yesù ne umòne's.

Tàngilààì mpindyewu kùdì Yesù ne nwikale ne mwoyi;

Mbikwaciìbwe pa mukàbà mu Dìyì, àlèluuyàh!
Cìdì ànu ne twètù “tutangile ne twikale ne mwoyi.”

Kaa, tàngilà ne wikale ne mwoyi, mwanèètù wanyì, ìkala ne mwoyi!

Tàngilààyì mpindyewu kùdì Yesù ne nwikale ne mwoyi;

Mbikwaciìbwe pa mukàbà mu Dìyì, àlèluuyàh!
Cìdì ànu ne “tàngilà ne wikale ne mwoyi.”

⁴³⁵ Kanùtangidi muntu to. Kanùtangidi bintu bìdì binùnyungulukile abi to. Kàdì ku diitabuuja dyènù, tàngilààyì kùdì Yesù Kilistò, ne numanye, ne: “Wàkatàpiibwa mputa bwà dishipa dyènù dyà mikenji; ku mibùndabùnda Yèndè nwàkwondopiibwa.”

⁴³⁶ Mukalenge Yesù, ànu mudi bantu aba basambila emu, nènku, nyewu batentèkelangane byanza muntu ne mukwèndè. Nènku tudi . . . bamanye ne tudi biimane mu Bwikadi bwà Yesù Kilistò udi ne mwoyi, mubiike ku lufù, mu mmwenekelu wa Nyumà Mwímpè, mwikale utùbuulwila minsokontu yà myoyi yètù, mwikale utumanyishaku majinga ètù, ne mwikale utùlaya ne Yèyè neàtupe majinga ètù bu twètù mwà kwitabuuja.

⁴³⁷ Balùme ne bakàjì nyewu batentèkelangane byanza. Bàdì munkaci mwà kusambila, bwalu twètù tudi beena mwàbò bàà Bukalenge bwà Nzambi. Tudi bàna bààbù ne Yesù Kilistò bàà balùme ne bàà bakàjì.

⁴³⁸ Nènku, Sàtaanà, tulwàlwa kùdì mu kadyòmbò kàà Dìnà dyà Mukalenge Yesù. Yèyè m’Mwele wà mvità. Yèyè ki Udi umusha disaamà. Yèyè ki Udi umusha mpatà. Yèyè ki Mucimunyi. Mpindyewu tudi tukwela kadyòmbò, mu Dìnà dyà Yesù Kilistò, bwà wèwè kupatuka mu bantu aba, Sàtaanà!

⁴³⁹ Dìyì dyà Nzambi ndimwenèshìbwe. Dìdì ditengula, dyumusha mpatà, dyumusha màsaamà, ne ditwàla dipikudiibwa dipwàngàne. Tudi tulòmba bwà Nyumà Mwímpè amacileku cisàmbà eci, ne abapè bukolè bwà diitabuuja bwà kwitabuuja ne Bwikadi bwà Kilistò wa bukolè bwònsò bùdì kaaba aka mpindyewu. Enzaku nànkù, Mukalenge.

⁴⁴⁰ Ndi mpiisha disaamà dyònsò. Ndi mpiisha mabèèdì ònsò. Ndi mpiisha bupidyà bwònsò. Mu Dìnà dyà Yesù Kilistò, swaku bwà Nyumà Mwímpè atwe cìndì mwambe eci mushinga, ne atambakanè mu nzùbu emu mwònsò ne asungila muntu yònsò mu Bwikadi bwà Nzambi.

⁴⁴¹ Elààyì byanza byènù muulu mpindyewu nuMutùmbishè. Ndi njikula ne nudi bwònsò basangale ne bwondopiibwè, mu Dìnà dyà Yesù Kilistò!



TÀNGIÀÀYÌ MÈSÙ KÙDÌ YESÙ LUA63-1229E

(Look Away To Jesus)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, dya matùkù 29 à ngondo wa ciswà-munène, cidimu cyà 1963, ku Branham Tabernacle mu Jeffersonville, mu Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org